




守護國界主陀羅尼經

唐 闍賓國三藏般若等譯



清刻龍藏佛說法變相圖

守護國界主陀羅尼經卷第一

蘭一

唐 屬賓國三藏般若等譯

序品第一

如是我聞一時薄伽梵住伽耶城去城不遠
 菩提樹下與大比丘衆七千人俱皆是大阿
 羅漢諸漏已盡蘭一無復煩惱已作所作已辦所
 辦心善解脫慧善解脫猶如大龍得宿住智
 已捨重擔速得已利盡三有結無復後有於
 一切法得真實智深入法性到於彼岸於法
 善巧從法化生於順於違心無染著發言和
 悅先意問訊梵行清淨正念明潔於解脫道
 已得圓滿唯有阿難住於學地復有菩薩摩
 訶薩八萬四千人皆於一生當得菩提於一
 切智任運深入至於源底十方諸佛常現在
 前得無染著陀羅尼門住首楞嚴諸三昧門

得大自在遊戲神通諸解脫門已離一切煩惱障礙以大慈悲普覆十方一切世界徧遊法界無邊刹海以無住相入虛空性常勤利益一切衆生於佛境界已得善巧心意智慧廣大無量猶如虛空甚深無際猶如大海安住不動如須彌山無所染著猶如蓮華內外清淨如摩尼寶光明熾盛如鎔真金具如是等無量無邊諸功德聚其名曰普賢菩薩摩訶薩普眼菩薩摩訶薩普觀菩薩摩訶薩普光菩薩摩訶薩普猷菩薩摩訶薩勝意菩薩摩訶薩增長意菩薩摩訶薩無邊意菩薩方廣意菩薩廣大意菩薩無盡意菩薩持地意菩薩持衆生意菩薩得勝意菩薩善分別意菩薩陀羅尼自在王菩薩執寶炬菩薩寶印手菩薩寶冠菩薩寶髻菩薩寶積菩薩寶生

菩薩寶峯菩薩寶幢菩薩金剛藏菩薩吉祥藏菩薩無垢藏菩薩清淨藏菩薩如來藏菩薩智藏菩薩日藏菩薩三昧藏菩薩蓮華藏菩薩解脫月菩薩普月菩薩大勢至菩薩普見菩薩蓮華眼菩薩廣嚴眼菩薩普威儀菩薩普端嚴菩薩普行意菩薩智慧意菩薩法意菩薩金剛意菩薩師子遊戲菩薩大雲自在王菩薩師子威猛音菩薩廣大深妙聲菩薩無染著菩薩離諸垢菩薩月光猷菩薩日光猷菩薩智光猷菩薩智吉祥菩薩月吉祥菩薩蓮華吉祥菩薩賢吉祥菩薩寶吉祥菩薩妙吉祥童子菩薩觀自在菩薩彌勒菩薩等而爲上首皆於賢劫當得菩提與如是等菩薩摩訶薩八萬四千人復有無量四大王衆天四大天王而爲上首復有無量忉利天

子釋提桓因而爲上首復有無量須夜摩天子夜摩天王而爲上首復有無量兜率天子兜率陀天王而爲上首復有無量化樂天子妙化樂天王而爲上首復有無量忉化自在天子忉化自在天王而爲上首復有日光天子滿月天子商主天子各與無量天子眷屬俱復有大梵天王與無量梵眾俱復有淨居諸天摩醯首羅天王各與無量眷屬俱如是無量天龍夜叉乾闥婆阿修羅迦樓羅緊那羅摩睺羅伽各與無量百千眷屬俱復有無量比丘比丘尼優婆塞優婆夷各與眷屬俱如是無邊一切眾會各至佛所頂禮佛足退坐一面恭敬圍繞爾時如來處於眾會坐金剛座威德巍巍超過一切如須彌山出于大海光相炳曜映奪一切譬如朗日高昇虛空

見者清涼如秋滿月身心寂靜如大梵王眾所敬畏如天帝釋具七聖寶如轉輪王決定宣說法空無我如師子吼光明照徹一切世界如夜暗中而然大火放種種光普照十方一切世界如天摩尼及眾寶聚無所分別降伏魔怨摧諸異見如大象王於順於違心無垢濁如清淨池處眾無畏猶如師子智慧深廣無量無邊無能至底能生一切功德寶聚猶如大海普雨法雨潤洽一切生長成熟猶如大龍具如是等無量功德爾時一切眾會一心合掌瞻仰如來生難遭想如來大悲慈眼普觀身光普照當爾之時菩提樹王於其四面各七由旬地上虛空天龍八部一切眾會周匝徧滿無有微塵毛端量處而無聖眾如來所處金剛之座高一由旬縱廣正等各

半由旬以無量種百千萬億微妙天衣而敷其上懸衆寶蓋垂諸網繖衆寶繒綵以爲幢幡羅列建立周匝垂掛於座四周皆以金剛而爲其地平坦如掌清淨潤澤香潔柔軟蹈則沒足舉則還復衆生見者欣樂無厭爾時諸天爲供養佛雨天妙華所謂瞻博迦華阿提目多伽華婆利師迦華毘陀羅華摩訶毘陀羅華毘殊沙華摩訶毘殊沙華以如是等種種天華而散佛上及諸大衆徧覆其地微風吹動出殊妙香飄條諸穢忽於其地涌出無數百寶蓮華大如車輪真金爲葉各百千萬以吠瑠璃而爲其莖帝青摩尼以爲其臺阿泥摩羯摩寶以爲其鬚發衆妙香出過諸天其華柔軟光淨細滑衆生見者情無厭足若有觸者能除熱惱身心清涼如是皆爲供

養如來故現斯瑞當爾之時去金剛座於其四隅不近不遠各有寶樹從地涌出其樹各以七寶所成樹身高聳二由旬半枝葉周布覆一由旬爾時文殊師利法王子菩薩摩訶薩於衆會中瞻仰如來處金剛座威德特尊光明炳著蔽於大衆逾百千日映餘光輝一切衆會觀無厭足發清淨心即從座起胡跪合掌以妙伽佗而讚佛言

如來威容不可量 超出人天及衆聖
譬如滿月澄空界 一切星宿奪光輝
佛處慈悲大海中 放百千光而照耀
譬如須彌出巨海 諸天依住放光明
常住解脫禪定中 自在光明照一切
譬如三千大梵王 寂靜光超諸梵天
功德智慧以嚴心 寶相嚴身光普照

如帝釋光及智慧 超過一切忉利天
大慈悲意自莊嚴 安立衆生於聖道
如四天王能護世 慰喻教化諸衆生
佛日恒放法光明 普照衆生滅邪見
譬如千日光明照 映奪摩尼火等光
佛面圓滿相端嚴 見者歡悅心清淨
譬如中宵圓淨月 衆生樂見得清涼
大仙恒放智光明 滅除一切無明暗
如夜高山大火聚 無遠不照發光輝
佛說無我諸法空 一切外道皆驚怖
如山窟中師子吼 百獸聞者喪精光
佛身如鎔紫金山 光明映蔽於大衆
亦如摩尼寶光耀 超奪一切寶光明
福德智慧方便門 精勤一切皆善巧
徧觀世界無倫匹 況復能過於世尊

我見大雄哀世間 智慧大海光明照
五體投於佛足下 踊躍歡喜難自持
我讚如來世間燈 能生功德最勝智
以此福聚利含識 一切速證大菩提
爾時文殊師利童子菩薩摩訶薩說此伽陀
稱讚佛已合掌恭敬瞻仰如來目不暫捨一
心思惟如來所住微妙法性甚深難入非可
見相難見難解非是凡愚外道境界微妙寂
靜不可思議能生諸佛無等等智不可思議
流出法界差別教法不可思議唯有如來究
盡明了住無所住虛空境界現證諸法本性
清淨真實之際得於諸佛無礙解脫常住不
變安樂寂靜其身充滿一切剎土普現一切
衆生之前入於三際平等源底非是心識稱
量境界於無量劫思惟宣說不可窮盡文殊

師利如是審諦微細觀察深法已默然而住
陀羅尼品第二之一

爾時世尊常住三世平等法性而入三昧名
普隨順眾生心行以三昧力於時會中所應
調伏一切大眾各各見佛種種不同所謂或
有眾生見於如來相好之身或有眾生見聲
聞身或有眾生見菩薩身或有眾生見梵天
身或有眾生見大自在天身或有眾生見那
羅延天身如是乃至天龍八部人非人等種
種差別其無信者都無所見猶如生盲不見
日月其得見者隨其種類而見其身種種威
儀隨其類音聞種種聲隨其所樂聞種種法
隨其力能生種種解雖隨眾生如是知見而
如來身一味無二所謂一解脫味猶如虛空
離於一切麤細分別及無分別亦如大地能

爲一切世出世間天龍八部依持而住生長
成熟而無厭倦又如火大能燒眾生諸煩惱
薪無有厭倦亦如風大能飄一切煩惱塵垢
亦無厭倦又如水大悉能滋長一切眾生所
有善根除煩惱熱得清涼樂亦無厭倦爾時
世尊忽於頂上肉髻之中蘭一膚骨毛孔放大光
明其光鮮白復以無量百千光明而爲眷屬
普照世間下至阿鼻地獄上至阿迦尼吒天
一切所有皆同白色其中眾生皆見一切山
林河海情非情物皆同鮮白猶如乳色亦如
雪山又從口中放大光明如帝青色亦以無
量百千光明而爲眷屬照於東方從金剛座
東盡恒河沙世界其中所有山河石壁草木
叢林情非情境皆帝青色彼中眾生皆見一
切如帝青色復於右肩放大光明如鎔金色

亦以無量百千光明而爲眷屬照於南方從金剛座南盡於南方恒沙世界其中所有皆鎔金色彼諸衆生亦見一切皆鎔金色復於背上放大光明紅玻璃色亦以無量百千光明而爲眷屬照於西方從金剛座西盡於西方恒沙世界其中所有皆紅玻璃色彼中衆生亦見一切皆玻璃色復於左肩放五色光所謂青黃赤白及於綠色亦以無量百千光明而爲眷屬照於北方從金剛座北盡於北方恒沙世界其中所有悉皆五色彼中衆生亦見一切皆具五色如是所照一切世界一下至阿鼻地獄上至阿迦尼吒天照諸世界作佛事已收光歸本其白色光還從上下來至佛所右邊如來經三市已從佛頂入帝青色光還從東方來至佛所右邊三市從佛

口入鎔金色光還從南方來至佛所右邊三市入佛右肩紅玻璃色光還從西方來至佛所右邊三市入如來背五色光明還從北方來至佛所右邊三市入佛左肩雖此光明展照還收而如來身體無增減譬如月光徧照虛空無有增減亦如油水及以融蘇投沙聚中亦無增減又如雪山騰出浮雲徧滿虛空須臾卷攝還歸雪山纖毫無跡而其雪山體無增減爾時世尊復入三昧而此三昧無有名字無言無說不可思議即一切智智諸佛境界入三昧已時此大地六種震動所謂東涌西沒西涌東沒南涌北沒北涌南沒中涌邊沒邊涌中沒爾時會中有一菩薩摩訶薩名一切法自在王承佛神力即從座起整身威儀徧袒右肩頂禮佛足胡跪合掌而白佛

言世尊何因何緣放大光明地六震動爾時
佛告一切法自在王菩薩言善哉善哉善男
子汝今善能啓發斯問吾當爲汝分別解說
善男子有四因緣放斯光明大地震動何等
爲四一者三世諸佛皆因入此勝三昧故得
阿耨多羅三藐三菩提我亦如是三無數劫
具修諸度六年苦行不證菩提由入此定便
得無上正等菩提以是因緣故現斯瑞二者
由此三昧既無言說體性寂滅不可宣示欲
以方便善巧力故爲衆生說故現斯瑞三者
我昔於此菩提樹下得是三昧成等正覺爲
報恩故今於是處說此三昧三世諸佛亦復
如是皆於此處說此三昧故現斯瑞四者欲
爲十方恒沙世界無數諸來菩薩摩訶薩及
摩伽陀國主阿闍世王比丘比丘尼優婆塞

優婆夷天龍夜叉此諸衆會及與法界一切
衆生說此三昧以是因緣故現斯瑞爾時大
衆聞此說已踊躍歡喜身心清涼悲感欣慕
不能自持譬如有人毒箭中心更無所思唯
思良醫拔除毒箭令我安樂諸菩薩衆亦復
如是不思諸法唯希如來說此三昧拔諸有
情生死大夜無明黑暗無所知見破諸煩惱
開正法眼得智光明時此衆會雖生此念佛
威德故不敢諮問爾時一切法自在王菩薩
摩訶薩承佛神力五體投地頂禮佛足胡跪
合掌而白佛言世尊彼不可思議一切智智
諸佛境界三昧爲以何法而爲其因復以何
法而爲根本云何修習云何究竟爾時世尊
告一切法自在王菩薩摩訶薩言善哉善哉
善男子汝今善能諮問斯義於未來世多所

利益多所安樂一切衆生諦聽諦聽善思念之當爲汝說善男子此深三昧以菩提心而爲其因以大慈悲而爲根本方便修習無上菩提以爲究竟善男子此中何者名爲菩提善男子欲知菩提當了自心若了自心即了菩提何以故心與菩提真實之相畢竟推求俱不可得同於虛空故菩提相即虛空相是故菩提無所證相無能證相亦無能所契合之相何以故菩提畢竟無諸相故善男子以一切法即虛空相是故菩提畢竟無相爾時一切法自在王菩薩復白佛言世尊若此菩提相同虛空一切智體當何所求云何證得菩提現前一切智智當於何生佛告一切法自在王菩薩言善男子一切智體當於心求一切智智及與菩提從心而生何以故心之

實性本清淨故善男子此心之性不在內不在外不在中若善男子一切如來說此心相非青非黃非赤非白非紅非紫亦非金色非長非短非圓非方非明非暗非男非女非非男女亦復非是亦男亦女善男子此心非欲界性非色界性非無色界性非天非龍非夜叉非乾闥婆非阿脩羅非迦樓羅非緊那羅非摩睺羅伽人非人等一切同類善男子此心不住於眼亦復不住耳鼻舌身意於三世中亦不可見何以故此心同於虛空相故以是義故遠離一切麤細分別何以故此虛空性即心性故如其心性即菩提性如菩提性即陀羅尼性善男子是故此心虛空菩提陀羅尼性無二無二分無別無斷如是一切皆以大慈大悲而爲根本方便波羅蜜之所攝

受善男子是故當知我今於此諸菩薩等大衆之中說如是法爲淨廣大菩提心故爲令一切了自心故是故一切法自在王若有善男子善女人欲知菩提真實性者當了自心如其心性即菩提性云何而能了知心性謂此心性於一切相若形若顯若復色蘊受想行識若復色塵聲香味觸若有執受若無執受若十二入若十八界如是等法觀察推求竟不可得善男子若諸菩薩如是了知即得成就第一清淨法光明門住此門已任運得此不可思議一切智智諸佛境界甚深三昧菩薩獲得此三昧已與一切佛平等平等及得一切衆生語言陀羅尼三昧復得隨順諸衆生心陀羅尼門常能無間利益衆生於無爲界具足圓滿遠離斷常六十二等一切邪

見正見圓明善男子若諸菩薩住是三昧一切佛法不作功用任運成就善男子我今略說若有能住此三昧者無量無邊無數功德皆悉圓滿爾時一切法自在王菩薩復白佛言世尊如佛所說如虛空性即是心性如於心性即菩提性如菩提性即陀羅尼性其虛空性心性菩提性陀羅尼性無二無別者如是之義甚深甚深難可通達難得趣入不可思議超過心地非是凡愚劣解所知於此會中有二種人一者滿足菩薩位人則得利益二者未得成菩薩功德謂摩伽陀國主阿闍世王及諸比丘比丘尼優婆塞優婆夷等無量衆生則無利益此諸凡愚猶如生盲不見燈光又如聾人不聞細語如砂鹵地不生蓮華世尊如有國王大臣長者於饑饉世食衆

第十一

十二

甘美天諸珍膳昇高樓閣告於無量饑餓衆生作如是言我食如是種種上味雖作是言於諸饑人都無所益今佛所說於此衆會未成就者亦復如是都無利益爾時佛告一切法自在王菩薩言善哉善哉善男子善能諮問如是深法多所利樂一切衆生諦聽諦聽善思念之吾當爲汝及此衆會以諸方便示教汝等令汝得解不可思議一切智智諸佛境界甚深三昧善男子若諸佛子欲得成就阿耨多羅三藐三菩提者若欲善能知自心者若有欲以大慈悲手於生死泥拔衆生者應先發起大慈悲心普爲衆生歸依三寶受菩薩戒發菩提心至誠懺悔作如是言惟願十方一切諸佛及與住地得金剛智諸大菩薩當證知我當憶念我某甲等發菩提心

未住妙道今將身命歸依十方一切三寶惟願諸佛諸大菩薩起慈悲心哀愍攝受我某甲等自從無始流轉已來處在三界生死輪中沉溺惡趣入苦籠檻顛墜諸惡無明羅刹有大力勢諸煩惱冤長夜逼迫無主無救無歸無依無有所趣無有教導住於邪見險惡道中趣向生死背捨涅槃入三惡道不能自出墮於險惡廣大深坑追逐惡友隨順惡教遠離一切諸善知識都不覺知何者爲損何者爲益何者是善何者是惡爲不善法繫著不捨棄背一切三乘聖人長夜常爲生老病死憂悲苦惱種種惑業之所羅網憂迫恐怖恒失本心自性寂靜遠離種種三摩地門陀羅尼門諸地諸忍般若波羅蜜多甚深住處亦復遠離慈悲喜捨諸菩薩戒四無礙智六

通十方四無所畏無忘失法無住涅槃一切
隨眠我身具足一切功德我身空無七菩提
分八聖道分如是等法百千萬種悉皆遠離
無數苦惱意礙留難恒所惱害惟願諸佛諸
大菩薩起大慈悲哀愍護念與我為主為救
為歸為依為趣願令我等速得圓滿大菩提
道及於無量菩提眷屬如來十力四無所畏
四無礙解十八不共四攝三昧解脫總持六
通諸度福德智慧如是一切諸功德海願令
我等皆得滿足又復十方一切諸佛諸大菩
薩當證知我當哀愍我受我供養願令供具
積集圓滿及與我身充徧十方一切世界及
攝十方無有主宰廣大莊嚴無量供具現前
供養諸佛菩薩所謂種種妙寶諸天宮殿各
以妙寶而為莊嚴眾寶欄楯分布行列寶樹

寶山以為映帶寶座寶蓋寶幢寶旛寶器寶
珠寶鈴寶網寶光寶燄及寶功德一一無量
無數寶洲摩尼寶聚充滿其中諸寶燈樹種
種妙寶間錯莊嚴金燄發輝寶網羅覆復有
無數妙寶蓮華閻浮檀金以為其臺真金為
葉茵苜敷榮興天寶雲雨天寶雨降天寶樹
散天寶華發眾寶光開眾寶藏復有無數閻
浮檀金諸天宮殿眾寶莊嚴妙寶廊宇金剛
為牆眾寶欄楯周布圍繞種種天仙眾妙園
苑華林香草芬敷布護無數龍宮阿脩羅宮
各有種種林木殿堂香華寶器以如是等無
量無邊曾未受用眾寶供具悉將迴向供養
十方諸佛菩薩復攝十方一切世界種種妙
樂及天甘露天諸珍膳色香美味皆悉具足
又攝十方一切世界諸妙香樹龍腦香樹栴

檀香樹隨時香樹大葉香樹其樹四時華敷
相續香氣美妙若有麝香沉寂虛疑如是無
量種種香樹芬芳郁烈能奪人心復有種種
無有主宰如意等樹隨心所願皆得滿足大
海之中種種摩尼及如意寶復有種種寶迷
盧山摩訶迷盧山羯邏斯山健駄末陀山摩
羅邪山尾你邪_二山民陀羅山摩訶民陀羅
山目真隣陀山摩訶目真隣陀山金剛山等
如是山頂種種寶莊嚴種種寶樓閣種種寶
巖窟種種寶帳蓋種種寶堂宇種種寶階陛
種種寶牕牖種種寶塗飾種種寶梁柱種種
寶庫藏吠瑠璃等種種寶牆復有奇妙種種
色類無有主宰諸天宮殿復有種種俱蘇摩
等天諸妙華見者無厭清涼悅樂復有種種
諸妙音聲能令聞者身心安樂無諸熱惱而

得清涼斷伏貪瞋散滅癡毒摧壞惡業令無
有餘所謂天帝釋聲梵天王聲種種天聲諸
天仙女歌詠之聲天諸樂器不因拊擊出微
妙聲簫笛箏篳篥琵琶琴瑟螺貝等聲忉利天
鼓聲牟陀羅鼓聲復有種種諸天鳥聲及於
山林泉流鳥聲所謂白鶴孔雀鳬鴈鴛鴦拘
枳羅鳥命命之鳥迦陵頻伽種種好鳥鳴轉
之聲及鹿王等諸妙音聲復有種種雲聲地
聲水聲火聲風聲大海波濤如是等聲若人
聞者悉能解了愛樂無厭耳根安靜其聲深
遠諦實清徹能生善根文字名句悉皆具足
與義相應契深法理善合時宜所謂三乘平
等聲演說三明聲莊嚴檀那波羅蜜聲清淨
尸羅波羅蜜聲能生羣提波羅蜜聲勤修精
進波羅蜜聲成就禪那波羅蜜聲廣大般若

波羅蜜聲與心和合大喜聲與覺和合大悲
聲光影和合大喜聲同於虛空大捨聲出生
三乘聲不斷三寶聲分別三聚聲清淨三空
聲觀察四諦聲觀察智慧聲智者不毀聲聖
者稱讚聲量等虛空聲出如是等清淨音聲
迴向供養諸佛菩薩復有種種華樹發妙華
香種種鬘樹垂諸鬘帶種種幢樹高顯建立
種種旛樹接影連輝持如是等一切妙物以
無我心迴向供養一切諸佛諸大菩薩復以
一切佛眼所見十方無邊一切世界大供養
蘭一
雲以爲供養所謂種種華雲種種香雲鬘雲
帳雲塗香雲末香雲寶蓋雲寶座雲寶幢雲
寶幡雲妙寶衣服雲眾寶資具雲天諸上味
雲摩尼寶聚雲如是種種無量色類諸寶供
雲迴向供養一切諸佛諸菩薩等復當願以

小千世界爲一燈盞滿中香油百須彌量以
爲其炷然以寶燄發大光明供養一切諸佛
菩薩如是供養無有窮盡復當勸請一切如
來往菩提樹降伏眾魔成等正覺轉妙法輪
久住大劫莫般涅槃復應以此種種善根迴
向眾生願諸眾生速證阿耨多羅三藐三菩
提如是迴向時不見能迴向心不取所向之
境不著所迴善根三輪清淨復次一切如來
一切菩薩一切眾生如是等類所有功德我
皆隨喜復作是願以此善根願令我等一切
諸障極重惡業皆得消滅爾時世尊即說迴
向陀羅尼曰
唵一娑麼合二囉娑麼合囉二微麼引曩三娑
引囉四摩訶訶迦囉引二合嚩五吽六長聲
佛言如上所說種種供具以此迴向陀羅尼
十七

力於諸佛前悉得成就真實供養一切諸佛
皆悉攝受若善男子及善女人有能於此大
迴向輪陀羅尼門若時非時若晝若夜默念
一遍觀察運想以前供具恭敬供養諸佛菩
薩由此力故五無間等極重罪業皆得消滅
何況輕罪而不除滅一切煩惱皆得輕微如
前所說十力無畏諸功德等皆悉具足若人
變於此陀羅尼思惟一遍便得百轉生帝釋
宮復得百轉生梵王宮於夜夢中見佛菩薩
爲說妙法無諸惡夢於諸總持皆得成就執
金剛菩薩護念攝受隨願往生諸佛淨土
守護國界主陀羅尼經卷第一
音釋

鎔以中切 醯虛宜切 輶乳充切 蹈杜到切 滌
杜歷切 吒除駕切 鹵郎古切 籠籠東切 檻籠東切

極戶黠切 櫛食尹切 齒齒戶切 拊拊擊切 擊拊擊切
也胡故切 漚散也 鼻許救切 齒齒戶切 拊拊擊切 擊拊擊切
也胡故切 漚散也 鼻許救切 齒齒戶切 拊拊擊切 擊拊擊切

守護國界主陀羅尼經卷第二

蘭二

唐 屬賓國 三藏般若等 譯

陀羅尼品第二之二

爾時世尊如象主迴普觀大眾復告一切法自在王菩薩摩訶薩言善男子此會之中有二種人一者成就二未成就我今重爲未成就者以善方便隨順世諦譬喻言詞說一乘法如世有法名迦樓羅欲修此法應先圖畫迦樓羅像審諦觀察觀行純熟然去畫像手結印契想其自身成迦樓羅作五大觀一者觀地作白色觀二者觀水作綠色觀三者觀火作黃赤色觀四者觀風作黑色觀五者觀空作青色觀此觀成已一切諸毒皆成非毒謂若有情毒若非情毒或令迴互或取或捨縱任自在善男子菩薩摩訶薩亦復如是若

欲入觀先當默念此前迴向陀羅尼門然後當入毗盧遮那如來三昧謂觀此身體成金剛堅不可壞當以身作金剛結跏謂以右腳壓左脛上端身正坐舌根微動脣齒相合作金剛語金剛語者謂無言聲但心默念以堅牢智諦觀自心以爲月輪當於鼻端不令馳散清淨圓滿色如凝雪牛乳水精而此月輪爲菩提心此菩提心本無色相爲未成就諸衆生故說如月輪應以右手作金剛拳當心握於左手頭指此名能與無上菩提最尊勝印即是本師毗盧遮那如來之印爾時世尊即說陀羅尼曰
唵吽惹護平聲娑
云何觀察此陀羅尼當以唵字安前所觀月輪之中置於頂上觀此唵字色如珂雪此想

成已即見自身坐月輪中便得成就毗盧遮那以如是等無量無邊微塵數智成就此身是則名爲具一切智亦得名爲具金剛智是修觀者瑜伽之智亦是般若波羅蜜多亦即名爲諸菩薩果此果能得三種真實何等爲

第二

三一者得前真實不可思議一切智智諸佛境界三昧二者得前真實秘密真言三者得前真實秘密印契前觀成已便想頂上出白光明復以百千萬億光明而爲眷屬下至阿鼻地獄上至阿迦尼吒天其中所有一切衆生無始生死無明黑闇盲無智眼以此般若波羅蜜燈開彼佛眼如深山谷幽闇之處日月光明所不能照若然一燈久遠闇暝一切皆除何以故法如是故毗盧遮那如來三昧放白色光亦復如是復次善男子行者從此

三昧起已次復入於不動三昧面向西方亦作如前金剛結跏端身正坐應以左手所被衣服兩角交過遶其手腕以拳執之上出兩角右手按地此即名爲能摧伏印一切衆魔及諸外道諸惑業等皆不能動即是阿閼如來之印次亦默誦如上所說毗盧遮那如來真言應以吽字處月輪中置於頂上觀此吽字以爲青色觀想成已次觀徧身皆作青色此身即成阿閼如來此觀成已即從頂上放青色光亦以無數百千億光而爲眷屬一光中皆有無量青色金剛菩薩而現各作此印光照東方恒河沙數世界之中其中衆生遇斯光者所有欺奪殺害惡心皆悉捨離寂靜不動善男子行者從此三昧起已復於南方面向北坐亦作如上金剛結跏端身正坐

左手如前執衣兩角右手仰掌名滿願印此
即寶生如來之印次亦誦前毗盧遮那如來
真言作惹字觀當以此字處月輪中置於頂
上如融金色觀想成已漸觀徧身皆融金色
此身即成寶生如來此觀成已即從頂上放
金色光亦以無數百千億光而爲眷屬一一
光中皆有無量金色金剛菩薩而現各爲此
印一一菩薩各各手中兩如意寶光照南方
恒沙世界其中衆生遇斯光者所有願求皆
得滿足復於西方面向東坐亦作如上金剛
結跏端身正坐左手仰掌當於臍上右手仰
掌重左手上以大拇指令頭相拄此印名爲
第一最勝三昧之印能滅狂亂一切妄念令
心一境即阿彌陀如來之印亦誦如上毗盧
遮那如來真言作護_{平聲}字觀當以此字處月

輪中置於頂上如紅蓮華色觀想成已漸觀
徧身皆紅蓮華色此身即成阿彌陀如來此
想成已即從頂上放紅蓮華色光亦以無數
百千億光而爲眷屬一一光中皆有無量紅
蓮華色菩薩而現各爲此印入深三昧光照
西方恒沙世界彼中衆生遇斯光者皆入三
昧復於北方面向南坐亦作如上金剛結跏
端身正坐左手如前執衣兩角右手展掌豎
其五指當肩向外名施無畏此印能施一切
衆生安樂無畏一切惡人不能惱害即不空
成就如來之印次亦誦上毗盧遮那如來真
言作娑_{上聲}字觀當以此字處月輪中置於頂
上具於五色觀想成已漸觀徧身皆作五色
成於不空成就如來此觀成已即從頂上放
五色光亦以無數百千億光而爲眷屬一一

光中皆有無量五色光明菩薩而現各作此印皆施無畏光照北方恒沙世界其中衆生遇斯光者悉得無畏佛復告一切法自在王菩薩言如上所說自證之法唯自證知非言能說離諸見相爲未成就諸衆生故於無相中以相顯示於無言說假以言宣譬如空中乾闥婆城非實現實爾時佛復告一切法自在王菩薩及諸大衆言諸佛子十方一切諸世界中無量無數百千萬億異類衆生或有衆生諸根不具或復具足五無間業屠兒魁膾旃陀羅等於一切智不可思議三昧之中修習趣入悉皆有分除五種人何等爲五一者不信二者斷見三者常見四者邪見五者懷疑此五衆生不能趣入何以故此深三昧以大慈悲而爲根本如是五人無慈悲故善

補二

五

男子若復有人能暫修習此三昧者身心輕安即能生於五種三昧何等爲五一者刹那三昧二者微塵三昧三者漸現三昧四者起伏三昧五者安住三昧云何名爲刹那三昧謂觀月輪刹那刹那暫時相應尋復還失是故名爲刹那三昧云何名爲微塵三昧謂於三昧少分相應譬如有人不識蜜味得微塵許在其舌根愛樂安樂都忘飢渴疾病之念但更專心希求多得此三昧心亦復如是少分相應悉忘一切煩惱飢渴心得安樂轉更求之云何名爲漸現三昧謂由少得愛樂安樂漸漸增勝身毛皆豎悲泣流淚如黑物中見一白縷此亦如是由觀月輪得少分住於無明闇煩惱之中見少定心微分顯現云何名爲起伏三昧謂觀行未純或起或滅如秤

低昂觀成惑滅觀失惑生云何名爲安住三昧由前四定心得安住悉皆守護一切善法增長新善身心安樂如盛夏中遠涉砂磧熱渴日久忽得雪山清冷美水所有熱渴憂苦皆除此亦如是得此三昧業惑苦惱一切皆遣是爲無上菩提芽生善男子如上所說諸根不具五無間業諸惡衆生尚於此中修入有分何況一切比丘比丘尼優婆塞優婆夷而不趣入善男子今此大衆無數衆生聞此法已皆於阿耨多羅三藐三菩提得不退轉神通十力四無所畏念念增進無數三昧皆悉現前所謂默離一切法三昧超過一切法三昧一切法平等三昧離諸見稠林三昧遠離無明闇三昧一切法離相三昧解脫一切著三昧離一切懈怠三昧甚深法發光三昧

前

六

如須彌山三昧永無失壞三昧摧壞魔軍三昧不著三界三昧出生光明三昧常見如來三昧以如是等而爲上首無數三昧皆現在前復有無量種種衆生得於無數陀羅尼門所謂觀諸法性陀羅尼門發菩提心陀羅尼門生菩提芽陀羅尼門了金剛性陀羅尼門得佛平等陀羅尼門一切法本性清淨陀羅尼門一切法本性攝受陀羅尼門一切法本性不可得陀羅尼門一切法出生智慧陀羅尼門一切法皆悉成就陀羅尼門一切法轉變自在陀羅尼門一切法大光普照陀羅尼門一切法遠離癡闇陀羅尼門一切法心智清淨陀羅尼門一切法不可得陀羅尼門普散一切衆寶妙華陀羅尼門本性顯現出生諸法陀羅尼門遠離一切諸幻化法陀羅尼

門如鏡圓明出生影像陀羅尼門出生一切
衆生音聲陀羅尼門令諸衆生最極歡喜陀
羅尼門巧順一切衆生音聲陀羅尼門出生
種種音聲字句陀羅尼門無有障礙陀羅尼
門本性巧便陀羅尼門解脫煩惱陀羅尼門
離一切塵陀羅尼門分別字義陀羅尼門解
了諸法陀羅尼門法無礙際陀羅尼門猶如
虛空陀羅尼門猶如金剛陀羅尼門近色光
王陀羅尼門得最尊勝陀羅尼門不退轉眼
陀羅尼門法界出生陀羅尼門常施安慰陀
羅尼門如師子吼陀羅尼門超衆生福陀羅
尼門離諸憂惱陀羅尼門離諸過惡陀羅尼
門妙華莊嚴陀羅尼門破諸疑網陀羅尼門
諸法順如陀羅尼門出現諸法陀羅尼門大
聲清淨自在陀羅尼門無盡寶篋陀羅尼門

無邊漩渦陀羅尼門海印陀羅尼門蓮華莊
嚴陀羅尼門能入無著陀羅尼門漸漸深入
四無礙智陀羅尼門一切諸佛護持莊嚴陀
羅尼門如是等法而爲上首無量無數陀羅
尼門皆悉現前爾時一切法自在王菩薩摩
訶薩白佛言世尊如是無數陀羅尼門何等
陀羅尼門能令菩薩總持諸佛所說妙法而
不失壞何等陀羅尼門能令菩薩說此法時
辯才無盡何等陀羅尼門能令菩薩說此法
時一切衆生愛樂歡喜佛告一切法自在王
菩薩言善男子有八陀羅尼門若受持者能
令菩薩總持佛法辯才無盡衆生樂聞何等
爲八所謂大聲清淨自在王陀羅尼門無盡
寶篋陀羅尼門無邊漩渦陀羅尼門海印陀
羅尼門蓮華莊嚴陀羅尼門能入無著陀羅

尼門漸漸深入四無礙智陀羅尼門一切諸佛護持莊嚴陀羅尼門菩薩若能於此八種陀羅尼門受持修習即能總持一切如來所說妙法辯才無盡亦令衆生愛樂歡喜爾時一切法自在王菩薩白佛言世尊惟願如來

第二

哀愍我等廣分別說如此八種陀羅尼門菩薩得聞則能於此勤求趣入爾時世尊告一切法自在王菩薩言善哉善哉善男子諦聽諦聽善思念之今當爲汝廣分別說令諸菩薩得入此門善男子云何名爲大聲清淨陀羅尼門若有菩薩修習於此陀羅尼門應以無著清淨妙念安住真實心絕動搖威儀凝靜以決定心說微妙法令一佛刹所有衆生隨其類音普聞其聲悉解其義如是或二佛刹或三佛刹或十佛刹或百佛刹或千佛刹

二千百千乃至十方無量無邊俱胝那由佗百千佛刹其中衆生亦各隨類普聞其聲悉解其義善男子若此菩薩於衆會中處師子座其座量高一俱盧舍以師子王威力所持衆寶嚴飾如是或復半由旬量一由旬量千由旬量或復量等須彌山王或復其量高至梵天隨諸衆生心之所樂令其各見身座大小而爲說法正說法時十方諸佛悉現其前爲此菩薩演說妙法菩薩聞已即能以此陀羅尼力一時聽聞總持不忘深入義理現證相應身心怡暢一一法中成一境性一字句聞無所聞即於如是聽聞法時而常演說無有障礙若諸菩薩深入如是一字聲聞一切諸法悉入此門即從此門出生演說一切諸法且初第一說上聲短呼下同娑字門出生無邊

無數法門所謂姪字者一切法無來以一切法體無來故又姪字者一切法無去以一切法體無去故又姪字者一切法無行體無行故又姪字者一切法無住體無住故又姪字者一切法無本性體本清淨故又姪字者一切法無根本體初未生故又姪字者一切法無終體無初故又姪字者一切法無盡體無去處故又姪字者一切法無生體無行故又姪字者一切法無出體無作者故又姪字者一切法無求體無相故又姪字者一切法無礙體相涉入故又姪字者一切法無滅體無主宰故又姪字者一切法無行處體無願故又姪字者一切法無生死體離分別無分別故又姪字者一切法無言說體極聲入故又姪字者一切法不可說體無聲故又姪字者

一切法無差別體無處所故又姪字者一切法無分別體清淨故又姪字者一切法無心意體不可求故又姪字者一切法無高下體本平等故又姪字者一切法不可解體如虛空故又姪字者一切法不可說體過言道故又姪字者一切法無限量體無處所故又姪字者一切法無生體無生處故又姪字者一切法無本淨體本無相故又姪字者一切法無我體即我性故又姪字者一切法無衆生體本清淨故又姪字者一切法無壽者體無命根故又姪字者一切法無補特伽羅體離所取故又姪字者一切法無本空體性寂靜故又姪字者一切法無相體實無際故又姪字者一切法無和合體性無生故又姪字者一切法無行體本無爲故又姪字者一切法

無爲體過行無行故又姪字者一切法不共
體無能解人故又姪字者一切法無聚會體
無積集故又姪字者一切法無出體無出處
故又姪字者一切法無本性體本無身故又
姪字者一切法無相體相本淨故又姪字者
一切法無業體無作者故又姪字者一切法
無果體無業道故又姪字者一切法無種植
體無種子故又姪字者一切法無境界體不
可取故又姪字者一切法無地界體無諸結
故又姪字者一切法無縛體本散滅故又姪
字者一切法無聚散體本無爲故又姪字者
一切法無漏體或不生故又姪字者一切法
無自生體初無生故又姪字者一切法無濁
體無有對故又姪字者一切法無對體本無
作故又姪字者一切法無色體無大種故又

簡

十一

姪字者一切法無受體無受者故又姪字者
一切法無想體過諸相故又姪字者一切法
無行體離有愛故又姪字者一切法無識體
無分別故又姪字者一切法無界體空平等
故又姪字者一切法無入體過境界門故又
姪字者一切法無境界體無去處故又姪字
者一切法無欲體離分別故又姪字者一切
法無色體無根本故又姪字者一切法無無
色體難思見故又姪字者一切法無亂體無
可亂故又姪字者一切法不思議體不可得
故又姪字者一切法無意體本無二故又姪
字者一切法不可執受體過境界道故又姪
字者一切法無阿賴耶體無因緣故又姪字
者一切法無常體本無因故又姪字者一切
法無斷體不礙因故又姪字者一切法無名

體無相貌故又阿字者一切法無雜體不相入故又阿字者一切法無住體無住處故又阿字者一切法無熱惱體無煩惱故又阿字者一切法無憂惱體無惡業故又阿字者一切法無習氣體本無垢故又阿字者一切法無垢體本清淨故又阿字者一切法無本清淨體無形質故又阿字者一切法無體體無依止故又阿字者一切法無依止體無動作故又阿字者一切法無動體離執著故又阿字者一切法無障礙體同虛空故又阿字者一切法同虛空體無分別故又阿字者一切法無色根體無境界因故又阿字者一切法無顯示體皆相似故又阿字者一切法無相似體無境界故又阿字者一切法無境界體如虛空常平等故又阿字者一切無聞體無

續二

十二

明故又阿字者一切法無明體無對故又阿字者一切法無過體妙善故又阿字者一切法無是體無妄故又阿字者一切法無聞解體無動故又阿字者一切法無見體無色故又阿字者一切法無聞體無聲故又阿字者一切法無麤體無香故又阿字者一切法無當體無味故又阿字者一切法無觸體無所觸故又阿字者一切法無知體本無法故又阿字者一切法無念體離心意識故又阿字者一切法不思議體性菩提平等平等無高下故又阿字者一切法寂靜體本不生亦不滅故善男子菩薩如是得此大聲清淨陀羅尼門入第一阿字時演說諸法或經一年或復十年百年千年或百千年或一小劫或一大劫乃至無量無數大劫說此法時不離阿

字如說姪字義無有盡說餘諸字亦復如是不可窮盡如是建立開示法眼其義深遠其語巧妙具足清白又善男子菩薩住此陀羅尼故得身清淨威儀寂靜故得語清淨辯才無礙故得意清淨慈悲觀察故得施清淨財十三法無悵隨喜作施故得戒清淨無破無穿無缺漏故得忍清淨無怨無對無障礙故得勤清淨於妙事業無退轉故得禪清淨無著無慢亦無味故得慧清淨開智慧眼決癡膜故得業清淨普修一切勝善業故得眼清淨天眼遠見一切色故得耳清淨天耳遠聞諸佛法故得鼻清淨普興如來淨戒香故得舌清淨獲得隨心清淨味故得身清淨雖現處胞胎不染故得意清淨善能分別微細法故得色清淨所有色相妙莊嚴故得聲清淨所聞

皆是順法聲故得香清淨施戒聞香之所薰故得味清淨獲大丈夫上味相故得觸清淨身手所觸妙柔輒故得法清淨所知皆獲法明門故得念清淨所聞憶持無疑忘故得心清淨超越一切魔境界故得行清淨出過所解甚深法故善男子菩薩得此最勝不共大聲清淨陀羅尼故大聲普徧十方世界光明普照爲彼一切世界衆生分別演說一切如來所說妙法令彼一切法眼開明善男子我今略說大聲清淨陀羅尼門初入次第一門之中少分之德若廣說者復有無數無量無邊不可說義如說於此一姪字門無量無邊不可窮盡餘一字亦復如是皆以無著智慧之門漸漸修入復次善男子云何名爲無盡寶篋陀羅尼門善男子謂一字中說一切

法皆無窮盡何等一切法無有窮盡所謂說色無盡故如是說色無常無盡故說色是苦無盡故說色無我無盡故說色寂滅無盡故說色寂靜無盡故說色如聚沫無盡故說色如幻無盡故說色如燄無盡故說色如水中

第二

十四

月無盡故說色如夢無盡故說色如響無盡故說色如鏡中像無盡故說色無本性無盡故說色本無無盡故說色無緣會無盡故說色空門無盡故說色無相無盡故說色無願無盡故說色無行無盡故說色生法無盡故說色無生無盡故說色前際無盡故說色中際無盡故說色後際無盡故說色寂滅無盡故說色親近寂靜無盡故說色無心行處無盡故說色無言語道斷無盡故說色不可思議無盡故說色不可度量無盡故說色無我

無盡故說色無衆生無盡故說色無壽者無盡故說色無養育者無盡故說色無補特伽羅無盡故說色無知無盡故說色無造作無盡故說色如草木瓦礫石壁無盡故說色無求得無盡故說色大種所生無盡故說色無聲無盡故說色無表無盡故說色不可說無盡故說色本味清淨無盡故說色從因緣生無盡故說色無斷無盡故說色無常無盡故說色無造者無盡故說色無受者無盡故說色無業果無盡故說色法界平等無盡故說色住真如無盡故說色住實際無盡故說色無我所無盡故說色無主宰無盡故說色無執受無盡故說色不可思無盡故說色不可稱無盡故說色不可量無盡故說色無有邊無盡故說色即菩提性無盡故說色如空平

第二

十五

等無盡故說色即涅槃性無盡故如是廣說
界處等法名句文身一切佛法皆悉入於此
一字聲智慧之門如以四大同一身篋此亦
如是一字聲門包攝出生無盡智實甚深法
門是故名爲無盡寶篋我上略說此一門中
少分之義如地一塵若廣說者無量無邊阿
僧祇劫不可窮盡復次善男子云何名爲無
邊漩復陀羅尼門善男子所言邊者謂斷及
常十二因緣無明緣行行緣識識緣名色名
色緣六入六入緣觸觸緣受受緣愛愛緣取
取緣有有緣生生緣老死憂悲苦惱言無邊
者即祕密界無斷常等趣入甚深名爲漩復
是故名爲無邊漩復陀羅尼門又復邊者說
名取捨所言漩者說不取捨故又復邊者說
有生滅漩者說無生滅故又復邊者煩惱生

死漩者本性清淨故邊者有相無相漩者都
無所行故邊者麤細思惟漩者無尋無伺故
邊者因及諸見漩者智了因見故邊者謂名
及色漩者無有表示故邊者有爲無爲漩者
三輪清淨故邊者說內及外漩者識體無住
故邊者謂業及果漩者無業果體故邊者善
及不善漩者無有行體故邊者過及無過漩
者體無有二故邊者謂業煩惱漩者體性光
明故邊者我及無我漩者體性清淨故邊者
生死涅槃漩者謂法本性即涅槃故善男子
如是略說若廣說者說邊有無量門說漩亦
無量門若諸菩薩住此漩復陀羅尼門隨順
無邊一切深法智無窮盡或字或義亦無窮
盡漸次趣入無邊漩復陀羅尼門以能隨順
智光明故隨順覺性本清淨故開智慧眼決

癡膜故隨順解脫覺體性故

守護國界主陀羅尼經卷第二

音釋

[illegible]

守護國界主陀羅尼經卷第三

蘭三

唐 尉 賓 國 三 藏 般 若 等 譯

陀羅尼品第二之三

復次善男子何等名爲海印陀羅尼門善男

子如大海水印現一切謂四天下所有色相

或衆生色相或非衆生色相山澤原阜樹木

叢林藥草百穀日月星辰摩尼雲電村營聚

落城邑王都及與諸天男女宮殿一切資具

香林池沼渠河泉流綺麗嚴飾如是等類上

中下品一切色相於大海中平等印現故說

大海爲第一印最勝妙印希奇殊特無等無

過菩薩摩訶薩亦復如是住此海印甚深三

昧得與一切衆生身平等印得與衆生語平

等印得與衆生心平等印十方世界諸佛語

業轉妙法輪菩薩皆從海印所流於口門中

平等演說隨有所說皆與諸佛法印無違亦

無疑惑能令法界一切衆生皆悉悟解故說

此印諸印中上所謂^{上聲}阿^{短呼}字印者以一切

法性無生故囉字印者以一切法無染著故

跋字印者勝義諦門不可得故者字印者眼

及諸行皆清淨故娜字印者名色性相不可

得故攤字印者愛支因緣連續不斷皆不現

故拏^{上聲}字印者悟入清淨十力門故麼字印

者力菩提分皆清淨故拏^{上聲}字印者離諸

冤敵及憂惱故灑字印者六通圓滿無罣礙

故嚩字印者不二之道言語斷故多^{上聲}字印

者悟一切法真實義故也字印者稱如實理

而演說故瑟吒^{二合}字印者制伏任持不可得

故迦^{上聲}字印者遠離世論無作者故娑^{上聲}字

印者悟四真諦皆平等故莽^{輕呼}字印者悟一

切法清淨道故識字印者入甚深法無行取

故娑佗

上聲二合

字印者顯示勢力不可得故惹

字印者超過老死能所生故濕嚕

二合字印者

煩惱所行皆遠離故駄字印者法界體性不

雜亂故捨字印者入深止觀皆滿足故佉字

印者悟如虛空無盡法故乞叉

二合

字印者入

於盡智無生智故娑

上聲

多也阿

四合

字印者遠

離昏沉懈怠障故枳椇

二合

字印者一切衆生

智慧體故賀字印者摧惡進善體皆離故婆

上聲

字印者慣習觀察覺悟體故者禰

上聲

字

印者遠離貪瞋癡覆性故娑莽

二合

字印者

念不散動無忘失故訶娑

上聲

字印者可以

呼召請命體故娑哆

二合

字印者勇猛驅逐諸

惑體故伽

上聲

字印者散滅重雲無明翳故姹

字印者積集諸行窮盡體故波囉

二合

字印者

隨順最勝寂照體故頗字印者周徧圓滿果

報體故娑迦

上聲

字印者悟解一切蘊聚體

故也娑

上聲

字印者能除老死一切病故室者

二合

字印者現前覺悟未來有情故吒

上聲

字印

者斷生死道得涅槃故瑟姹

二合

字印者悟解

無邊無盡體故善男子菩薩以如是等種種

法相分別演說諸字印門善男子是名深入

海印三昧陀羅尼門復次善男子云何名爲

蓮華莊嚴陀羅尼門善男子菩薩住此陀羅

尼門隨彼無量大會之中說妙法時即有廣

大妙蓮華座

三合

現其前種種色相殊妙莊嚴

其有見者情無厭足此座纔現身便安處即

於空中雨衆寶華種種華中出種種聲種種

聲中說種種法所謂或說甚深無量法或說

善巧名句法或說種種譬喻門如是或說修

多羅祇夜和伽羅那伽佉搃陀那尼陀那本
事本生方廣希法優波提舍說如是等十二
分教及種種門皆爲斷除一切衆生諸煩惱
故而菩薩心安住大捨寂然正受即能等引
如是音聲說法不斷滅衆生苦作諸佛事又
於菩薩徧身毛孔出種種光一一光中出生
種種妙寶蓮華一一華上有一菩薩徧徃十
方無量無邊諸世界中而作佛事是爲初入
蓮華莊嚴陀羅尼門若廣說者不可窮盡復
次善男子云何名爲能入無著陀羅尼門善
男子菩薩住此陀羅尼門於一法門心無所
著如是若二若三若十若百若干若百千若
俱胝若那由他乃至阿僧祇無量無邊無等
不可數不可稱不可思不可量不可說法門
皆心平等而無所著或恒河沙法門亦皆平

等心無所著如是閻浮提微塵數法門四天
下微塵數法門三千大千世界微塵數法門
亦無所著若一佛刹若干佛刹若百若干若
恆河沙佛刹微塵數法門乃至一切佛刹微
塵數法門亦皆平等心無所著若說一門攝
如上說一切佛刹微塵數法門皆入一門一時
演說如於一門若二若三乃至無量無邊法
門亦皆如是一一門中攝一切門一時演說
如是說時心無所著亦無所住利益安樂一
切衆生其義深遠稱如實理次第無亂文義
具足善男子是名能入無著陀羅尼門復次
善男子云何名爲漸漸深入四無礙智陀羅
尼門善男子若諸菩薩安住於此陀羅尼門
得微細差別法門無盡智得微細甚深義門
無盡智得微細詞門無盡智得微細辯無盡

智得是智故東方所有一切衆生同一道場
各隨類音善巧方便而問其法南方所有一
切衆生同一道場各隨類音善巧方便而問
其義西方所有一切衆生同一道場各隨類
音善巧方便而問其詞北方所有一切衆生
同一道場各隨類音善巧方便而問其辯如
是四方一切衆生一時發問種種法門菩薩
一念悉能領受心無錯亂明記無失於一語
業出種種音一一音聲說一切法隨諸衆生
種類不同所樂各異皆得領解踊躍歡喜心
願滿足善男子是爲菩薩漸漸深入四無礙
智陀羅尼門復次善男子云何名爲諸佛護
持莊嚴陀羅尼門善男子菩薩得此陀羅尼
故於大會中處大法座於其肉髻最處中心
頂骨交際忽現如來身鎔金色相好莊嚴而

隨三

五

以右手摩菩薩頂即時菩薩便得色身相好
莊嚴具足圓滿與佛平等又得如來語業莊
嚴具足圓滿又得如來意業莊嚴具足圓滿
得如是等種種佛法具足圓滿既得是已隨
此大會一切衆生心界不同欲樂差別所疑
有異說種種法或一日夜或二或三半月一
月一年百年或百千年隨其心樂久近多少
常說妙法無有窮盡如是說時不飲不食不
羸不瘦身心無倦以是如來威德護持難思
力故菩薩又得四種大智云何爲四所謂微
細了知衆生心行各差別智微細分別諸法
無窮盡智善能分別三乘修行諸次第智具
足圓滿隨順堪任演說法智善男子若是略
說諸佛護持莊嚴陀羅尼門若廣說者無量
無邊等虛空界無有窮盡與如來等皆爲利

益諸衆生故善男子是爲八種陀羅尼門若有菩薩安住此八陀羅尼門則能總持一切如來及諸菩薩所說妙法今諸菩薩辯才無盡一切衆生若有聞者愛樂歡喜情無厭足爾時一切法自在王菩薩聞此法已心懷踊躍以偈讚曰

善逝說八總持法 決定令得微妙乘
演百千億修多羅 於義及文無所著
大聲清淨無邊際 百千無量刹皆聞
能成衆生寂靜心 是名大聲清淨義
一字演說一切法 多劫無有窮盡時
一字門亦復然 此住寶篋真言地
遠離諸邊得清淨 平等無著同如來
剎那正念煩惱除 是名法義漩復處
四天下中諸色相 大海印現並無遺

三

六

說此無思無盡門 是名海印真言德
具大人相處大衆 坐蓮華座雨天華
華演俱胝妙法門 蓮華莊嚴總持用
入一句法無所著 億刹微塵句亦然
句句演暢難思門 無著總持皆自在
具足法義及詞辯 四方衆生齊啓疑
自他疑網皆斷除 此是四辯總持力
菩薩昇於大法座 頂上現佛如金山
即舒右手相端嚴 殷重摩於菩薩頂
獲微妙辯同於佛 此名護念佛莊嚴
得入最勝總持門 便獲難思無盡德
如蓮不染於三界 五塵不動等須彌
得此最勝陀羅尼 無等智超三界轉
能師子吼無所畏 摧諸外道碎邪山
得此最勝陀羅尼 遠離受生諸業果

如地生長諸善法

如水滌垢淨無餘

如火焚燒不擇薪

如風飄鼓無所住

如醫善知於藥法

除衆生病得安寧

得此最勝陀羅尼

智演諸法無傾動

如月圓明淨無點

流光普照等無私

得此最勝陀羅尼

衆會見者無厭足

如日光輪平等照

破生死闇覺群迷

得此最勝陀羅尼

能除有情諸渴愛

如轉輪王教十善

如毗沙門富法財

得此最勝陀羅尼

慈念衆生降法雨

如龍興雲現威德

震雷曜電並無思

得此最勝陀羅尼

寂靜無心無執著

莊嚴微妙如帝釋

大智隨機演法門

得此最勝陀羅尼

猶如牛王處大衆

如大梵王住慈定

徧觀世界盡超過

得此最勝陀羅尼

常得五通無退轉

徧遊法界難思刹

如梵天王徧梵宮

得此最勝陀羅尼

供養十方諸佛海

諸佛共觀如長子

同時稱讚德難思

得此最勝陀羅尼

不久獲佛諸功德

辯才廣博無窮盡

演說深廣修多羅

得此最勝陀羅尼

妙辯如髮無斷絕

智慧聰利無妄念

無邊方便同虛空

得此最勝陀羅尼

憍慢諂詐皆除斷

定慧雙流無斷絕

慈悲俱起不相離

得此最勝陀羅尼

永斷世間諸過失

善知衆生語言法

心行根欲悉無餘

得此最勝陀羅尼

說法纖毫無誤失

念處正斷及神足

根力覺道定皆圓

得此最勝陀羅尼

便獲殊妙淨法智

隨順諸度到彼岸 通達四攝無有餘
得此最勝陀羅尼 能知善逝諸境界
自然近佛深寂靜 建立萬行調眾生
得此最勝陀羅尼 於一切時無錯亂
獲得無垢蘊界入 處胎不染不無知
得此最勝陀羅尼 三 見佛如蓮心不著
三業恒隨智慧轉 動寂無礙利眾生
得此最勝陀羅尼 說法常蒙諸佛護
大智能作眾生主 多劫讚歎不能窮
爾時世尊稱讚一切法自在王菩薩言善哉
善哉善男子汝能讚說此陀羅尼如諸佛說
等無有異我今隨喜善男子今此會中有六
十一那由他出家菩薩及與無數百千萬億
在家菩薩聞此陀羅尼門皆得無生法忍無
量天龍夜叉乾闥婆阿脩羅迦樓羅緊那羅

摩睺羅伽人非人比丘比丘尼優婆塞優婆
夷等皆於阿耨多羅三藐三菩提得不退轉
大悲胎藏出生品第三
爾時文殊師利菩薩摩訶薩即從座起偏袒
右肩右膝著地爲佛作禮合掌恭敬而白佛
言世尊如佛所說心及虛空陀羅尼菩提無
二無別皆以大悲爲其根者而此大悲復以
何法而爲根本佛告文殊師利菩薩言善哉
善哉善男子快發斯問爲欲利樂多眾生故
諦聽諦聽善思念之吾當爲汝分別解說善
男子此大悲根復以眾生受苦爲本文殊師
利復白佛言世尊眾生受苦復以何法而爲
其本佛言從煩惱生又問煩惱以何爲本佛
言從於種種顛倒邪見而生又問種種顛倒
邪見以何爲本佛言從虛妄分別生又問虛

妄分別以何爲本佛言此妄分別非有根本
無有色相難知難斷善男子以是義故菩薩
摩訶薩爲諸衆生起大悲心勞謙忘倦譬如
甘蔗及以胡麻以物壓之漿油便現菩薩亦
爾大悲深重復起十六大悲之心作是念言
嗚呼苦哉一切衆生常爲身見之所繫縛種
種邪見以爲窟宅我當爲彼演說妙法悉令
除斷嗚呼苦哉一切衆生於斷於常執著建
立文殊師利白佛言世尊云何名爲斷見常
見佛言善男子言斷見者布施供養皆無果
報善行惡行此世後世皆無有果父母變化
皆悉斷無何以故譬如燒木已成寒灰終無
生理是名斷見言常見者王常爲王貴常爲
貴貧富男女端正醜陋象馬等類常無改易
何以故譬如種子隨其本類各別生芽終無

雜亂善男子此等衆生作如是見皆無果報
菩薩爲彼起大悲心開示演說緣起之門令
其信入因緣果報菩薩復念嗚呼苦哉一切
衆生起四顛倒無常計常無樂計樂無我計
我無淨計淨我當爲彼說甚深法令除顛倒
嗚呼苦哉一切衆生於其無我無我所中計
我我所我當爲說微妙之法令其除斷我我
所見嗚呼苦哉一切衆生爲諸蓋障之所覆
蔽貪箭中心瞋火熾盛身心俱焚昏沉睡眠
之所迷醉掉舉惡作纏繞不捨於甚深法常
懷疑惑我當爲說微妙之法令其墮裂諸蓋
之網嗚呼苦哉一切衆生戀著六處眼纔見
色隨色名相而生執著耳聞音聲鼻嗅香臭
舌嘗滋味身觸細滑意分別法皆隨名相而
生執著我當爲說深妙之法令不樂著六處

空聚嗚呼苦哉一切衆生多起諸慢謂慢過慢及慢過慢我慢增上慢卑慢邪慢云何爲慢爲於下劣衆生計我勝彼言過慢者於已等者言我過彼慢過慢者於他勝已計我勝彼言我慢者於色計我乃至於識亦計於我今心高舉言增上慢者增上聖法曾未獲得向他人說我得聖法言卑慢者於彼多分勝已之人言我少劣言邪慢者於已邪見無德之中爲已爲正翻詔他人以之爲邪如是等慢我當爲彼說甚深法令其除斷住於平等嗚呼苦哉一切衆生趣向邪道遠離聖道我當爲說正道之法今遠邪徑嗚呼苦哉一切衆生爲恩愛奴受其驅策妻妾男女以爲枷鎖枷械繫縛染著耽味不能捨離令身口意不得自在我當爲彼說離貪法令其三業動

續三

十一

止無羈嗚呼苦哉一切衆生更相聞諍瞋恚結恨互爲怨讎當爲說法令其除斷嗚呼苦哉一切衆生遠善知識隨逐惡友不相捨離如指與甲和合相依造諸惡業無暫休息當爲說法令捨惡友近善知識嗚呼苦哉一切衆生貪求名利無有厭足如海吞流得之彌盛如火益薪遠離無垢實相智慧我當爲說真實之法令斷名利獲清淨智嗚呼苦哉一切衆生無明黑闇無我法中橫起我見衆生壽命補特伽羅當爲說法斷除如是種種邪見今去翳膜開淨智眼嗚呼苦哉一切衆生生死牢獄輪迴禁繫五蘊怨賊之所殺害當爲說法令出三界嗚呼苦哉一切衆生爲魔網索之所繫縛五欲纏繞不得出離我當爲說超魔之法令絕魔網斷五欲纏嗚呼苦哉

一切衆生閉涅槃門開生死路當爲說法令
閉三惡入涅槃門善男子是爲菩薩摩訶薩
起十六種大悲之心爾時世尊復告文殊師
利童子菩薩言善男子此大悲門即是一切
菩薩之母菩薩住是大悲之中即能建立三
十二種不共事業日夜勤修速得圓滿云何
名爲三十二種不共事業所謂菩薩若見一
切愚癡重闇長眠大夜無智衆生便以智慧
先自覺察復以智慧覺悟一切愚癡衆生是
名菩薩第一不共事業若見衆生愛樂二乘
其心狹劣菩薩便起廣大之心令其安住大
乘法中是名菩薩第二不共事業若見衆生
愛樂非法縱恣三業無善法欲菩薩自住正
法園苑復令衆生住正法中是名菩薩第三
不共事業若見衆生邪命自活矯詐貪求先

第三

十二

以自身住於正命復令衆生安住正命清淨
法中是名菩薩第四不共事業若見衆生撥
無因果及一切法起大邪見自住正見復令
衆生安住無垢正見法中是名菩薩第五不
共事業若見衆生無知惡念積集煩惱自以
智眼安心正念復令衆生住於正念破無知
闇開智慧明是名菩薩第六不共事業若見
衆生棄捨正法住不正法先以安住正法之
中復令衆生解了正法是名菩薩第七不共
事業若見衆生慳吝所覆菩薩自身起無慳
心一切皆捨復令衆生勤修捨行是名菩薩
第八不共事業若見衆生毀犯淨戒於表無
表不能遵行便以淨戒莊嚴其身復令衆生
堅持淨戒是名菩薩第九不共事業若見衆
生瞋恨熾然蘊積諸惡以慈忍力而自莊嚴

復令衆生安住此法。是名菩薩第十不共事業。若見衆生身心懈怠。遠離精進。自以精進甲冑嚴身。復令衆生捨懈怠。心勤勇不墮。是名菩薩第十一不共事業。若見衆生散亂。妄念。菩薩自住三摩呬哆寂靜。觀察亦令衆生

十三

十三

捨亂住定。是名菩薩第十二不共事業。若見衆生惡慧無智。便以智慧而自莊嚴。復令衆生捨離惡慧。具足般若波羅蜜。多是名菩薩第十三不共事業。若見衆生非理作意。行於邪道。菩薩即以善巧方便。如理思惟。亦令衆生捨於非理。安住正道。是名菩薩第十四不共事業。若見衆生昏亂無知。煩惱所害。菩薩自住隨念分別種種分別微細分別一切境界。遠離煩惱。復令衆生斷除煩惱。住正法中。是名菩薩第十五不共事業。若見衆生身見

有見牢獄所繫。而以智慧了達自身。不爲見縛。復令衆生遠離身見。不計於有住正智慧。是名菩薩第十六不共事業。若見衆生諸根縱蕩。馳流境界。不能制伏。而自柔和。心無放逸。復令衆生安住律儀。善守根門。三業調順。是名菩薩第十七不共事業。若見衆生無慙。無愧。不知恩報。斷滅善根。便以慚愧而自莊嚴。知恩知報。修諸善根。復爲衆生說法。開示令具慙愧。能知恩德。圓滿善根。是名菩薩十八不共事業。若見衆生爲大瀑水波浪所沒。隨業漂溺。不能勉出。菩薩自現越渡瀑流。到於彼岸。復令衆生斷除惡業。越生死流。到涅槃岸。是名菩薩第十九不共事業。若見衆生剛彊難化。而以自身謙卑。仁讓承順。師長復令衆生安住謙敬。是名菩薩第二十不共事

業若見衆生心懷嫉妬於修善者多生障礙
便以善根自嚴其身復令衆生捨離猜忌障
礙之心安住正法是名菩薩第二十一不共
事業若見衆生貧窮困苦復無法財菩薩示
有資生無量具七聖財復令衆生無所乏少

蘭三

十四

住聖財中是名菩薩第二十二不共事業若
見衆生長嬰病苦四大毒蛇互相違反傷害
身心菩薩即以無病功德而自莊嚴復置衆
生無諸病惱安樂法中是名菩薩第二十三
不共事業若見衆生愚癡無智遠智光明菩
薩便以智慧光明自嚴其身復令衆生安住
無癡智慧法中是名菩薩第二十四不共事
業若見衆生樂著三界穢惡深坑輪迴五道
菩薩巧能自出三界復以善巧出三界道運
諸衆生是名菩薩第二十五不共事業若見

衆生違背正道行於邪徑自安正法復令衆
生住正法中是名菩薩第二十六不共事業
若見衆生愛著身命嚴飾資養冀其長存不
知此身無常不淨無有慚愧不知恩德菩薩
便現厭惡自身棄捨榮好復令衆生觀察無
常生厭離想是名菩薩第二十七不共事業
若見衆生遠佛法僧菩薩自身紹三寶種復
令衆生紹佛法僧使不斷絕是名菩薩第二
十八不共事業若見衆生退失善法菩薩便
以善法嚴身復令衆生住善法中是名菩薩
第二十九不共事業若見衆生遠離師長不
行六念菩薩則以六念自嚴復令衆生常修
六念如實觀智是名菩薩第三十不共事業
若見衆生業煩惱網之所縈覆菩薩便現裂
業感網亦令衆生絕生死因安住正法是名

蘭三

十五

菩薩三十一不共事業若見衆生具諸不善
遠離善根菩薩便自蠲除諸惡具善莊嚴復
令衆生具足善根遠離不善是名菩薩第三
十二不共事業善男子是爲菩薩三十二種
不共事業若諸菩薩安住此業一切善法恒
自增長具足圓滿復次善男子菩薩復有無
量事業何以故謂衆生無邊衆生煩惱亦復
如是無量無邊菩薩隨彼一切衆生煩惱差
別亦說無邊解脫法門善男子假使恒河沙
數世界滿中衆生所有之行或聲聞行或緣
覺行所有事業比此菩薩最初所發菩提之
心所有事業百分不及一千分不及一如是
百千分俱胝分百俱胝分千俱胝分算分歌
羅分數分喻分優波尼沙阤分皆不及一何
以故二乘自爲斷除煩惱菩薩事業不爲自

身普爲除斷一切衆生諸煩惱故是故菩薩
所有事業比於二乘最爲殊勝所得功德無
量無邊何以故凡夫衆生所修事業皆與一
切顛倒相應二乘所作其心狹劣菩薩事業
遠離顛倒無量無邊是故菩薩所得功德亦
復如是無量無邊以是義故超過一切凡夫
二乘爾時文殊師利菩薩聞是法已踊躍歡
喜徧身怡暢心得清涼而作是言希有世尊
希有世尊善能分別甚深微妙菩薩種種陀
羅尼門大悲之門及與不共事業之門我聞
佛說歡喜頂受如法奉行

爾三

十六

守護國界主陀羅尼經卷第三

音釋

也切 攞 勤可
繞切 枳 檳
人向切 檳
陀 音
施 陀
切 丑
亞
紫
平

守護國界主陀羅尼經卷第四

蘭四

唐 罽賓國三藏般若等 譯

入如來大悲不思議品第四

爾時文殊師利童子即從座起偏袒右肩右膝著地合掌恭敬而白佛言世尊惟願如來

隨四

應正等覺爲我宣說諸佛如來於諸衆生大悲隨轉世尊如來大悲爲有幾種以何爲相以何爲因以何爲緣爲何所住善哉世尊惟願爲我具足宣說及說如來一切智智現證事業爾時佛告文殊師利童子言善哉善哉善男子善能諮問如是深義諦聽諦聽善思念之吾當爲汝分別解說諸佛如來大悲海門一滴之相善男子一切如來於諸衆生所有大悲不生不滅何以故如來大悲常恒不斷無時不轉已於無量阿僧祇劫積集圓滿

諸功德故無去無來常恒不捨一切衆生皆悉護念而攝受故如來大悲無量無邊無有窮盡甚深甚深不可思議堅固猛利難解難入非是語言所能宣說何以故善男子譬如如來得大菩提於諸衆生起大悲心亦復如是云何如來得於菩提善男子佛得菩提無有根本無有住處云何根本云何住處身見爲根本妄想爲住處而身見妄想及與菩提平等平等故說菩提無有根本無有住處依於此義佛得菩提一切衆生不覺不知無有根本無有住處爲欲令其如實覺悟是故如來普緣衆生而起大悲復次善男子菩提寂靜親近寂靜言寂靜者即是於內親近寂靜即是於外何以故眼空我空我所亦空性如是故名爲寂靜耳空鼻空舌空身空意空我

空我所亦空性如是故名爲寂靜由眼空故不行色境是故名爲親近寂靜由耳鼻舌身意空故不行聲香味觸法境是故名爲親近寂靜如是寂靜親近寂靜衆生不知欲令其知是故如來於諸衆生大悲隨轉復次善男

隨四

二

子菩提本性清淨光明何以故心之實性本清淨故云何清淨性無合故猶如虛空性清淨故亦如虛空無有相故亦如虛空性平等故是故菩提名爲最極清淨光明此淨光明童蒙凡夫不能覺知客塵煩惱之所覆故欲令衆生如實覺悟是故如來於諸衆生大悲隨轉復次善男子菩提無取捨何以故捨生死岸橫截瀑流至於彼岸名爲取捨如來深入第一義諦不見此岸不見彼岸以一切法無彼此故是故菩提無有取捨凡夫不知無

取無捨欲令其知是故如來於諸衆生大悲隨轉復次善男子菩提無相亦無觀察云何無相所謂眼識不可得故云何名爲無有觀察眼識於色無分別故如是耳識不可得名爲無相耳識於聲不分別故名爲無觀察鼻識不可得故名爲無相鼻識於香不分別故名爲無觀察舌識不可得故名爲無相舌識於味不分別故名爲無觀察身識不可得故名爲無相身識於觸不分別故名爲無觀察意識不可得故名爲無相意識於法不分別故名爲無觀察如是無相無有觀察是聖者境出過三界故非凡小之所能知爲欲令其如實知覺是故如來於諸衆生大悲隨轉復次善男子菩提非過去非現在非未來故三際平等斷絕三輪云何名爲斷絕三輪於彼過去心不

隨四

三

起故於彼未來識不行故於此現在意不作
故此心意識無有住處云何名爲三際平等
過去之事不可思量未來之識不可宣示現
在之意不可說故如是甚深三際平等三輪
清淨衆生不知爲欲令其如實覺悟是故如
來於諸衆生大悲隨轉復次善男子菩提無
身菩提無爲云何無身所謂眼識不可知故
如是耳鼻舌身意識不可知故云何無爲無
生無滅亦無住故故說無爲遠離三相如無
爲相有爲之相亦復如是何以故一切諸法
性如是故無性之性此性不無此二無二是
菩提性如是無身及無爲相童蒙凡夫不覺
不知欲令知覺是故如來於諸衆生大悲隨
轉復次善男子菩提不可壞無所證跡云何
所證及不可壞所謂真如是所證跡由無住

處故不可壞法界是所證由無種種故不可
壞實際是所證由不可動故不可壞空門是
所證由不可得故不可壞無相是所證由無
分別故不可壞無願是所證由不可求故不
可壞無衆生是所證由無本性故不可壞虛
空是所證由不可取故不可壞無生是所證
由無有滅故不可壞無爲是所證由無諸行
故不可壞菩提是所證由於寂靜親近寂靜
故不可壞涅槃是所證由本無生故不可壞
如是所證跡及不可壞衆生不知欲令覺悟
是故如來於諸衆生大悲隨轉復次善男子
菩提不可以身得不可以心得何以故身無
知故心如幻故如是正知名得菩提隨順世
諦說有菩提當知菩提體不可得無能說者
於何不可得若身若心若理非理若無若有

若實若虛皆不可得云何不可說一切諸法種種方便無能顯說此菩提故無有少分而住於法以無住故非是文字言說境界譬如虛空無有住處不可宣說菩提亦爾無住無說如來如是如實觀察一切諸法皆不可說何以故一切法中無有語言諸語言中亦無法故如此妙法一切衆生不覺不知欲令覺知是故如來於諸衆生大悲隨轉復次善男子菩提不可取無有依處云何不可取云何無依處如來如實知見法故所謂眼不可得故不可取色不可得故無依處耳不可得故不可取聲不可得故無依處鼻不可得故不可取香不可得故無依處舌不可得故不可取味不可得故無依處身不可得故不可取觸不可得故無依處意不可得故不可取法

前四

五

不可得故無依處如來如是無取無依故於菩提現正等覺由眼無取色無依處故識無所依由耳無取聲無依處故識無所依由鼻無取香無依處故識無所依由舌無取味無依處故識無所依由身無取觸無依處故識無所依由意無取法無依處故識無所依由無所依故識無住處一切衆生虛妄橫執識有住處云何衆生識心住處此有四種所謂色蘊受想行蘊即是衆生識之住處如來了知衆生住處即無住處窮無住際一切衆生不覺不知欲令覺知是故如來於諸衆生大悲隨轉復次善男子言菩提者名體性空由體空故則菩提空由體空故一切法空如來如是如其體空於一切法現正等覺以是義故不以空覺而覺於空此即名一三菩提智

謂若空若菩提少分無二空與菩提不可分別與一切法亦復如是無二無二相審諦觀察一切諸法無名無相無有能行亦無所行無所趣向無言無說無執無取是名爲空第一義中空亦叵得但有言說如說虛空但有空言空非言境如是說空名不可說是名爲入一切法門謂一切法無有名字於無名中強以名說如是名字於一切法無有住處何以故依一切相假立其名相本性空名依何立如來如是以如實智知一切法此云何知知從本來不生不出不起不滅無障無礙無相無爲離心意識無有名字無有音聲如是知見而得解脫如是解脫不縛不解何以故性平等故而諸凡夫不覺不知欲令於彼如實知覺是故如來於諸衆生大悲隨轉復次

前四

*

善男子菩提虛空平等平等而其虛空無等無不等菩提亦爾無等不等何以故諸法如實無生無滅故一切法無等不等如來如是如實知見無等不等故於諸法現等正覺是故於中無有少法說等不等於一切法如實而知當云何知知一切法無有根本無生無滅一切諸法本無今有已有還無彼無生者亦無滅者如是生滅從因緣生從因緣轉此中無有少法可轉如來爲斷生死長遠危險道故故說如是如實之法一切衆生不覺不知斷生死道亦復不知法性平等及不平等欲令於彼如實知覺是故如來於諸衆生大悲隨轉復次善男子菩提所證即是如如如菩提如色亦如是於第一義不即不離如菩提如於受想行識如亦不即不離如菩提如

於地界如水火風界如亦不即不離如菩提
如於眼界色界眼識界如亦不即不離如菩
提如於耳界聲界耳識界如乃至意界法界
意識界如亦不即不離如是諸蘊及界處等
一切諸法不離於如如來稱如知一切法是
故現前成等正覺稱於性相等正覺故如現
在如過去未來亦復如是前際不生後際未
至中際寂靜如是平等即是菩提真實所證
如是所證一法不異一切法一切法不異一
法以如實中若一若二若復多法俱不可得
如是所證凡夫衆生不覺不知我當今覺是
故如來於諸衆生大悲隨轉復次善男子菩
提無相善入諸相云何爲相云何無相此中
相者謂如始起一切善法言無相者謂一切
法皆不可得又復相者是無住心所住之處

言無相者即是無相三昧解脫又復相者心
心所法稱量觀察一切諸法言無相者過於
稱量隨識作業又復相者於有爲法審細觀
察言無相者於無爲法現證相應如是甚深
相無相門凡夫不覺我當今覺是故如來於
諸衆生大悲隨轉復次善男子菩提無漏無
煩惱蘊此中云何爲漏無漏漏有四種謂欲
漏有漏無明漏見漏於此四漏皆悉遠離故
名無漏云何名爲無煩惱蘊遠離四種煩惱
蘊故所謂遠離欲蘊遠離邪見蘊遠離我見
蘊遠離戒禁取蘊此四煩惱皆爲無明黑暗
所覆盲無智眼欲貪渴愛使令乾焦積集建
立故名爲蘊如來知此我見等惑無有根本
本來清淨亦隨順知衆生清淨若我清淨若
衆生清淨無二無二相此無二相即無生義

此無生義即無滅義於此無生無滅之中心意識等皆悉不轉此心意識不轉之處分別不生若有分別即生死法生若無分別即解脫法生若解脫法生即無明不起若無明不起即十二有支不生若十二有支不生即是無生若無生者即是解脫若解脫者即是了義了義即是第一義諦云何名爲第一義諦所謂無我若無我者即不可說若不可說即是因緣和合之義如是因緣和合之義即一切法義一切法義即如來義以是義故若見因緣和合之法即見諸法若見諸法即見如來如是真見第一義中審諦觀察不見少分云何少分所謂觀察隨觀察心見其真實名真實見如是而知諸法平等是故如來現等正覺此之無漏無煩惱蘊凡夫衆生不覺不

知我當今覺是故如來於諸衆生大悲隨轉復次善男子菩提清淨無垢無有處所此中何法名爲清淨云何無垢云何復名無有處所謂空即清淨無相即是無垢無願即無處所無生即是清淨無行即是無垢無起即無處所諸法本性即是清淨窮究清淨即是無垢本性光明即無處所體不可說即是清淨體無分別即是無垢離言寂默即無處所真諦清淨法性無垢真實之際即無處所知蘊清淨知界本性即是無垢知入遠離即無處所知於過去盡智清淨知於未來無生之智即是無垢知於現在法界住處即無處所有如是等法淨無垢無處所義皆悉入於一所證中言所證者即是寂靜寂靜者即是寂滅寂滅者即是親證親證者即是無相無相

者即勝義諦勝義諦者即虛空相如虛空相則菩提相亦復如是如菩提相一切法相亦復如是如一切法一切衆生亦復如是如諸衆生一切佛刹亦復如是如一切刹大般涅槃亦復如是是故我說一切諸法即涅槃相此爲究竟實際之相無對之相無如清淨本來無垢從本已來無有處所如來如是於是如是等種種色相見無色相故於諸法現等正覺等正覺已徧觀十方見諸衆生住不清淨起於垢穢執著處所便於衆生普皆發起遊戲大悲以善方便欲轉法輪而念梵王未來誠請是時尸棄大梵天王知佛所念與梵眷屬八千億天前後圍繞於梵宮沒現如來前頂禮佛足而白佛言惟願世尊轉於法輪惟願善逝轉於法輪即說偈言

如來所證最寂靜	清淨無垢妙光明
不可宣說無名言	佛淨智慧方窮究
爲此經於多億劫	難行苦行靡不經
無始癡愛我隨眠	顛倒衆生令覺悟
此會衆生多善利	昔法佛所已修因
惟願廣開甘露門	轉最勝輪利含識
彼當覺悟最上法	摧破魔軍無有餘
引導邪徑諸衆生	令住如來真正道
如來大悲爲最上	爲利一切不思議
我今勸請天人師	轉於最上微妙法
如拘留孫佛所轉	亦如拘那含牟尼
迦葉善逝轉法輪	今請世尊如是轉
譬如大雲降甘雨	藥草卉木皆發生
願佛興大慈悲雲	徧降難思妙法雨
如來初生師子吼	誓普解脫諸有情

願澍法水應其時 以滿人天深渴仰

善男子尸棄梵王說偈請已我於爾時受梵王請不捨如來遊戲大悲於波羅奈城仙人墮處施鹿林中最初轉於無上法輪若沙門若婆羅門若天魔梵一切世間所不能轉轉法輪時其無常聲普聞三千大千世界時阿若憍陳如最初聞法悟解得果我於爾時而說偈言

不可說甚深 勝義無文字 我說非無果

陳如初悟解

善男子我轉法輪時復有無量無數衆生皆於如來遊戲大悲而得調伏復有無量無數衆生發菩提心是故如來於諸衆生大悲隨轉善男子是爲如來具足圓滿十六大悲常住其中不假功用任運恒轉爲一衆生經恒

十一

沙劫於大地獄具受衆苦而此衆生或有調伏或未調伏要令調伏置於如來正法之中如爲一衆生爲一切衆生悉亦如是如是經於無量劫中受地獄苦無有疲厭大悲之心亦無減少是故如來於諸衆生大悲深重不可思議二乘之悲如割皮膚菩薩悲心如割脂肉如來大悲深徹骨髓又復隨順佛智是聲聞悲勸諸衆生發菩提心是菩薩悲授當佛記是如來悲因悲心起是聲聞悲因化衆生是菩薩悲因於究竟成熟衆生是佛大悲求斷生死是聲聞悲運度衆生至於彼岸是菩薩悲普能度脫一切生死一切煩惱至於彼岸是佛大悲是故當知如來大悲最爲尊勝爲欲調伏諸衆生故或經一劫或復百劫或復千劫久住於世不入究竟無餘涅槃善

男子乃往久遠過阿僧祇劫爾時有佛出現於世名栴檀舍多陀阿伽度阿羅訶三藐三佛陀世界名有香劫最勝香佛壽十六八萬四千歲聲聞弟子其數十六八萬四千之所集會皮如來身諸毛孔中恒流妙香徧滿三千大千世界一切普熏無諸穢惡垣墻舍宅樹木山河種種色相無不皆香故此世界名爲有香其中衆生遇斯香者三業清淨具足衆善捨家修道深入四禪此世界中一萬如來相續出現皆同一號名栴檀舍是故此劫名最勝香栴檀舍如來作佛事已涅槃時至復以出過一切人天淨妙天眼徧觀衆生何等衆生餘佛調伏何等衆生我當調伏乃見非想非非想天有一衆生過去世中曾種善根樂聞大乘心得清淨我應調伏而此衆生

前四

十二

尚經八萬四千劫住彼天中過是已後方從天下生於人間未知五欲聞讚大乘便發阿耨多羅三藐三菩提心於大菩提永不退轉爾時栴檀舍如來方便大悲徧觀察已告諸比丘我於今夜當入涅槃便入大悲憐愍三昧入三昧已示現涅槃佛滅度後分布舍利十方人天恭敬供養正法住世八萬四千歲利益安樂無量衆生純以正法一味化人無後像法流行於世彼佛世尊雖示涅槃以其大悲憐愍三昧神通力持復住於世八萬四千劫隱相好身世無能覩過於八萬四千劫已彼一衆生住非想者方生人中豪貴家年始八歲時彼如來從三昧起至童子家現相好身住童子前唯此童子及萬二千應調伏者得見如來餘無能覩時彼如來先爲童

子發起大乘復爲演說五欲過患而告之言
善男子五欲過惡甚可怖畏譬如高大五聚
毒蛇隨一毒蛇即便害人況於五聚亦如積
集五聚毒藥若膏少分便能害人況食五聚
是故汝應勿生貪著爾時童子聞是語已觀

第十四

十三

其舍宅資生之具若男若女一切所有皆如
毒蛇深生厭離便於阿耨多羅三藐三菩提
發深重心得不退轉佛知童子身心清淨具
足衆善便與授記告諸天子言今此童子過
七十二阿僧祇劫當得阿耨多羅三藐三菩
提名最勝寶如來應正等覺出現於世佛授
記時餘人不聞唯此童子及萬二千天子堪
任法器皆悉得聞時諸天子皆發阿耨多羅
三藐三菩提心作是願言彼最勝寶如來若
成佛時我等當生彼佛國土時梅檀舍如來

告諸天子當得往生彼最勝寶如來皆當與
汝授阿耨多羅三藐三菩提記爾時梅檀舍
如來與彼菩薩授記訖已然後究竟入於涅
槃一切人天供養舍利善男子以是義故一
切如來大悲深重具足圓滿非諸聲聞緣覺
境界善男子如是法門能令汝等佛種不斷
若有衆生聞此法門受持讀誦書寫解說乃
至一字一句一偈所得善根未入涅槃相續
不斷何以故因不斷故如來於此衆會之中
說是大悲深法門時有一恒河沙數衆生發
阿耨多羅三藐三菩提心二恒河沙菩薩得
隨順忍三恒河沙菩薩得於如來十六大悲
及一切佛灌頂法忍爾時一切大衆聞此法
門踊躍歡喜清涼悅澤傾竭身心合掌向佛
而白佛言善哉如來善哉善哉快說斯義即

以人天種種供具以申供養或以種種妙寶
瓔珞或以種種上妙衣服或以種種珍膳飲
食或以法服幢幡傘蓋持如是等種種供養
恭敬尊重供養於佛

守護國界主陀羅尼經卷第四

四

守護國界主陀羅尼經卷第五

蘭五

唐 尉賓國三藏般若等譯

入如來不思議甚深事業品第五之一

爾時世尊復告文殊師利童子言善男子當云何知如來應正等覺現證甚深事業善男

蘭五

子如來有三十二種正覺甚深事業何等名為三十二種善男子如來於處非處如實而知善男子云何爲處云何非處言非處者謂諸衆生無有方便身口意業造不善行若得可意愛樂隨心遂求果者無有是處所言處者若諸衆生具有方便身口意業造諸善行獲得可意愛樂隨心遂求果者斯有是處復次善男子言非處者若諸衆生無有方便心懷慳吝得大富貴破於淨戒得人天身常行瞋恚獲端正報身心懈怠得於智慧散亂之

人能得解脫惡慧衆生能斷習氣諸煩惱者無有是處若諸衆生具有方便修行布施得大富貴護持淨戒得生人天常修忍辱得端正報勤行精進獲得智慧心不散亂得正解脫善修智慧能斷習氣諸煩惱者斯有是處復次作五逆罪得心安樂無有是處淨持禁戒得心安樂斯有是處復次若有衆生執著有見得順忍者無有是處愛樂修空得隨順忍斯有是處復次若諸衆生多住悔心得心安樂無有是處若心無悔得心安樂斯有是處復次若令女人得轉輪王王四天下或得帝釋大梵天王成佛出現無有是處若捨女人得男子身作轉輪王王四天下或作帝釋大梵天王及成佛者斯有是處復次若轉輪王非法治化無有是處若轉輪王正法治化

斯有是處復次若諸帝王貪猥驕奢能理國
政無有是處若諸帝王無貪簡易能理國政
斯有是處若諸人王執斷常見令國政理無
有是處若諸人王明信因果國政乃理斯有
是處若諸人王心不均平能治國政無有是
處若諸人王無私平等能治國政斯有是處
復次北拘盧洲捨報身後墮三惡道無有是
處若言北洲死後生天斯有是處復次若行
殺害而得長壽乃至邪見受行邪法得聖道
者無有是處若不殺生得壽命長乃至正見
受行正法得聖道者斯有是處復次阿羅漢
向不定得果無有是處若阿羅漢向定得果
者斯有是處復次須陀洹人受第八生無有
是處若須陀洹無第八生斯有是處復次若
斯陀含受第三生無有是處若斯陀含無第

三生一生人天能盡苦際斯有是處復次若
阿那含還生欲界無有是處若阿那含不生
欲界能盡苦際得涅槃者斯有是處復次若
阿羅漢受生死身無有是處若阿羅漢不受
生死入涅槃者斯有是處復次若有人言除
佛大師更有聖人超過佛者無有是處若言
唯佛是天人師更無過者斯有是處復次若
有人言得無生忍有退轉者無有是處若得
無生不退轉者斯有是處復次若有人言坐
菩提場不成正覺無有是處若坐道場決成
正覺斯有是處復次若有人言諸佛猶有煩
惱習氣無有是處若言諸佛無煩惱習斯有
是處復次若有人言一切如來智有障礙無
有是處若言如來智無障礙斯有是處復次
若有人言如來頂相有能見者無有是處若

言如來無能見頂斯有是處復次若有人言
佛不加威能知如來心之所住無有是處若
言佛加方知如來心所住處斯有是處復次
若有人言如來亦有不住三昧三摩呬多無
有是處若言如來常在三昧等引功德斯有
是處復次若有人言一切如來言有虛妄及
誤失者無有是處若言如來言無虛妄亦無
誤失斯有是處復次若有人言如來作業有
錯誤者無有是處若言如來諸所作業無錯
誤者斯有是處善男子以如是等說於如來
知處非處有無量門非言所及如於實諦無
有變異此是如來第一正覺力甚深事業爾
時世尊欲重宣此義而說偈言
大地可施行 虛空可搖動 如來終不說
非處以爲處 虛空可爲身 同士夫五色

如來終不說 非處以爲處 一切處差別
上中下不同 如來已宣說 決定無別異
一切非處別 上中下不同 如來已宣說
決定爲非處 若處若非處 如來如實知
隨衆生樂欲 具足而宣說 沙門婆羅門
不知處非處 虛妄馳諸境 佛智無不知
衆生種種執 非處求解脫 具德世所尊
爲說真實處 彼執非法器 故佛捨衆生
機熟解脫時 復當爲宣說 此爲佛第一
最勝事業門 遠離諸過非 能脫衆生苦
是處非處法 無量無有邊 難屈無不摧
斯名大仙力
復次善男子如來於過去世現在未來所作
行業誓願不同種種處所種種因緣種種事
相種種異熟無量差別皆如實知云何而知

善男子此中過去行業誓願善根爲因遠離不善未來得果若有過去行業誓願以不善根而爲其因遠離善根未來得果如是種種如來一一皆如實知復次若有行願未來漸減若有行願未來漸增若有行願現在漸減未來漸增若有行願現在漸增未來漸減若有行願現在未來皆漸減少若有行願現在未來皆漸增長如是種種皆如實知復次若有行願現在小因來世廣大或現在廣大未來微小或初起微細後漸增勝或初廣大後漸微細如是種種皆如實知復次若有行願當得聲聞若有行願當得緣覺若有行願當成佛因皆如實知復次或有行願因苦果樂或有行願因樂果苦或有行願因果俱苦或有行願因果俱樂皆如實知善男子如是過

隨五

五

去現在未來種種行業所感異熟因果相順猶如影響如來一一皆如實知如是知已隨其所應而爲說法是爲如來第二正覺力甚深事業爾時世尊欲重宣此義而說偈言
如來善巧智 知衆生業果 三世悉無遺
智眼皆無著 善因當得樂 異熟處人天
是惡感苦因 如來悉知見 善業不善業
各各果當成 善逝悉能知 如摩尼在掌
有業甚微細 當成廣大因 初大後微細
如來悉見知 有業聲聞行 有業緣覺因
有業成如來 善逝悉知見 或因樂果苦
因苦果樂殊 因果皆同 因果俱安樂
業與於法性 因果不相違 如來如實知
性相皆窮究 一切衆生界 三世業轉迴
一一無有差 如來悉明了

復次善男子一切衆生無數樂欲種種差別如來一一皆如實知佛云何知或有衆生住貪欲行樂於瞋恚或有衆生安住瞋恚樂於婬欲或有衆生安住愚癡樂於婬欲及與瞋恚如來一一皆如實知或有衆生住善法中樂欲不善皆如實知或有衆生所作微小樂欲廣大或有衆生所作廣大樂欲微小或有衆生初於因中樂欲微小至於果中樂欲廣大或有因中樂欲廣大至於果中樂欲微小如是種種皆如實知或有衆生樂邪見等因中不定當成決定或因樂欲正因決定當得解脫彼彼差別如來悉知或有樂欲當超三界或有樂欲當超色界或有樂欲當超三界如是一一如來悉知或有樂欲日日減少後當漸得增勝廣大或有樂欲最勝廣大後漸

第五

六

減少得不可意如是種種皆如實知或有樂欲受種種生得種種色受用種種資生之具如是差別如來悉知或有樂欲處人天上或有樂欲當得解脫如是差別如來一一皆如實知如是知已隨其所應而爲說法是爲如來第三正覺力甚深事業爾時世尊欲重宣此義而說偈言

衆生種種欲	意樂無數量	如來一切知
如實悉能知	彼彼諸衆生	住貪樂瞋恚
住瞋樂癡冥	一一如實知	住癡樂欲貪
住善樂不善	其心種種變	善逝悉能知
下劣因衆生	心恒樂廣大	住廣樂廣大
住勝劣中求	或復有衆生	因劣果超勝
因勝果中劣	如來如實知	住邪不定中
後時當決定	住正脫三界	如來如實知

或樂種種生 色相及資具 處於人天上

解脫欲相應 三世諸衆生 樂欲佛皆了

隨心爲說法 是第三業門

復次善男子如來於無數世界種種界別皆

如實知佛云何知謂知此世界其中衆生修

諸功德此界衆生造諸惡業此界衆生修解

脫業此界衆生當得出世如是種種悉如實

知復次善男子如來知眼界色界眼識界當

云何知有三因故謂知內空外空內外空故

如是徧知乃至知意界法界意識界內空外

空內外空故復次知於地界水火風界皆如

虛空復次知欲界色界無色界從於妄想分

別所起復次知有爲界行相現前有窮盡故

知無爲界無行相故知煩惱界客塵相故了

煩惱流可斷絕故達其本性光明相故知諸

行界妄念無明爲其相故知涅槃界智慧相

故正念相故善男子如是如是世界安立初

現在前世界轉滅至於他世生起因緣依住

作業如是差別如來一一皆如實知知已隨

應而爲說法此是如來第四正覺力甚深事

業爾時世尊欲重宣此義而說偈言

佛於界善巧 及住轉滅時 少善大果成

人師子能了 有福無福界 福門解脫門

解脫界不同 一切智明見 如來知眼界

色識界俱空 耳界鼻舌身 意法空亦爾

地水火風界 如實了皆空 三界妄念心

人師子能了 煩惱客塵相 諸法性皆無

行不行如空 斯涅槃三相 世界不善起

成已壞滅同 此界及他方 無念皆知見

十方空無際 有界佛能知 佛智勝無涯

衆生不能測 此是清淨主 第四調生門

修此不退還 決證菩提果

復次善男子如來於諸衆生諸根勝劣精進懈怠若利若鈍皆如實知云何能知善男子鈍根愚闇下劣衆生中根勝根皆如實知復

前五

次隨如是根分別生貪隨如是根分別生瞋隨如是根分別生癡及託外境生貪瞋癡如來悉知復次隨根分別生貪瞋癡展轉增廣或復隨根分別所生少貪瞋癡更不增長如來悉知復次此根是善根因此根即是不善根因此根即是解脫道因此根是出生死道因如是種種如來悉知復次善男子佛如實知眼耳鼻舌身意六根男女命根苦根樂根憂喜捨根信根進根念定慧根未知當知根已知根具知根如是種種如來悉知復次因

於眼根心住耳根不住鼻舌身等三根因於耳根心住鼻根不住餘根因於鼻根心住舌根因於舌根心住身根因於身根心住眼根如是種種根如來悉知復次若有衆生有布施根現持淨戒如來知其從無始來諸根展轉有多差別是故爲說檀波羅蜜若有衆生有淨戒根現行布施如來知其從無始來諸根展轉有多差別是故爲說尸波羅蜜或有衆生有忍辱根現行精進如來知其從無始來諸根展轉有多差別是故爲說忍波羅蜜前五或有衆生有精進根現行忍辱如來知其從無始來諸根展轉有多差別是故爲說勤波羅蜜或有衆生有禪定根現修智慧如來知其從無始來諸根展轉有多差別是故爲說禪波羅蜜或有衆生有智慧根現在禪定如

九

來知其從無始來諸根展轉有多差別是故
爲說甚深般若波羅蜜多令其修習一切廣
大菩提分法復次知此衆生有聲聞根現修
緣覺所行之行如來知其從無始來諸根展
轉有多差別堪聞聲聞是故爲說聲聞乘法
若有衆生有緣覺根修聲聞行如來知其從
無始來諸根展轉有多差別堪聞緣覺是故
爲說緣覺之法或有衆生有大乘根修二乘
行如來知其從無始來諸根展轉有多差別
堪聞大法爲說大乘復有衆生有下劣根現
修大乘如來知其從無始來諸根展轉有多
差別而爲說法令捨下劣修習大乘復有衆
生不任法器如來知其從無始來諸根展轉
有多差別久不堪任故且棄捨待根熟時堪
任法器發殷重心如來當爲殷勤說法善男

子如來如是知諸衆生若根已熟若根未熟
欲出三界或不欲出如是種種如來悉知當
云何知其根本云何修習云何性云何相
云何因云何緣云何思云何果云何報云何
究竟如來一一皆如實知此是如來第五正
覺力甚深事業爾時世尊欲重宣此義而說
偈言

佛知根智到彼岸 隨順衆生種種殊
上中下品悉了知 勝業能招解脫果
了煩惱際唯虛假 厚薄輕重悉皆知
善知諸惑對治門 惡招生死善解脫
知眼至意男女命 苦樂憂喜及捨根
信進念定慧當知 已知具知根悉了
知因眼根唯住耳 乃至因身住眼中
施根持戒爲說檀 戒根行施爲說戒

忍根勤修爲說忍 進根修忍爲說勤
定根修慧說諸禪 慧根住定說般若
聲聞根修緣覺行 以知根故說聲聞
緣覺根住聲聞乘 知根爲說於緣覺
下劣遠離上乘法 大悲爲說諸度門
根熟未熟佛皆知 是器爲說捨非器
諸根行相修習性 隨其因緣及與思
果報究竟如是知 是佛第五真實業
復次善男子如來於徧趣行皆如實知當云
何知知正定衆生界知不定衆生界知邪定
衆生界云何而知正定衆生謂此衆生有大
因力宿植多福聰敏利根智慧將開如來如
實知昔善已或爲說法或不說法稱其法器
皆令解脫云何而知不定衆生謂彼衆生有
大緣力根將成熟若隨其心得聞正法即得

蘭五

十一

解脫若不聞法不得解脫如來爲此不定衆
生說於因緣和合之法彼諸衆生隨機聞法
心得清淨各證道果如來爲此不定衆生出
興於世云何知於邪定衆生謂此衆生愚癡
覆心非是法器更無方便可以化誘譬如盲
者對於日光若爲說法及不說法俱無利益
無解脫分如來知其非是法器便置捨之爲
彼衆生是故菩薩擲大悲甲復次善男子如
來善知衆生三毒徧趣之行知貪欲行有其
三種云何爲三謂或有貪欲從妙境生或有
貪欲從愛想生或有貪欲從宿習生知其瞋
行亦有三種云何爲三謂或有瞋毒從恚而
生或有瞋毒從違境生或有瞋毒從於過去
隨眠所生知愚癡行亦有三種云何爲三謂
或有愚癡從無明生或有愚癡從身見生或

有愚癡從疑心生如是種種如來悉知復次
如來知其苦行速疾通達知根利故又知苦
行遲緩通達知根鈍故知安樂行速疾通達
知根利故知安樂行遲緩通達知根鈍故復
知有行遲緩通達遠正念故復知有行速疾
通達能堅持故又復善知有速疾行遲鈍通
達數息觀故有速疾行速疾通達心不著故
又復善知擇法之行謂或有行慧多定少或
復有行定多慧少或有定慧俱不具足或有
定慧二俱圓滿如來悉知或復有行心力具
足身力不具或復有行身力具足心力不具
或復有行二俱不具或復有行二俱具足如
來一一皆如實知或復有行令身業淨口意
不淨或復有行令口意淨身業不淨或令三
業俱得清淨或令三業俱不清淨如是諸行

闍五

十二

或是三界生死之因或解脫因如來皆以無
礙智眼一切隨轉是爲如來第六正覺力甚
深事業爾時世尊欲重宣此義而說偈言
一切處行佛盡知 正定衆生大因力
不定衆生根熟相 邪定非器空有悲
貪行衆生三種因 瞋恚愚癡亦三種
種種無邊煩惱界 徧行因起佛皆知
苦行疾得因利根 鈍根遲緩不能達
樂行速疾由根利 鈍根劣弱佛皆知
有行遲鈍漸澄清 復有遲鈍頓清淨
有速疾行得微劣 超過速疾無著因
有行智增擇法生 有行定增成法器
有行俱少非法器 定慧和合勝道生
有行心力具非具 有身力具心不具
大威德故身心具 一切見者悉皆知

有行不能淨語心 或有能令身語淨
或有不能心永淨 有行但能清淨心
或有不能淨語言 有行能令心語淨
或有不能身永淨 有行三業淨無瑕
有行建立生死因 有行為因招解脫
如是徧行佛皆了 是第六業最勝門
復次善男子如來於一切靜慮解脫等持等
至伏滅煩惱生起因緣皆如實知佛云何知
謂知衆生煩惱生起以何因生以何緣生滅
惑清淨何因能滅何緣能滅此中煩惱生因
緣者謂不正思惟以爲其因無明爲緣無明
爲因行為緣行為因識爲緣識爲因名色爲
緣名色爲因六處爲緣六處爲因觸爲緣觸
爲因受爲緣受爲因愛爲緣愛爲因取爲緣
取爲因有爲緣有爲因生爲緣生爲因老死

頌五

十三之二

爲緣煩惱爲因業爲緣見爲因貪爲緣隨眠
煩惱爲因現行煩惱爲緣此是煩惱生起因
緣云何衆生滅諸煩惱所有因緣有二種因
有二種緣云何爲二一從他聞隨順法聲二
者內心起於正念復次有二種因有二種緣
能令衆生清淨解脫謂奢摩他心一境故毗
鉢舍那能善巧故復次有二種因有二種緣
不知來智故知來智故復有二種因緣微細
觀察無生理故近解脫故復有二種因緣具
足行故智慧解脫現在前故復有二種因緣
謂盡智故無生智故復有二種因緣隨順覺
悟真諦理故隨順獲得真諦智故此是衆生
除滅煩惱清淨因緣如來悉知復次善男子
煩惱因緣無有數量解脫因緣亦無有量或
有煩惱能與解脫以爲因緣觀實體故或有

頌五

十四之一

解脫能與煩惱以爲因緣生執著故如是廣大無障礙行如來悉知善男子如來禪定智慧皆悉具足謂離欲界惡不善法有尋有伺離生喜樂入初靜慮初靜慮起滅尋伺等隨順次第入八解脫三摩鉢底逆次入住諸三摩地或復起間橫豎無礙住於等至顯示三昧如來了知三摩鉢底與三昧門無少差別如來三昧三摩鉢底不從因緣入一三昧一切三昧皆悉現前一三昧起而能即入一切三昧如來終不作如是念我今能入如是三昧而常三昧無不定心一切無能測知如來所有三昧緣覺三昧超過聲聞菩薩三昧超過緣覺如來三昧超過菩薩而佛三昧無能過者如來智慧於一切處無障礙轉無能過者隨順教化一切聲聞生聲聞定緣覺菩薩

亦復如是如來如是種種知已隨其所應而爲說法此是如來第七正覺力甚深事業爾時世尊欲重宣此義而說偈言

諸佛法王真實智 知諸衆生染淨因
如是因緣煩惱生 如是因緣得解脫
邪思爲因無明緣 無明爲因行爲緣
識與名色六處等 有支因緣悉如是
煩惱爲因業爲緣 諸見爲因貪爲緣
隨眠結惑以爲因 現行煩惱以爲緣
衆生解脫二因緣 從作聞聲起隨順
內心正念觀空法 解脫有海得超昇
止觀和合互相資 無少去來而可得
諦觀無生亦無滅 親近解脫得清涼
住三種行長三明 修習解脫不放逸
盡無生智得實諦 由此因緣清淨心

佛入正定三昧門 出入滅定念具足
法王禪定無等等 入八解脫多等持
逆順次第超閭遊 一定顯示無邊定
心無迫隘無分別 雖常住定無定心
聲聞緣覺三摩提 菩薩億千種種定

佛三摩地過諸定 此善巧業智難量

復次善男子如來以宿住智知於自身及諸
衆生過去無數宿住生事所謂一生二生十
生百生千生百千生億百千生成劫壞劫成
壞劫無數成劫無數壞劫無數成壞劫我及
衆生如是名字如是種性如是飲食如是形
相如是色類如是苦樂如是處所如是壽命
如是生死於某處歿而生某處無數種種宿
住之事皆悉憶念復知彼彼衆生過去以如
是因生此世界如來知已隨其所應而爲說

法又如實知一切衆生過去心行如是前念
次第因滅相續引起如是後念或復緣闕後
念不生如是種種如來悉知如一衆生如是
心滅如是心生輪轉不斷無量無邊恒河沙
劫說不能盡如一衆生一切衆生亦復如是
念念生滅心心相續說不可盡如來一一皆
如實知假使盡於未來際劫說於如來所知
宿住不可窮盡故說如來宿住智慧不可思
議不可稱量難知邊際說不可盡爾時如來
出大悲聲猶如牛王普告衆生汝等應當念
念思惟往昔世久近曾種善根第五或於佛所曾種
善根或二乘所種諸善根彼諸衆生以佛威
力皆念昔善如來知已隨應說法彼諸衆生
得聞法已如昔善根各於自乘得不退轉是
爲如來第八正覺力甚深事業爾時世尊欲

重宣此義而說偈言

佛世間燈念往劫 無邊億數那由佗
諦了自己及衆生 如掌觀五阿摩勒
如是姓名色分別 壽命住處生死殊
以是因緣此處生 善知時故爲說法
又知過去無邊劫 衆生心心所不同
無量種類各生心 如來大智皆明了
過去流注心不斷 一一衆生佛悉知
劫數量等恒河沙 說彼無邊行無盡
盡未來際所有劫 不能說佛宿住因
智慧無等無有邊 猶如大海無涯際
佛住利智勝通力 念昔所修白淨因
及彼衆生種善根 過去或曾供養佛
佛威神力令憶念 如前所作白法因
念已示教住三乘 清淨解脫恒無退

前五

十七

善逝過去因無量 一切衆生難測量
以此第八業爲因 無數衆生悉調伏
復次善男子如來天眼清淨過於人眼見諸
衆生死此生彼所謂下劣最勝善色惡色若
好若醜如是種種隨業受生或有衆生具身
惡行或有衆生具口惡行或有衆生具意惡
行或謗賢聖及邪見等業因緣故捨此身已
墮於地獄復有衆生具身善行或有衆生具
口善行或有衆生具意善行不謗賢聖及正
見等業因緣故捨是身已生於天上如來天
眼皆悉知見如是十方盡於法界於虛空界
無量無邊超過數量所有世界於其中間或
有世界劫火洞然空無所有或有世界種種
衆生死此生彼或諸菩薩遊行諸刹或諸如
來趣於道樹證大菩提轉正法輪應盡晦跡

示入涅槃各各聲聞現得解脫或入涅槃彼
彼緣覺現種種通能令遇者功德增長如是
種種佛皆明見如對目前復見世界無有身
相諸衆生等非外五通天眼所見亦非二乘
及菩薩眼之所能見唯有如來天眼明見或
有其地量如車輪其無身相諸衆生等充滿
其中多於三千大千世界所有人天佛皆明
見以淨天眼微細觀察一切世界所有衆生
堪調伏者令其一各見佛身而現其前彼
彼衆生互不相知是爲如來第九正覺力甚

深事業爾時世尊欲重宣此義而說偈言

如來光明淨天眼 威德照見劫無邊
十方一切刹難思 衆生受生各何相
或有已現當生別 有色無色種種殊
或人天趣或三塗 下中上品生非一

施五

十八

垂歿將生種種異 一切見者見無遺
造罪惡趣所沈淪 修福超處人天上
或有修行菩薩行 入出種植菩提根
或坐道樹摧衆魔 覺悟最勝菩提道
轉妙法輪皆自在 人天解脫量難思
作佛事已示涅槃 如來天眼皆明見
或從師聞獲正念 履踐寂滅得清涼
或超有海不由師 解脫安樂如來見
或有無數聲聞衆 或復修行緣覺乘
彼衆生界無有邊 佛淨天眼皆明見
或有衆生無色相 等車輪量有衆多
過三千界內人天 如是微細如來見
佛見一一衆生界 流轉五道無有邊
一切智了無衆生 以大慈悲故調伏
或有利根應度者 各見如來現在前

爲說勝法愜其心 此佛第九天眼業

復次善男子如來一切諸漏已盡無復煩惱
心善解脫慧善解脫自覺現前具足圓滿作
師子吼發如是言我生已盡梵行已立所作
已辦不受後有如來知此究竟煩惱極無垢

蘭五

十九

染清淨光明一切習氣無不永滅聲聞斷惑
有盡有量習氣不除緣覺盡惑亦有分量遠
離大悲闕無礙辯唯有如來一剎那心平等
相應一切煩惱諸相煩惱根本煩惱習氣煩
惱永盡無餘大悲善攝辯才無畏皆悉圓滿
一切世間無能過者何以故諸佛如來永滅
一切諸業習氣煩惱習氣威儀誤失諸習氣
故譬如虛空本性清淨一切煙塵無所依住
如來亦爾得於煩惱究竟盡之智諸業煩惱一
切習氣無所依住而如來心以無住相煩惱

盡處智平等中微妙安住爲斷衆生一切煩
惱有漏五蘊而說妙法作如是言哀哉衆生
於無事中橫生煩惱汝等應當如實思惟揀
擇觀察復爲衆生種種善巧種種譬喻說煩
惱性本無所有彼諸衆生如實觀已不見少
法而可執持種種煩惱任運永滅入於涅槃
此是如來第十正覺力甚深事業爾時世尊
欲重宣此義而說偈言

十力世尊力圓滿 成就廣大甚深門
煩惱障盡智相應 得勝菩提最寂靜
聲聞滅惑得盡智 有量習氣猶未除
緣覺斷惑得菩提 大悲辯才皆不具
佛爲世主人中勝 惑習俱滅德皆圓
盡煩惱際大悲增 辯才無量皆成就
佛住究竟煩惱智 知衆生惑妄非真

愍行邪道諸有情 不履如來正法跡
大悲猛利爲物說 無常苦空無我門
汝等思惟本性空 常得最勝妙寂靜
不得衆生數取趣 作者及與摩納婆
爲著邪見諸衆生 大覺興悲說解脫
於一切時無厭倦 解五 未曾一念捨衆生
常住三昧無動搖 爲利衆生演妙法
如是等相佛事業 十力住於力地中
轉無等等最勝輪 能摧冤敵難傾動
守護國界主陀羅尼經卷第五

音釋

鈍 杜困切 不利也 誘 云九切 教也 擐 胡慣切 貫也 隘 烏懈切 隘也
履 良以切 踐也

守護國界主陀羅尼經卷第六

蘭六

唐 罽賓國三藏般若等譯

入如來不思議甚深事業品第五之二

復次善男子如來安住四無所畏能作種種諸佛事業謂知自身即是無上正等正覺一

蘭六

切世間若天若人無有能作如理說言如來世尊非正覺者以何因緣說諸如來是正等覺謂諸如來於一切法平等正覺無有高下何等一切法所謂凡夫法有學法無學法緣覺法菩薩法諸佛法如是諸法皆等正覺復有世間法出世間法善法不善法有漏法無漏法有爲法無爲法如是諸法如來正覺體平等故云何平等謂空平等見一切法本性空故無相平等相本性故無願平等三界性故無生平等生本性故無行平等行本性故

無出平等出本性故無阿賴耶平等心本性故如是真諦平等三世性故智脫平等無明有愛本體性故涅槃平等生死輪轉本體性故如是一切諸平等法如來正覺以是因緣故說如來真是無上正等覺者成於如是正等覺故以大悲心出妙言詞爲諸衆生說種種法示解脫道令出苦際餘諸衆生實非大師自言我是正等覺者如來爲此諸衆生故自唱德號作如是言唯我如來是等正覺今非法器皆成法器是爲如來第十一正覺無畏甚深事業爾時世尊欲重宣此義而說偈言

自然覺悟者 覺諸法平等 是故號如來
正覺平等見 一切凡夫法 與佛法平等
有學及無學 緣覺法亦然 世及出世法

此二亦平等 善及不善法 與涅槃平等

空法無相法 無願無生法 無行等諸法

平等而顯示 佛大悲廣說 覺悟諸衆生

聞法得解脫 是佛最勝業

復次善男子如來自知諸漏煩惱已究竟盡

第六

一切世間若天若人無有能作如是說言如

來諸漏煩惱未盡云何如來諸漏煩惱已究

竟盡所謂於欲煩惱心得解脫一切欲行習

氣煩惱證滅諦故於有煩惱心得解脫一切

瞋行習氣煩惱證滅諦故無明煩惱心得解

脫諸愚癡行習氣煩惱證滅諦故於見煩惱

心得解脫諸煩惱行及與習氣證滅諦故以

是義故隨順俗諦說於如來諸漏煩惱究竟

永盡聖者慧眼稱真諦故觀察現證無有少

法而可得者所謂若能滅智若所滅惑若思

若修乃至現證俱不可得何以故彼自性盡

無不盡時不從因緣待對說盡如是盡者是

真實盡此真實盡不與餘法而作因緣故此

盡者即是無爲即此法中無生無滅亦無有

住此無生滅若佛出世若不出世法界常住

如法界常此智成就亦復如是如此成就即

非成就若能如是如所教住得無煩惱非斷

煩惱得煩惱無如來大悲隨順俗諦爲衆生

說滅煩惱法是爲如來第十二正覺無畏甚

深事業爾時世尊欲重宣此義而說偈言

第六

佛無欲習氣 故無欲煩惱 瞋恚習氣盡

有煩惱不生 善逝離無明 由滅癡根本

諸惑習氣盡 見惑則不生 佛依俗諦門

故說煩惱盡 真中不可得 無滅亦無增

盡智不對緣 聖知本自盡 由無三相故

此盡即無爲 法界常不遷 知此到彼岸
知己如是說 此業佛能窮

復次善男子如來平等於諸障礙無障礙法
如實了知一切世間若天若人無有能作如
理說言如來所說障礙之法非障礙者此中
云何爲障礙法謂有一法能爲障礙即濁亂
心復有二法能爲障礙謂無慚無愧復有三
法能爲障礙謂身惡行口惡行意惡行復有
四法能爲障礙謂以貪故而行非法或以瞋
故而行非法有以癡故而行非法有以怖畏
而行非法復有五法能爲障礙謂殺生偷盜
邪行妄語及飲諸酒復有六法能爲障礙謂
不尊敬佛不尊敬法不尊敬僧不尊敬戒不
尊敬定不能尊敬諸善知識復有七法能爲
障礙謂慢過慢及慢過慢我慢增上慢卑劣

慢邪慢復有八法能爲障礙謂邪見邪思惟
邪語邪業邪命邪精進邪念邪定復有九法
能爲障礙云何爲九謂已惱害我現惱害我
當惱害我過去憎我善友現在憎我善友未
來憎我善友過去愛我怨家現在愛我怨家
未來愛我怨家於此九種憶念對境增不善
心名爲障礙復有十法能爲障礙云何爲十
所謂殺生偷盜邪行妄語兩舌惡口綺語貪
瞋邪見是名爲十如是乃至起不善念樂著
因緣安住一切煩惱結使常與顛倒障礙相
應愛見煩惱堅執不捨凡有所作身口意業
皆與名利諸欲相應如是一切皆名障礙如
來悉知亦爲衆生如實說於無障礙法令其
障礙永斷不生是爲如來第十三正覺無畏
甚深事業爾時世尊欲重宣此義而說偈言

佛覺障礙法	不能證解脫	謂心不清淨
無愧及無慚	身語意業中	無有無表戒
貪欲瞋癡怖	起惡行無邊	殺盜及邪淫
妄言飲諸酒	六不敬七慢	八邪道常行
九惱十惡因	佛說皆障礙	修習不善念
不得解脫門	佛知顛倒源	無中堅執著
慈悲爲說法	令離障礙因	

復次善男子如來如實宣說能盡苦道一切衆生依此修習皆得解脫於此義中一切世間若天若人無有能作如理說言如來所說非解脫道云何名爲真解脫道所謂一道是解脫道於諸衆生起清淨心復有二道是解脫道謂奢摩佗毗鉢舍那復有三道是解脫道謂空無相無願法門復有四道是解脫道謂四念處云何爲四謂身受心法云何身念

論六

處謂觀內身修身觀心得安住觀外身修身觀心得安住觀內外身修身觀心得安住是名身念處云何爲受念處謂觀內受外受內受外受修受觀心得安住云何爲心念處謂觀內心外心內外心修心觀心得安住云何爲法念處謂觀內法外法內外法修法觀心得安住復有五道是解脫道云何爲五所謂信根進根念根定根慧根復有六道是解脫道云何爲六謂念佛念法念僧念戒念捨念天復有七道是解脫道云何爲七所謂念覺分擇法覺分精進覺分喜覺分輕安覺分定覺分捨覺分復有八道是解脫道云何爲八所謂正見正思惟正語正業正命正精進正念正定復有九道是解脫道謂初禪二禪三禪四禪空處識處無所有處非想非非想處滅

受想定復有十道是解脫道謂不殺生不偷盜不邪行不妄語不兩舌不惡口不綺語不貪不瞋不邪見是名爲十如是所有一切諸善菩提分法或戒蘊相應定蘊相應慧蘊相應解脫蘊相應解脫知見蘊相應或聖諦相應皆解脫道復有解脫道所謂真正中道無少可得不增不減不取不捨不攝不散得真實道三念不生以一切法本無二故如來於此解脫道中真實知見亦爲衆生如是宣說有修習者能盡苦源此是如來第十四正覺無畏甚深事業爾時世尊欲重宣此義而說偈言

修習清淨道 增益無量樂 能趣甘露徑
佛智自然知 所有衆善因 是佛菩提分
修者得解脫 無能說爲非 正念滅塵勞

爾六

六

能與善和合 遠非不執著 得安樂涅槃
善巧觀因緣 如空無有所 如幻亦如夢
能脫生死流 依定起悲心 脫諸有輪轉
此是大仙業 世間無等倫
復次善男子如來身無誤失一切凡夫若勝智者求得如來少分過失無有是處何以故如來身業儀範端嚴行無顧盼被僧伽梨著衣持鉢行住坐卧進止迴旋入出村坊往來城邑如是一切審諦安詳足不履地而令於地千輻輪相出現分明復有蓮華香潔殊妙而承其足凡諸蠢動觸如來跡七日七夜安隱泰然後生人天受勝妙樂如來袈裟離身四寸而不墮落旋嵐猛風不能飄動身常光明凡所照觸乃至下濟阿鼻地獄離苦清涼由如是等故說如來身業無失復次善男子

如來語業無有誤失一切凡夫若愚若智求得過失無有是處何以故善男子如來知時而發言故時語真語實語義語如說而行無有錯誤言不再發一切衆生聞皆歡喜以深字義莊嚴語言一音說法異類等解以如是

蘭六

義故說於如來語無誤失復次善男子如來意業無有誤失一切凡夫若愚若智求得過失無有是處何以故如來常住三摩呬多行諸佛行常無散亂以無著智知一切法是故如來意業無失善男子如來自住無誤失法亦爲衆生說如是法令得如來無誤失法是爲如來第十五正覺不共甚深事業爾時世尊欲重宣此義而說偈言

三界獨尊無誤失 身口意業淨無瑕
世尊內無煩惱非 普能利益諸含識

欲斷衆生諸過失 爲說最勝寂靜門
今無誤失同世尊 此第十五如來業

復次善男子如來無有異相苦樂等聲是故一切人天外道若魔若梵無能說佛聲有過失無何等聲所謂如來無憂喜聲何以故離愛恚故一切衆生種種供養恭敬讚歎不生歡喜心亦不高一切衆生不修敬養毀謗罵辱不生瞋恚心亦不下如來無悔恨聲何以故所作事業無少艱難已究竟故如來無諍論聲何以故往昔常樂住阿蘭若離我所無取無求已脫煩惱諸結縛故善男子如來自住無異相聲亦爲衆生說如是法令離如是異相之聲是爲如來第十六正覺不共甚深事業爾時世尊欲重宣此義而說偈言
恭敬讚歎心不高 輕慢毀訾心不下

遠離愛恚非法故 先世妙行無譏嫌

佛阿蘭若昔修持 我所取結皆無有

住如是法如是說 此最勝業唯如來

復次善男子如來無忘失念故無少法而不

明記於何無忘謂諸靜慮解脫三昧三摩鉢

第六

底如是法中皆無忘失又知衆生心行起動

顧視往來隨宜說法亦無忘失法義詞辯無

所畏中亦無忘失如來自住無著智慧三世

法中念無忘失亦爲衆生說如是法令得於

念無有忘失是爲如來第十七正覺不共甚

深事業爾時世尊欲重宣此義而說偈言

最勝法王無忘失 禪定法智等無遺

衆生心行悉皆知 隨宜爲說無所畏

三世諸乘一切法 無著智慧並無忘

隨無忘失說亦然 最勝丈夫之事業

復次善男子一切如來無不定心謂行住坐

臥飲食語默如是時中常住甚深三摩呬多

入諸三昧到於彼岸於諸禪定無有障礙一

切世間人天之類無一能觀如來所住三摩

呬多唯除世尊威德所被如來自住無不定

心亦爲衆生說如是法令捨散亂此是如來

第十八正覺不共甚深事業爾時世尊欲重

宣此義而說偈言

如來常住三摩地 行住坐臥一切時

飲食語默利衆生 恒處三昧無搖動

第六

十方世界衆生類 無能測佛三昧心

亦爲衆生說此門 是佛難思之事業

復次善男子一切如來無種種想以離種種

諸異想故心無高下云何如來無種種想所

謂於諸佛刹無種種想佛刹體性同於虛空

無有盡故於諸衆生無種種想衆生本性同
無我故於諸佛中無種種想同平等智證真
法界一相無雜無破壞故於佛法中無種種
想一切諸法性無染故見持戒者不生愛念
見毀禁戒不生瞋恚自佗得利心不增高自
佗失利心不減少於正見者亦不尊重於邪
見者亦不輕賤何以故如來住於平等性故
如來自住諸法平等無種種想亦爲衆生說
如是法令離諸想此是如來第十九正覺不
共甚深事業爾時世尊欲重宣此義而說偈
言

善逝普無諸異想 謂利衆生佛法中
如是異想永皆無 大名稱者之所住
持戒破戒及得失 易調難調皆等心
兩足尊爲諸衆生 說法令脫諸邪執

復次善男子如來正覺無不擇捨何以故如
來修習諸善道捨非不修習而有所捨所謂
修習身戒心慧如是而捨如來捨者與智相
應非是無知是出世道聖解脫捨非是世間
非聖解脫而有所捨如是捨者不捨大悲能
轉梵行利益衆生自然成就非是待對因緣
和合而得成就是如來捨無有高下平等安
住得不動搖體無有二遠離二相有量無量
悉皆超越待時而捨不過於時非心意識動
念境界非假安立非有分別非是積聚非差
別見如是捨者是真勝義常恒不變此是如
來圓滿大捨亦爲衆生說如斯法令得如是
圓滿大捨是爲如來第二十正覺不共甚深
事業爾時世尊欲重宣此義而說偈言
如來無有不擇捨 修最勝道善因緣

身戒心慧次第修 人中最勝無愛恚

非假分別無分別 非積集捨共相應

真實不變大捨中 廣爲衆生如是說

復次善男子諸佛如來樂欲無減謂善法欲

云何名爲善法之欲所謂如來大慈欲無減

大悲欲無減說法欲無減調伏衆生欲無減

成熟衆生欲無減樂處寂靜欲無減勸諸衆

生發菩提心欲無減令諸衆生紹三寶種欲

無減如來無有隨心惡欲凡有善欲智爲先

導自滿善欲亦爲衆生說如是法令得如來

最勝圓滿一切智欲此是如來第二十一正

覺不共甚深事業爾時世尊欲重宣此義而

說偈言

佛善法欲已圓極 慈悲常轉度衆生

成熟勸發菩提心 紹三寶種不斷絕

薩六

十一

不順貪欲瞋癡怖 凡有所欲智爲先

最勝智者如是知 哀愍衆生多懈怠

無善法欲多惡欲 教令善欲正勤修

無等智業利衆生 有情因此皆調伏

復次善男子如來所有精進無減如來於何

精進無減所謂調伏衆生審諦觀察精進無

減若有衆生專心聽法而爲演說不憚劬勞

精進無減若有衆生一劫聽法身心無倦佛

亦一劫或過一劫不起于座不飲不食說法

無斷若復過於恒沙刹外有一衆生堪任調

伏即往教化令修正行而佛身心無有懈怠

安樂寂靜自行精進得聖解脫亦爲衆生讚

歎精進是爲如來第二十二正覺不共甚深

事業爾時世尊欲重宣此義而說偈言

精進出生人獅子 是故常讚於精勤

念念勇悍無減時 有堪聞法恒宣說

善逝精進無休息 身口意業不疲勞

自然堅猛離諸非 亦觀衆生起精進

復次善男子如來正覺於一切時徧一切處

正念無減云何時處正念無減善男子如來

始從無間道後得阿耨多羅三藐三菩提即

觀三世一切衆生心行相續生滅流注如是

知已念念不忘不求不退故常無減如來普

能觀察三聚正念無減所謂深入衆生諸根

心行雖無動念尋伺分別而爲說法無有錯

亂是故如來念無減少亦爲衆生說如斯法

念念無減是爲如來第二十三正覺不共甚

深事業爾時世尊欲重宣此義而說偈言

佛念非思常不減 知衆生界盡無餘

自從覺悟大菩提 三世徧知無再念

前六

十二

善知衆生心行別 諸根樂欲各不同

住無功用業常恒 亦爲衆生說勝法

復次善男子如來所有三昧無減云何如來

三昧無減如來三昧於一切法平等無二無

高無下如一切法真實義諦何以故謂三昧

平等即是諸法體性平等此性平等即三昧

平等三昧平等即是如來以是義故說佛三

昧得於諸法平等之性云何諸法平等之性

謂染欲際平等即離欲際平等瞋恚際平等

即離瞋際平等愚癡際平等即離癡際平等

有爲際平等即無爲際平等生死際平等即

涅槃際平等入此平等是故說名如來所有

三摩呬多三昧無減何以無減與此平等無

增減故又佛三昧不與眼合不與耳合不與

鼻舌身意和合如來無有分別根故如來三

昧又亦不與地界和合亦不合於水火風界亦不合於三界三世此不和合體性平等不增不減是故說言如來三昧不增不減亦爲衆生說如斯法皆令得此三昧無減此是如來第二十四正覺不共甚深事業爾時世尊

欲重宣此義而說偈言

十三

如來三昧無增減 常在等引利衆生
體性平等無高低 不與諸法而和合
觀察地水火風界 欲色無色界亦然
恒說無減無合門 是故如來定無減

復次善男子如來智慧無減云何名爲智慧無減所謂現證一切諸法自體之智普爲一切差別衆生開示演說一切法智善巧無礙微細甚深無窮盡智分析一句入無數句百千億劫受持演說無窮盡智別別諮問各各

斷疑於一切處皆無著智能說三乘差別次第相續之智能知衆生八萬四千心行差別亦以八萬四千法蘊隨機說智調伏衆生不失時智以是義故說於如來智慧無邊無際無盡有無量門此是如來智慧無減亦爲衆生如是宣說令得如來無盡智慧是爲如來第二十五正覺不共甚深事業爾時世尊欲重宣此義而說偈言

一切教中智現前 無礙自在到彼岸
自然說法利含識 隨根一句入無邊

解衆生行難稱量 爲說八萬四千法
智慧無邊不可減 最勝十力業難思
復次善男子如來世尊解脫無減云何如來解脫無減謂聲聞解脫隨順聲得緣覺解脫悟因緣生如來解脫遠離一切執著所起不

緣前際不入後際不著現在於眼於色不著
二相耳聲鼻舌味身觸意法亦爾不著二
相故名解脫復有微細若執若著若意分別
遠離此三即得解脫見心自性智慧光明此
光解脫即是智慧是故說言一刹那心與智
相應即得阿耨多羅三藐三菩提如來如是
等正覺已亦為衆生說如是法令得解脫此
是如來第二十六正覺不共甚深事業爾時
世尊欲重宣此義而說偈言

聲聞隨順聲解脫 辟支佛悟因緣生

善逝解脫如虛空 無垢無著最尊勝

了知過去心流注 本性解脫得無羈

於無繫縛如實知 故說解脫不可減

復次善男子如來身業智為先導隨智慧行
所謂如來身業具足圓滿或有衆生纔見佛

身而調伏者或聞語言而調伏者或見默然
而調伏者或受飲食而調伏者如是或四威
儀或觀相好或不見頂或復顧視或放光明
舉足下足入出城邑聚落之時衆生見者皆
得調伏故佛威儀無有少分不能調伏一切
衆生是故說言如來身業智為先導隨智慧
轉此是如來第二十七正覺不共甚深事業
爾時世尊欲重宣此義而說偈言

若見最勝身威儀 或出或處或相好

或見烏瑟尼沙相 皆置衆生調伏中

最勝尊或放光明 無量衆生悉安樂

光所觸者皆調伏 兩足尊業勝難量

復次善男子如來所有一切語業智為先導
隨順智行云何名為隨順智行如來說法無
有障礙能具足說文義無缺所發言聲入衆

生心發生智慧謂不高聲不下聲正直聲不
怯怖聲不濫聲不麤聲無稠林聲極柔
軟聲有堪任聲不斃破聲恒審定聲不大疾
聲不大遲聲無差互聲善分析聲妙言詞聲
妙深遠聲妙廣大聲涌泉聲不斷聲潤熟聲
深美聲和合聲莊嚴聲利益聲清徹聲無塵
聲無煩惱聲無垢染聲無愚癡聲極熾盛聲
無所著聲善解脫聲極清淨聲無委曲聲無
下劣聲無堅硬聲無緩聲能生安樂聲令
身清涼聲令心歡喜聲熙怡先導聲先意問
訊聲能淨貪欲聲不起瞋恚聲能滅愚癡聲
能吞衆魔聲能摧惡業聲能燒外論聲隨順
覺悟聲如擊大鼓聲智者聞喜聲釋提桓因
聲大梵天王聲大海波潮聲雲雷普震聲大
地震動聲迦陵頻伽聲拘枳羅鳥聲命命之

鳥聲鹿王聲牛王聲鴈王聲鶴唳聲孔雀聲
笙篳聲箏策聲琵琶聲笛聲螺聲鼓聲易
解聲分明聲可愛聲樂聞聲甚深聲無歇聲
令耳安樂聲能生善根聲字句圓滿聲妙詞
句字聲利益和合聲與法和合聲善知時節
聲一切時合聲無有非時聲說昔諸根聲展
轉相續聲莊嚴布施聲能持淨戒聲能生安
忍聲猛利精進聲堪任靜慮聲廣大智慧聲
大慈和合聲無倦大悲聲光明法喜聲深廣
大捨聲安住三乘聲不斷三寶聲分別三聚
聲淨三脫門聲修習諸諦聲修習諸智聲智
者相應聲聖者讚歎聲隨順虛空聲無有分
量聲諸相具足聲善男子如來語業具足如
是無量音聲故說如來一切諸業智爲先導
隨智慧轉是爲如來第二十八正覺不共甚

深事業爾時世尊欲重宣此義而說偈言
佛語無等淨無瑕 一切功德皆圓滿
一音普徧無邊刹 各各得聞隨類音
或有得聞聲聞聲 或有得聞緣覺法
或聞如來大威德 便發無上菩提心
文字句義悉皆圓 次第安布俱無礙
而心無有異分別 能說難思妙法門
如是人中最勝聲 所出音聲如谷響
無功無心而普應 無聲之聲悅物心
守護國界主陀羅尼經卷第六

守護國界主陀羅尼經卷第六

策	係	堅	口	坦	範
切	也	溪切	毀也	似切	房啖切
筭	審	懔	懔	眈	眈
切	九華切	畏也	壯晏切	視也	匹爛切
蘭六	斃	斃	斃	斃	斃
切	難也	音斯五	求於切	疲勞也	力六
斃	斃	斃	斃	斃	斃
切	質	破聲也	硬	悍	蠢
斃	斃	斃	斃	斃	斃
切	魚孟切	強也	勇急也	侯幹切	尺允切
斃	斃	斃	斃	斃	斃
切	算	羈	羈	羈	此

守護國界主陀羅尼經卷第七

蘭七

唐 尉賓國三藏般若等譯

入如來不思議甚深事業品第五之三

爾時世尊復告文殊師利童子菩薩摩訶薩

言善男子如來意業智爲先導隨智慧轉云

何意業隨智慧轉善男子如來無有心意識

過何以故如來心意識俱不可知但從佛智

而顯現故如來智慧而爲主故善男子如來

智慧隨順一切衆生心轉隨順趣入諸衆生

意隨順解了諸衆生識出生諸法及諸三昧

是故如來心意識等無能知者超過因地遠

離緣生非三有道解脫諸慢諸魔事業誑誑

幻惑我我所執愚癡無明黑闇翳障默修道

品而無散亂無所分別入平等性猶如虛空

有如是等無量事業一一皆以智爲先導是

爲如來第二十九正覺不共甚深事業爾時
世尊欲重宣此義而說偈言

兩足尊心不可量 淨智因緣世中勝

佛智等同於法界 隨順普入衆生心

禪定解脫悉皆圓 心意分別無搖動

超過魔境及魔業 無垢無變如虛空

復次善男子如來正覺見過去世無著無礙

智慧隨轉智云何轉所謂過去種種佛刹顯

現成壞無量無數如來悉知彼諸刹中卉木

叢林藤蘿藥草如來悉知彼刹所有衆生之

類卵生胎生濕生化生有色無色有想無想

非有想非無想如是一切如來悉知彼諸刹

中有情非情種種音聲如來悉知彼刹所有

如來出現說種種法種種衆會比丘比丘尼

優婆塞優婆夷一切衆生於三乘中各得調

伏種種壽量種種法住如來悉知彼諸衆生
出息入息種種飲食種種資具種種相貌種
種根器種種行解種種心性死此生彼剎那
流注生滅相續如來悉知如是一切現量所
得非比量知云何現量謂不動念如實而知
非流注心入於過去如是知時智慧具足隨
衆生心種種說法是名如來第三十正覺不
共甚深事業爾時世尊欲重宣此義而說偈
言

佛智無量無所著 知過去剎佛衆生

說法大會名相殊 心行根欲多差別

各依三乘得調伏 究竟同歸解脫源

及知生滅流注心 一切見者真實覺

復次善男子如來智慧見未來世無著無礙
如見現在此云何見謂所有未來種種衆生

種種諸法種種剎土當生當滅曾住當住如
是一切如來悉知所有剎劫當燒當盡當成
當住剎中當成所有諸地樹木叢林百卉藥
草麤色細色日月星宿乃至微塵皆如實知
一一剎中諸佛當現當有聲聞當成緣覺當

成菩薩當有資具出息入息往來進止取與

威儀如來悉知種種剎中如是衆生當得解

脫於三乘中解脫差別如來悉知又彼剎中

一切衆生所有諸蘊諸入諸界心心所法當

生當滅如來悉知雖於一切皆如實知而如

來心亦不流注入於未來爲令衆生悟未來

性說如是法是爲如來第三十一正覺不共

甚深事業爾時世尊欲重宣此義而說偈言

佛未來世無垢眼 徧見所有已當成

一切諸佛及剎中 無有纖毫知不盡

彼彼事中無錯亂 復細觀見未來因

隨衆生心說法門 此兩足尊超勝業

復次善男子如來知見現在無著無障礙轉
此云何轉謂於十方現前所有一切佛刹以
三種因微細知見謂知其相若生若滅知何
等法謂一切諸佛一切菩薩一切聲聞一切
緣覺一切細色一切麤色如來悉知一切地
界微細分析各以若干微塵所成一切水界
以毛滴之知其數量一切火界燄之起滅悉
知其數一切風界色相飄擊若干微塵十方
虛空以一毛端周徧度量知其邊際如是等
境盡知其相亦知其生亦知其滅亦以三種
知衆生界知地獄界生地獄因出地獄因知
畜生界生畜生因捨畜生因知餓摩界餓摩
生因餓摩滅因知於人界生人趣因失人趣

因知諸天界生天之因天退沒因如是一切
如來現前皆悉了知知諸衆生心之流注有
煩惱心無煩惱心若干衆生諸根調伏若干
衆生諸根不調如來悉知如來如是於現前
境無二智轉不二現行亦爲衆生如是宣說
是爲如來第三十二正覺不共甚深事業爾
時世尊欲重宣此義而說偈言

如來境界無邊際 不可思議不可稱
無有等等如虛空 一切衆生豈能測
十方所有衆生類 現前境界事業殊

如來一切悉能知 最勝自然之智業

善男子此三十二如來甚深事業諸佛皆悉
具足圓滿爲欲調伏一切衆生令其悟入略
說少分而實如來所有事業無量無邊非可
宣說善男子如來復有真實事業無有分量

不可思議一切世間所不能測一切文字所不能宣一切心識不能解了一切智慧不能趣入周徧一切安立刹土隨順一切佛平等智超過一切世間事業種種施爲而無所作體性平等猶如虛空法界現前無有分別何以故善男子諸佛世尊顯示法界無二性故種種諸法種種衆生種種刹土種種心識種種解脫種種涅槃如是諸法若體若相畢竟空故善男子如來如自覺法界一味無相離因緣法欲令衆生平等悟入猶如虛空無礙法故爲諸衆生轉不退轉無上法輪善男子譬如巧匠善能磨瑩摩尼妙寶善知寶性採之山石以乞又羅藥用水塗磨以殺羊毛縱以瑩拭瑩拭不已又以別藥名利醋味和水潤之輒木揩拭功猶未已復用摩訶薜舍

第七

五

遮藥以微細物而瑩拭之尚未有光便入熾火焚燒七日餘石礦穢一切銷除知非假寶名爲無價摩訶瑠璃摩尼妙寶善男子諸佛如來亦復如是知諸衆生愛樂生死不淨垢穢爲說無常苦空無我不淨之法令生厭離入於聖法調伏身心如是如來精進未息次爲說空無相無願故令其知覺悟佛眼如來精進亦復未已次復爲轉不退法輪如來精進亦未休息最後爲說三輪清淨如來境界令諸衆生明了因緣見法本性乃至晉入一切如來平等法體善男子是故汝等應如是解不可思議如來事業若諸菩薩安住於此不可思議如來事業雖於諸法心得平等而隨順知一切諸法離諸過失雖能隨順三世平等而不斷絕三寶種性雖知身性猶如虛

空本無搖動而於十方一切佛刹普現其身
雖知諸法體不可說而以語言出隨類音說
一切法雖隨衆生心行不同說諸因緣而離
衆生及諸法相善男子諸佛如來爲欲清淨
菩薩心故出興於世而實如來無有變異常
住於此難思事業不捨精進授菩薩記說法
不斷爾時世尊說此如來難思事業深法門
已十方無量阿僧企耶出過算數諸佛刹土
地六震動放大光明雨衆天華此大會中諸
大威德無量菩薩欲色諸天南閻浮提十六
大國及諸小王龍神夜叉乾闥婆阿修羅迦
樓羅緊那羅摩睺羅伽人非人等及比丘比
丘尼優婆塞優婆夷聞此法門心淨歡喜踊
躍無量以諸供具供養於佛所謂種種妙華
種種名香塗香栴香衣服瓔珞幢幡鬘蓋以

爲供養或以種種微妙音聲歌詠讚歎恭敬
供養或以頂上髻中明珠額上明珠耳瑠頸
珠而用供養或以摩尼妙寶瓔珞真珠瓔珞
月形瓔珞嚴諸身分種種瓔珞寶鎖寶印寶
釧寶環寶鏡寶帶寶篋寶冠衆妙衣服種種
嚴具諸妙鈴鐸俱散道場恭敬供養或以種
種妙寶供養所謂吠瑠璃寶閻浮洲寶阿濕
摩摩寶室利摩寶寶因陀羅尼羅寶紅頗
胝迦寶如火色寶火燄光寶無邊色寶如是
等寶奉獻於佛以爲供養復有衆生以金銀
等種種寶栴而爲供養或以沈香多伽樓香
隨時之香妙栴檀香龍華鬚香赤真珠香以
如是等種種香栴而以奉散或復有散種種
天華以爲供養所謂波利耶怛羅迦華曼陀
羅華摩訶曼陀羅華曼殊沙華摩訶曼殊沙

華盧遮迦華摩訶盧遮迦華薩佗^上羅華摩

訶薩陀^上羅華斫羯羅華無垢斫羯羅華百

葉華千葉華百千葉華普光華普香華光燄

華最勝華無邊色華大普徧華愛樂見華而

以供養或有衆生散陸生華所謂縛哩色枳

華蘇曼那華拘蘇摩華阿提目多迦華瞻博

迦華阿輸迦華馱努色迦哩迦華波吒羅華

目真隣陀華摩訶目真隣陀華或有衆生以

水生華奉散供養所謂優鉢羅華波頭摩華

拘物頭華芬陀利華散如是等種種妙華供

養於佛一切諸天於虛空中奏諸天樂清雅

寥亮微妙音聲以爲供養所謂簫笛箏篳琵

琶螺貝種種天鼓美妙聲鼓種種歌舞恭敬

稱歎供養於佛復雨種種天諸妙華種種殊

香種種妙寶種種瓔珞種種衣服如是微妙

諸天供具供養於佛爾時十方所有世界諸

大菩薩摩訶薩衆俱來集會及此衆中諸菩

薩等爲供養佛皆昇虛空各各變身作三形

像纔變身已菩薩力故以衆寶網徧覆大會

其網周帀遶菩提樹於其四面各四由旬皆

厚八步種種真珠瓔珞周垂懸衆網鐸寶鈴

和鳴衆寶蓮華以爲校飾其珠瓔珞一一珠

中皆有無量無數菩薩俱時出現現已恭敬

遶佛七帀遶佛畢已爲諸菩薩一一各化衆

寶蓮華師子之座爾時十方無量佛刹一一

如來皆以自在威神力故各令如意寶樹寶

網及諸希有殊特供具平等普至娑婆世界

菩提樹下羅列寶樹周帀圍遶分布供具莊

嚴道場爲欲供養釋迦如來及此經故作此

莊嚴供養之時此會無量無數衆生發阿耨

多羅三藐三菩提心無量菩薩得無生法忍
爾時世尊普觀一切菩薩大衆作如是言諸
佛子等誰能發起廣大誓願以大威德能留
於此不可思議種種妙寶莊嚴道場瓔珞網
覆菩薩住處及十方來諸如意樹華菓間列

爾七

發燄含輝常無變易待彌勒佛下生之時年
方十六坐於道場正覺始圖說此守護國界
主經開示演說此陀羅尼當爾之時以伸供
養乃至賢劫千佛出現亦復如是以為供養
說是語時於此會中有一菩薩名神通自在
王於蓮華座整身威儀右膝著於蓮華之臺
恭敬合掌而白佛言世尊我能如是如佛教
勅留此道場供養慈氏乃至賢劫一切如來
應正等覺爾時會有神通魔名妙建立住
四大洲聞此語已即白神通自在王菩薩言

聖者以何等器安置於此衆寶瓔珞莊嚴道
場經爾所時令不損壞時神通自在王菩薩
語彼魔言仁者當知一切器物速疾破壞多
諸障礙虛空為器不可損壞無有障礙一切
器中此為最勝汝勿瞬目諦觀我身自當見
我廣大之器魔如其教諦觀菩薩見菩薩身
齋輪之中有一世界名水光王謂此世界大
水彌漫猶如大海故立其名於此界中有一
如來名吉祥寶蓮華如來應供正徧知明行
足善逝世間解無上士調御丈夫天人師佛
世尊唯有清淨大菩薩衆於其水中彌漫生
於衆寶蓮華吉祥如來坐寶華王諸菩薩衆
俱坐寶華恭敬圍繞時彼如來於大衆中說
深妙法示教利喜時神通魔見是事已即起
合掌恭敬禮拜神通自在王菩薩爾時菩薩

爾七

九

而告之言仁者見於菩薩如是廣大器不魔
言已見奇哉大士能辦是事如是大器百千
俱胝那由佗劫亦不可壞故此大寶莊嚴道
場任持無缺無垢清淨無有變異于何不可
時神通魔說此語已頂禮佛足而白佛言世
尊我自思惟於過去世未曾見此神通自在
王菩薩神通之事未曾聞此法門之時於聲
聞乘勤行精進欲出三界自求涅槃我於今
日見聞是已便於阿耨多羅三藐三菩提發
起決定極深重心世尊設令我於恒河沙劫
處大地獄受種種苦然後得成阿耨多羅三
藐三菩提我甘此苦終不捨於菩提之心爾
時世尊稱讚魔言善哉善哉汝大丈夫能於
阿耨多羅三藐三菩提被大甲冑不久亦如
神通自在王菩薩具足圓滿一切功德

菩薩瓔珞莊嚴品第六之一

爾時十方種種佛刹諸來菩薩及此大會天
龍夜叉乾闥婆阿修羅迦樓羅緊那羅摩睺
羅伽人非人等及比丘比丘尼優婆塞優婆
夷心生渴仰欲聞妙法爾時世尊知此衆會
心之所念樂欲聞法堪持法藏歡喜怡暢復
欲重爲開示顯說守護國界主陀羅尼經放
大人相無見頂光此光名爲不捨精進光徧
遶此菩薩大會經七帀已復遶文殊師利童
子百千萬帀作是事已入文殊頂其光入已
令文殊身及其所處師子之座威德光明過
於大衆百千萬倍猶如滿月映奪衆星爾時
文殊師利童子蒙佛威神即從座起偏袒右
肩胡跪合掌讚佛功德而說偈言
佛放身智大光明 普眼見盡無餘義

本性自然諸善巧 不思議德悉皆圓
丈夫牛王放大光 普照徧淨於三業
遶我經於百千匝 遶已從頂入身心
我昔智慧及辯才 總持光照皆微妙
人天主光纔觸我 超過千倍勝於前
清涼我身淨我心 踊躍歡喜皆平等
佛智妙辯無邊際 悉皆流入我身中
如來威德量難知 少力不能持念此
承佛智力今諮問 爲欲利樂諸衆生
爲入菩薩諸行門 復令諸佛出興世
神通放光灌頂智 願成此德問如來
此衆集會廣無邊 最上乘中已修入
餘未得者傾心念 爲利樂彼問如來
願無等智順時機 開妙法藏利含識
魔王眷屬當摧殄 於如來教善修持

第七

十一

大雄智慧無有邊 善巧無窮無際限
而我智慧不能了 是故諮問於如來
世尊智慧如實知 於無量劫長時轉
曠劫勤修今自在 願開佛智示衆生
爾時文殊師利菩薩說此偈已白佛言世尊
如來境界不可思議非是菩薩稱量境界而
佛智慧說法無倦大悲憐愍不捨衆生故我
承力敢欲諮問世尊云何名爲菩薩瓔珞云
何菩薩瓔珞莊嚴云何菩薩得殊勝行云何
菩薩得不思議妙法光明遠離愚闇及諸疑
惑云何菩薩得於如來大法明門悉能清淨
善哉世尊惟願爲我決定宣說諸菩薩衆出
生法門若諸菩薩得聞此已能破諸魔煩惱
冤敵入一切法永無疑惑現前了知如來境
界漸次深入諸菩薩境復能漸入一切智境

知衆生心淨衆生行遊諸佛刹摧伏魔軍速
能攝受一切佛教於一切法自在而轉爾時
世尊告文殊師利菩薩言善哉善哉善男子
汝能發起大勇猛心作師子吼問於如來如
是妙義汝已能於一切如來無量境界明了
通達能問斯義善男子諦聽諦聽善思念之
吾當爲汝分別解說如是境界及餘無量諸
功德法自在而轉文殊師利唯然受教佛告
文殊師利言善男子一切菩薩皆悉具有四
種瓔珞云何爲四所謂戒爲瓔珞定爲瓔珞
慧爲瓔珞陀羅尼門以爲瓔珞是名爲四善
男子云何名爲戒爲瓔珞善男子菩薩有一
淨戒瓔珞謂於衆生起無瞋恚無障礙心令
諸衆生見皆歡喜無有厭足復次善男子菩
薩有二淨戒瓔珞所謂閉惡趣門開人天路

第七

十二

復次善男子菩薩有三淨戒瓔珞謂身口意
皆悉清淨復次善男子菩薩有四淨戒瓔珞
謂所欲皆遂所願皆成所樂皆得始終究竟
復次善男子菩薩有五淨戒瓔珞謂具足三
昧具足智慧具足解脫具足解脫知見具足
大般涅槃復次善男子菩薩有六淨戒瓔珞
謂不破戒終無悔故不穿漏戒無餘過故不
雜戒無和合故清淨戒長白法故自在戒隨
意所往體具足故自在轉戒於一切時智自
在故復次善男子菩薩有七淨戒瓔珞所謂
施得清淨忍得清淨勤得清淨定得清淨慧
得清淨方便得清淨不放逸得清淨復次善
男子菩薩有八淨戒瓔珞各別圓滿所謂十
地圓滿不悔圓滿不懈怠圓滿不嫌恨圓滿
供養佛圓滿離八難圓滿修布施圓滿得善

友圓滿復次善男子菩薩有九淨戒瓔珞云何爲九所謂得無所畏得無驚怖得決定心得近寂靜得調伏心得無貪心得勇悍心得知一切衆生心念得寂靜地是名爲九復次善男子菩薩有十淨戒瓔珞云何爲十所謂

第七

十三

身瓔珞圓滿相好爲莊嚴故語瓔珞如說修行爲莊嚴故意瓔珞以無煩惱爲莊嚴故利土瓔珞以圓滿願爲莊嚴故利佗瓔珞能清淨心爲莊嚴故生處瓔珞不造諸惡爲莊嚴故菩薩行瓔珞隨學佛行爲莊嚴故智慧瓔珞了一切法皆悉幻化爲莊嚴故菩提場瓔珞一切善根皆悉迴向爲莊嚴故力無所畏佛不共法以爲瓔珞不捨淨戒根本體性爲莊嚴故是名爲十善男子云何菩薩修諸三昧瓔珞莊嚴善男子菩薩有於一種三昧瓔

珞莊嚴云何爲一謂於一切衆生界中發起慈心善男子菩薩復有二種三昧瓔珞莊嚴謂質直心及柔軟心菩薩復有三種三昧瓔珞莊嚴所謂非幻非諂非假菩薩復有四種三昧瓔珞莊嚴謂不隨順欲不隨順瞋不順於癡不順於怖菩薩復有五種三昧瓔珞莊嚴所謂斷於五種障礙一者愛欲二者瞋害三者昏沈四者掉悔五者疑心斷此五蓋以爲莊嚴菩薩復有六種三昧瓔珞莊嚴謂念佛念法念僧念戒念捨念天菩薩復有七種三昧瓔珞莊嚴謂不忘失菩提之心隨順修學七菩提分謂念覺分擇法覺分精進覺分喜覺分輕安覺分捨覺分定覺分菩薩復有八種三昧瓔珞莊嚴謂八聖道正見正思惟正語正業正命正精進正念正定菩薩復有

九種三昧瓔珞莊嚴云何爲九善男子此菩薩心無有忘失大悲威力不捨衆生修習建立九次第定謂離欲惡不善法有尋有伺離生喜樂入於初禪得圓滿住除滅尋伺內淨一心無尋無伺定生喜樂入第二禪得圓滿住離喜住捨有念正知身受樂諸聖所說能捨有念受樂入第三禪得圓滿住斷樂先除苦憂喜已滅不苦不樂捨念清淨入第四禪得圓滿住超一切色想滅有對想不念種種想入無邊虛空於空無邊處得圓滿住超過一切空無邊處入無邊識於無邊識處得圓滿住超一切識無邊處入無少所有於無所有處得圓滿住超過一切無所有處入非想非非想處於非想非非想處得圓滿住超過一切非想非非想處入滅受想定於滅受想

定得圓滿住如是善巧方便力故真際現前由先滅力於此安住然後利樂一切衆生隨諸法門令得成熟是名菩薩九種三昧瓔珞莊嚴善男子菩薩復有十種三昧瓔珞莊嚴何等爲十所謂法性無亂故妙定圓滿故不捨精進故常樂寂靜故不斷善根故心不散亂故身得安樂故觀察諸法故得心自在故得聖種性故善男子此是菩薩十種三昧瓔珞莊嚴善男子云何名爲菩薩智慧瓔珞莊嚴善男子菩薩摩訶薩有一智慧瓔珞莊嚴云何爲一所謂一切法中斷除疑惑復次善男子菩薩復有二種智慧瓔珞莊嚴謂遠離惡作現起煩惱等菩薩復有三種智慧瓔珞莊嚴謂除愚癡破無明藏除去黑暗菩薩復有四種智慧瓔珞莊嚴謂知苦智慧斷集智

慧證滅智慧修道智慧菩薩復有五種智慧
瓔珞莊嚴謂戒蘊清淨戒體如空不可得故
定蘊清淨發勝智慧超動念故解脫蘊清淨
一切諸法體無二故解脫知見蘊清淨了知
三世體平等故法蘊清淨諸法體性無染著
故菩薩復有六種智慧瓔珞莊嚴謂布施波
羅蜜多三輪清淨謂我輪清淨知我如幻體
平等故衆生輪清淨了所化生皆如夢故菩
提心輪清淨不求世間異熟果故淨戒波羅
蜜多三輪清淨謂身輪清淨猶如鏡像體平
等故語輪清淨猶如谷響體平等故意輪清
淨了心如幻體平等故安忍波羅蜜多三輪
清淨謂離瞋清淨忍受麤惡加毀辱故離愛
清淨斷於稱讚敬養等故斷支節清淨觀察
法身體無二故精進波羅蜜多三輪清淨謂

無功用清淨觀察生死猶如夢故堅固清淨
心如金剛不可壞故捨清淨超過諸相無取
捨故靜慮波羅蜜多三輪清淨謂本性清淨
無轉智故妙觀清淨無執著故因緣清淨生
神通故方便波羅蜜多三輪清淨謂財攝清
淨成熟一切衆生界故總持清淨受持一切
妙法門故大願清淨莊嚴種種淨佛刹故菩
薩復有七種智慧瓔珞莊嚴所謂無念智慧
住於離念四念住故無生滅智住正斷故身
心寂靜住神足故具知根智住諸根故摧破
四魔住諸力故知法本性住七覺故知去來
智住八聖故菩薩復有八種智慧瓔珞莊嚴
謂知妙上智入寂靜故知深觀智無翳障故
知諸蘊智悟法蘊故知諸界智空平等故知
諸處智了空聚故知因緣智住無我故知真

諦智心無亂故知猷離智如實觀察真實法
故菩薩復有九種智慧瓔珞莊嚴云何爲九
謂知過去智前際清淨故知未來智後際清
淨故知現在智中際清淨故知正定智因無
滅故知不定智緣和合故知邪定智邪業成
故佛平等智法身德故法平等智法無染故
僧平等智無爲德故是名爲九菩薩復有十
種智慧瓔珞莊嚴何等爲十所謂知如幻智
積集相故知如夢智分別相故知如燄智輪
轉相故知如像智不往來故知如影智因緣
合故知如響智緣起相故知法界智不可壞
故知真如智無住相故知真際智湛然淨故
知有爲智無爲性故是名爲十善男子是名
菩薩十種智慧瓔珞莊嚴善男子云何名爲
一切菩薩陀羅尼門瓔珞莊嚴善男子菩薩

第十七

十七

有一陀羅尼門瓔珞莊嚴云何爲一所謂正
念不忘復次善男子菩薩有二陀羅尼門瓔
珞莊嚴謂文持義持菩薩有三陀羅尼門瓔
珞莊嚴謂於義善巧於文善巧分析善巧菩
薩有四陀羅尼門瓔珞莊嚴謂不著語不謬
誑語分明辯語無雜亂語菩薩有五陀羅尼
門瓔珞莊嚴謂知所聞義隨順行故知諸文
身隨順行故知了義經隨順行故知於一切
補特伽羅音聲法智隨順行故知諸世間出
世間法隨順行故菩薩有六陀羅尼門瓔珞
莊嚴所謂如所說理而修行故證真起說隨
宜演故所言誠諦無諂誑故言常威德不捨
大悲說正法故善知根器巧能演說無缺減
故得世間智知時而說不非時故菩薩有七
陀羅尼門瓔珞莊嚴所謂迅疾辯捷利辯如

意辯無著辯威德辯無錯謬辯一切世間最
上妙辯菩薩有八陀羅尼門瓔珞莊嚴所謂
善知天語龍語夜叉語乾闥婆語阿脩羅語
迦樓羅語緊那羅語摩睺羅伽語人非人等
乃至一切衆生語言菩薩有九陀羅尼門瓔
珞莊嚴何等爲九所謂處衆無畏摧諸異學
說法無畏善答問難知廣大說知隨意說行
正直行顯金剛力示現劫燒破著常想說諸
乘法成熟衆生是名爲九菩薩有十陀羅尼
門瓔珞莊嚴云何爲十所謂善能除斷一切
疑難善知一切廣大法門善得無師自然智
慧善說無盡字句法門善說一切圓滿深義
善能開示無邊佛法善說無邊煩惱過患善
說無量深解脫門善能深入衆生根性善入
如來無著無礙辯才智慧是名爲十善男子

第七

十八

是名菩薩陀羅尼門瓔珞莊嚴

守護國界主陀羅尼經卷第七

音釋

翳於計切殺公土切綫他感切措丘皆切礦
古猛切銅當都郎切頸居影切孽魚列切瞬
鐵璞石也耳徒典切捷疾葉切
輪閏切也齋音殄滅也捷敏疾切

守護國界主陀羅尼經卷第八

蘭八

唐 闍賓國 三藏 般若等 譯

菩薩瓔珞莊嚴品第六之二

爾時世尊欲重宣此四瓔珞義而說偈言

大智慧者四瓔珞 莊嚴最上第一乘

淨戒三昧智慧門 勝妙真言決定說

無瞋衆生皆愛樂 關閉一切惡趣門

能令智者處人天 此圓滿戒爲瓔珞

身口意業皆清淨 所有願欲悉皆圓

正精進行堅固求 此戒瓔珞莊嚴體

成就定慧及解脫 解脫知見亦復然

及證無上大涅槃 此戒瓔珞莊嚴體

不破尸羅清淨戒 淳淨無雜及清心

得身自在法亦然 此戒瓔珞莊嚴體

若得具於清淨施 安忍精進淨亦然

諸禪智慧方便門 及不放逸皆清淨

不動堅固妙安立 甚深教證無退心

遠離懶惰知足修 此戒清淨莊嚴體

聖者讚戒勤精進 彼人憂惱永不生

所作衆善無悔心 此即淨戒莊嚴體

處衆無畏無驚怖 得極決定寂靜心

三有牢獄不能羈 得大名稱堪任力

既自調伏知他意 此即淨戒所莊嚴

以諸相好莊嚴身 即是淨戒莊嚴體

如說而行能淨語 即具足智語莊嚴

得無煩惱莊嚴心 即是淨戒之瓔珞

最勝大願嚴佛刹 成就衆生第一乘

不造一切惡業因 令所生處皆嚴飾

學佛能嚴菩薩行 善根迴向嚴道場

力無畏法盡莊嚴 亦復莊嚴變化智

慈定瓔珞能徧覆 柔和質直智皆圓
已絕幻偽諂誑心 愛患癡怖無隨轉
斷除五蓋爲瓔珞 勤修六念所莊嚴
七覺八道三摩提 九次第定常修習
稱性勤修於止觀 樂住寂靜諦思惟
正念不斷諸善根 得聖種性心自在
智於諸法無疑惑 現前惡作永不生
無明癡闇悉皆除 於諦智中光普照
苦集滅道智清淨 不可得故淨尸羅
超過念慧清淨禪 二相兼忘淨解脫
知見不著於三世 法蘊清淨無染成
亦無能念清淨心 智慧莊嚴皆具足
由依智慧爲瓔珞 能淨施戒等三輪
以無住相施衆生 便得布施三輪淨
衆生菩提及自己 知如夢幻無所求

以智慧故戒莊嚴 便能得戒三輪淨
身語及心如鏡像 如響如幻淨無瑕
以智慧故忍莊嚴 彼忍三輪盡清淨
智達無高亦無下 常觀淨妙真法身
以智慧故勤莊嚴 精進三輪亦清淨
其心任運能堅固 無取無捨相皆空
以智慧故定莊嚴 禪定便得三輪淨
本性深觀因緣淨 無動無著起神通
以智慧故方便嚴 彼得三輪盡清淨
善攝真言願精進 化生妙法剎莊嚴
常住念處無念心 正斷之中心不二
欲勤心觀神通足 知諸衆生根性殊
安住諸力摧衆魔 正念覺知諸法性
無去無來道亦爾 此名智慧瓔珞嚴
深入寂靜奢摩佗 毗鉢舍那無不照

了知法蘊成蘊智 知界平等如虛空
 諸處空聚亦善知 法本無我因緣起
 知四真諦無散亂 觀法真實厭世間
 三際智淨無著心 爲安衆生了三聚
 知三寶體同一相 皆智瓔珞所莊嚴
 智積聚相如幻成 分別根本皆如夢
 輪轉無實如陽燄 無往無來鏡像身
 因緣和合如影生 但從緣起猶如響
 法界真常性無壞 真諦無住始能知
 真際湛然不動搖 有爲無爲無二體
 此深廣智爲瓔珞 莊嚴菩薩證菩提
 得無忘念總持門 所聞諦義持無失
 一切字義微細了 善巧分析智常通
 執著審訥語皆亡 詞理分明無錯亂
 隨所聞法常求義 於文具足智超勝

依了義經之所行 知法體中無我相
 善知世法出世法 皆是總持之所嚴
 隨真諦轉如法行 知時說法人敬受
 說此法者無空過 順時無缺無悔心
 獲得速疾妙辯才 捷利如意無所著
 具德無錯妙分析 如髮巧飾妙莊嚴
 善知天龍諸語言 夜叉乾闥阿蘇洛
 迦樓緊那摩睺等 一切衆生諸語言
 處衆無畏如牛王 摧諸外道如香象
 說法無畏如師子 問難皆答如泉流
 說廣大法摧慢山 隨心樂說皆如意
 兇惡爲現金剛像 劫火焚燒五欲心
 隨機所樂說三乘 是義非義皆明斷
 顯示覺悟廣大法 自然智現不從師
 說無盡字智無餘 解微細義皆圓滿

說諸佛法無邊際 知煩惱過亦無邊
解脫功德難稱量 知衆生根無不盡
得佛所說四無畏 祕密瓔珞作莊嚴
彼諸瓔珞莊嚴身 已說未說諸功德
設復精勤經劫演 所有功德不能窮

爾時文殊師利菩薩聞是法已即從座起合
掌恭敬頂禮佛足而白佛言希有世尊佛出
世間說勝妙法多所利樂一切衆生皆稱根
性令其歡喜於未來世能生菩薩一切善根
能令一切初發心者生清淨心趣向菩提行
一乘道得不退轉受佛灌頂即於此生得菩
提分一生當證無上菩提顯此菩薩因果不
減正定衆生爲說其因邪定衆生示現大悲
久令趣入不定衆生各隨其心差別安處樂
三乘者各隨其根令願滿足乃至天人阿脩

第八

五

羅等一切世間悉令莊嚴所以者何若佛出
世則如是等種種希有奇特之法皆悉出現
大菩薩衆寶座寶帳種種寶樹微妙莊嚴大
會道場悉皆出現一切聲聞及辟支佛於百
千劫不能思量況能顯示世尊如我惟忖無
智衆生甚爲可愍佛說如是甚深大乘顯示
如是奇特道場不能發起大菩提心而反希
求二乘涅槃繫人天安樂故爲可愍何以故菩
薩初發菩提之心所有功德無量無邊一切
二乘不能及故世尊譬如有人棄捨無價吠
瑠璃寶乃取假偽瑠璃之珠一切衆生亦復
如是棄捨大乘乃求聲聞緣覺菩提人天安
樂世尊若善男子善女人等聞此法門或已
發起大菩提或當發起不久皆得無上菩提
及前所說殊勝功德具足圓滿說此瓔珞法

門之時於此會中三十俱胝那由佗百千衆生皆發阿耨多羅三藐三菩提心

大光普照莊嚴品第七

爾時世尊普觀菩薩人天大衆知其於法深生渴仰心未滿足告文殊師利菩薩言善男子菩薩摩訶薩有於八種大光普照莊嚴法門彼光照故心開明了遠離愚闇以大丈夫菩薩莊嚴而嚴其身修菩薩行及安衆生於此行中何等爲八所謂念光普照意光普照解光普照法光普照智光普照諦光普照神通光普照修行光普照是爲八種光照莊嚴善男子云何名爲念光普照善男子菩薩有八念光普照莊嚴云何爲八所謂一者憶念昔善常不忘失二者未修善根當令增長三者隨所聞法憶持不忘四者於其深義微細

解了五者其心不隨六塵境轉六者恒以正念守護根門七者爲斷一切不善法故爲今善法得圓滿故常念諸佛八者爲欲守護諸佛法城念爲先導得大光明善男子是名菩薩八種念光普照莊嚴善男子菩薩有八意光普照莊嚴云何爲八所謂依於義意不依語意依於智意不依識意依於法意不依煩惱意依於理意不依於非理意依菩提心意不依二乘意依廣大意不依狹劣意依於佛意不依於衆魔意依大悲意不依損害衆生之意是名菩薩八種意光普照莊嚴善男子菩薩有八解光普照莊嚴能知諸法何等爲八所謂知一切法知衆生行知衆生心知四無礙知法體性本有光明知於廣大莊嚴之法知於了義不了義法知一切佛深廣妙法

是名菩薩八種解光普照莊嚴善男子菩薩
有八法光普照莊嚴云何爲八所謂世間法
光照莊嚴說諸衆生所造業故出世間法光
照莊嚴爲求解脫諸衆生等說般若故無過
染法光照莊嚴修習妙智及聖道故無煩惱
法光照莊嚴不起欲有無明見故爲無爲法
光照莊嚴無作解脫常現前故聖煩惱法光
照莊嚴觀察煩惱客塵相故無煩惱法光照
莊嚴知心本性淨光明故大涅槃法光照莊
嚴知一切法本寂滅故是爲菩薩八種法光
普照莊嚴善男子菩薩有八智光普照莊嚴
何等爲八所謂八人智光照莊嚴須陀洹智
光照莊嚴斯陀含智光照莊嚴阿那含智光
照莊嚴阿羅漢智光照莊嚴辟支佛智光照
莊嚴諸菩薩智光照莊嚴佛菩提智光照莊

嚴是名菩薩八種智光照莊嚴善男子菩薩
有八諦光普照莊嚴何等爲八所謂修習真
諦能得解脫現前覺故是爲菩薩第一諦光
普照莊嚴修習真諦得須陀洹是爲第二光
照莊嚴修習真諦得斯陀含是爲第三光照
莊嚴修習真諦得阿那含是爲第四光照莊
嚴修習真諦得阿羅漢是爲第五光照莊嚴
修習真諦得辟支佛是爲第六光照莊嚴修
習真諦得菩薩忍是爲第七光照莊嚴修習
真諦悟佛菩提是爲第八光照莊嚴是名菩
薩八種諦光普照莊嚴善男子菩薩有八神
通大光普照莊嚴何等爲八所謂光明大光
普照莊嚴天眼見盡種種色故微細智慧光
照莊嚴天耳遠聞種種法故隨順正念光照
莊嚴憶念過去無量劫中宿住事故本性智

慧光照莊嚴微細善觀衆生心故知虛空性
無有障礙光照莊嚴無邊類刹自在行故清
淨智慧光照莊嚴無煩惱智得圓滿故大福
德聚光照莊嚴養育慈念諸衆生故大智慧
聚光照莊嚴斷諸衆生種種疑故是名菩薩
八種神通光照莊嚴善男子菩薩有九修行
因此光照莊嚴何等爲九所謂從修行因得
智光照以爲莊嚴從修行因得於般若光照
莊嚴從修行因得於覺悟光照莊嚴從修行
因得於正見光照莊嚴從修行因得於奢摩
佗光照莊嚴從修行因得於深妙觀光照莊
嚴從修行因得知佗心光照莊嚴從修行因
得不退動及正解脫光照莊嚴從修行因得
極究竟光照莊嚴是名菩薩九修行因得普
光照以爲莊嚴爾時世尊欲重宣此義而說

偈言

過去世業淨	利生念不忘	定慧積善根
爲物皆迴向	隨聞正憶念	深義微細知
正念守根門	塵境居然靜	惡法不應作
善法要當修	圓滿念莊嚴	自得佛加護
法城能善守	勝法利衆生	離闇慧光圓
能益人天衆	得此念光照	疑惑悉皆除
自然念智中	速證菩提果	以義莊嚴意
不隨聲及文	依智清淨修	不依分別說
法智莊嚴意	破惑離愚癡	般若教智圓
菩提無錯亂	求勝菩提意	不雜於二乘
廣大無劣心	順佛違魔教	大悲莊嚴意
不暫惱衆生	所知法無疑	不了義善巧
知衆生無畏	無礙智無邊	作者本來空
了法因緣起	善巧廣大說	勝要甚深門

諸佛法無邊	解了皆窮盡	以世法光照
衆生業悉知	出世法光明	般若虛空相
有過及無過	自在智皆知	智契聖道修
利物皆招果	有漏及無漏	法光無不知
永斷煩惱源	能作人天益	有爲無爲法
智慧常順知	垢穢並皆無	諸行得決定
遠離生死法	無礙智常行	知煩惱根源
性淨光明體	解脫涅槃法	生起本來如
無邊法光明	莊嚴大乘體	第八人地智
須陀洹亦然	及與斯陀舍	阿那含亦爾
羅漢辟支佛	菩薩及如來	智於此法中
一一皆隨轉	諦光照具足	勇健妙修行
衆因得果圓	不變真勝義	修習諸聖諦
入解脫果門	四果次第成	緣覺菩薩忍
能摧諸異道	猶如師子王	覺悟佛菩提

皆由諦光照 神通天眼見 微細色無遺
天耳分明聞 十方聲普了 念昔那由劫
法界諸如來 善知衆生心 自然智光照
自在遊諸刹 智光照無遺 色相如虛空
無漏光嚴體 具足無邊福 徧育諸衆生
無著智莊嚴 有情疑網斷 因修得智慧
覺悟辨無邊 正見止觀心 究竟無邊際
知教行具足 心念法智圓 諦光及神通
光照莊嚴法 八種皆清淨 是大威德光
雖未得菩提 能作諸佛事

爾時世尊說此神通大光普照莊嚴法已十
方佛刹諸來菩薩及諸人天比丘比丘尼優
婆塞優婆夷種種供養恭敬禮拜無量無數
無邊衆生皆發阿耨多羅三藐三菩提心無
量菩薩得無生法忍

般若根本事業莊嚴品第八

爾時會中有一菩薩名般若峯承佛神力即從座起偏袒右肩頂禮佛足右膝著地恭敬合掌而白佛言世尊如佛所說諸大菩薩迴向莊嚴陀羅尼門諸佛菩薩大悲事業菩薩瓔珞大光普明莊嚴法門云何修得彼一切法爲以何法而爲根本云何得已永不忘失慈念養育一切衆生爾時世尊告般若峯菩薩摩訶薩言善男子菩薩若時能於甚深般若根本安住不動及能作於般若事業則得如前迴向總持乃至光照莊嚴功德得已不失即是生長養育一切衆生之處時般若峯菩薩復白佛言善哉世尊願爲我說云何名爲般若根本云何名爲般若事業佛言善男子諦聽諦聽善思念之吾當爲汝分別解說

爾八

十一

善男子般若根本能生般若即般若母般若事業即是所生善男子若諸菩薩聞所未聞一切法門即是般若根本之母如其所聞廣爲他說即是般若所作事業隨所聞法審諦思惟即是般若根本之母若思惟已爲他顯示即是般若所作事業正念觀察是般若母安置衆生於正念中是般若業所作精進是般若母正修行時是般若業自心明了是般若母顯示他人是般若業樂住寂靜是般若母知本寂靜是般若業樂於獨處是般若母一道清淨是般若業修行妙觀是般若母得慧解脫是般若業修三脫門是般若母三智現前是般若業修習念處是般若母離念清淨是般若業修習正斷是般若母知法性斷是般若業修習神足是般若母無功用行是

般若業能信因緣是般若母超過諸著是般若
若業精純無雜是般若母身心安樂是般若
業常念善法是般若母不住念相是般若業
知定次第是般若母得性等引是般若業修
習慧根是般若母善知過去展轉根性是般若
若業堅住五力是般若母能摧諸魔是般若
業順忍七種菩提分法是般若母知諸法性
隨順覺悟是般若業集聖道分是般若母知
如筏喻既悟法體不住於法及與非法是般若
若業善能修行苦集滅道是般若母滅諦現
前是般若業微細觀察不了義經是般若母
依了義經隨順修行是般若業隨所聞法總
持不忘是般若母隨義修行是般若業依智
觀察是般若母隨順智行是般若業不執我
人是般若母依法修行是般若業觀察諸法

第八

十二

皆悉無常是般若母知一切法本不生滅是
般若業觀察諸行悉皆是苦是般若母了一
切法本無有行是般若業微細觀察諸法無
我是般若母知諸眾生本清淨智是般若業
微細觀察涅槃寂靜是般若母知一切法本
自涅槃是般若業聞甚深義心不驚怖是般若
母得義無礙是般若業聞勝義諦心不驚
怖是般若母得法無礙是般若業聞妙言詞
分析句義心不驚怖是般若母得詞無礙是
般若業聞佛辯才而不驚怖是般若母得辯
無礙是般若業因於眾生及法緣慈是般若
母無緣之慈是般若業爲自他悲是般若母
遠離自他二種大悲是般若業思惟法喜是
般若母無取無捨是般若業離貪瞋捨是般若
母無二種捨是般若業常念諸佛是般若

母解了法身是般若業常念於法是般若母
於法無染是般若業專心念僧是般若母觀
無爲性是般若業常念於捨是般若母捨諸
煩惱是般若業常念淨戒是般若母知無行
戒是般若業常念於天是般若母法體清淨
是般若業具足多聞是般若母處衆無畏是
般若業修勝善業是般若母知無業報是般
若業知佛變化是般若母得大智慧是般若
業爲自利已是般若母自利利他是般若業
能於八萬四千法蘊平等受持是般若母得
於八萬四千法智是般若業知說法智是般
若母知說不空是般若業教令衆生發菩提
心是般若母安置衆生般若波羅蜜多方便
善巧不退地中是般若業怖畏三有因業受
生是般若母不捨生死隨意受身是般若業

忍受音聲是般若母修行性忍是般若業若
得盡智是般若母得無生智是般若業得隨
順忍是般若母得無生忍是般若業住不退
地是般若母得灌頂地是般若業坐菩提樹
是般若母知無不盡徧覺細念現證如如剎
那心滅與智相應得阿耨多羅三藐三菩提
此是菩薩般若業究竟莊嚴爾時世尊欲重
宣此義而說偈言

聞法不放逸	淨持般若母	慈力爲他說
勤修般若業	正念善思惟	此是般若母
思已爲他說	即般若事業	若正念修習
此是般若母	修已令他住	即般若事業
若修正精進	此是般若母	若修已演說
即般若事業	若心與智俱	此是般若母
若能說心智	即般若事業	若獨寂靜行

此是般若母	若無有身心	即般若事業
若遠離憤鬧	此是般若母	若獨住正念
即般若事業	若愛樂深觀	此是般若母
若得智解脫	即般若事業	若修三解脫
此是般若母	三智現在前	即般若事業
若修習念住	此是般若母	無念現在前
即般若事業	捨惡修善業	此是般若母
此法本性淨	即般若事業	修習四神足
此是般若母	神足無功用	即般若事業
深信解脫門	此是般若母	遠離心無著
即般若事業	常精進無減	此是般若母
若身心安樂	即般若事業	善念不放逸
此是般若母	不住一切處	即般若事業
妙定隨覺悟	此是般若母	本性等引行
即般若事業	若住妙慧根	此是般若母

知衆生諸根	即般若事業	若修習五力
此是般若母	得無摧伏智	即般若事業
順忍七覺分	此是般若母	隨覺諸法性
即般若事業	修習聖道支	此是般若母
能捨法非法	即般若事業	知苦惡集生
此是般若母	寂滅現在前	即般若事業
觀察不了義	此是般若母	依於了義經
即般若事業	聽法持無忘	此是般若母
隨教能奉行	即般若事業	不依識修禪
此是般若母	依智而奉行	即般若事業
無少人我執	此是般若母	依法而修行
即般若事業	知諸行無常	此是般若母
知法本不生	即般若事業	信諸行是苦
此是般若母	若知無有行	即般若事業
於空義觀察	此是般若母	順義無二邊

即般若事業	無我義斷疑	此是般若母
此法本清淨	即般若事業	信涅槃寂靜
此是般若母	衆生本性寂	即般若事業
隨順觀深義	此是般若母	隨覺義無礙
即般若事業	若深信法性	此是般若母
得法無礙解	即般若事業	聞諸聲無怖
此是般若母	分析詞無礙	即般若事業
心不怖辯才	此是般若母	得無礙辯才
即般若事業	因生法起慈	此是般若母
若得無緣慈	即般若事業	爲自作起悲
此是般若母	爲無二利悲	即般若事業
於法愛樂喜	此是般若母	無憂無愛喜
即般若事業	若能無愛患	此是般若母
於二得解脫	即般若事業	具足念諸佛
此是般若母	若隨順法身	即般若事業

恒時能念法	此是般若母	若知法無著
即般若事業	得具足念僧	此是般若母
於無爲隨覺	即般若事業	智者恒念捨
此是般若母	若捨諸煩惱	即般若事業
若念清淨戒	此是般若母	住無煩惱戒
即般若事業	念大威德天	此是般若母
恒念於寂靜	即般若事業	隨求聽聞法
此是般若母	更無法可求	即般若事業
能作妙善業	此是般若母	更無業可爲
即般若事業	知示現涅槃	此是般若母
得大智威德	即般若事業	得自利具足
此是般若母	能多利衆生	即般若事業
受持妙法蘊	此是般若母	知已悟衆生
即般若事業	若知他心智	此是般若母
住三乘出離	即般若事業	令起利他行

此是般若母	若能平等利	即般若事業
怖諸有焚燒	此是般若母	不捨於生死
即般若事業	隨順音聲忍	此是般若母
修行於性忍	即般若事業	若得於盡智
此是般若母	若得無生智	即般若事業
若修隨順忍	此是般若母	若得無生忍
即般若事業	若至不退地	此是般若母
若得灌頂地	即般若事業	若坐菩提樹
此是般若母	若得一切智	即般若事業
此諸般若業	由發菩提心	若得心解脫
成諸般若業	若於菩提心	常安住不動
則成般若母	常作諸事業	如是諸善業
及佛諸勝義	神力無礙辯	由勝菩提心
若讚菩提心	所有諸功德	經於多億劫
稱讚不能盡	以生三世佛	一切諸功德

故說菩提心 十方諸佛母 若有欲供養
無量寂靜尊 當發菩提心 福過供養佛
世尊說此般若波羅蜜母事業莊嚴法門時
十方無量無數佛刹六種震動此眾妙寶莊
嚴道場亦復震動爾時般若峯菩薩白佛言
世尊以何因緣此十方界無量無數諸佛刹
土六種震動此眾寶網莊嚴道場住在虛空
亦六震動佛告般若峯菩薩言善男子由此
般若波羅蜜母般若事業莊嚴法門過去諸
佛已說未來諸佛當說現在諸佛今說若諸
菩薩得此般若心如虛空無有住著我今爲
汝及此大衆說此法門以是因緣令諸世界
大地震動爾時眾中有一菩薩名無畏辯才
即從座起前白佛言世尊以何因緣而此菩
薩名般若峯佛言善男子乃往古昔有佛出

現名吉祥守護如來應供正徧知明行足善
逝世間解無上士調御丈夫天人師佛世尊
世界名妙有劫名無垢彼界衆生受種種樂
壽命半劫無中天者彼世界中所有人天色
相飲食宮殿樓閣受用資具皆等無異但人

地居天處虛空以分類別彼世界中唯佛法
王更無別王不事餘天亦不禮事諸餘神祇
不作餘業不起餘念唯勤供佛聽聞妙法不
處胎藏而皆化生無女人名亦無罪名無犯
戒名其中衆生唯常勤修此般若母般若事

卷八

十六之二

業莊嚴法門彼吉祥守護如來有四萬二千
諸菩薩衆八萬四千聲聞弟子善男子彼諸
菩薩皆有廣大無量無邊辯才智慧爾時彼
佛總集一百俱胝難問普告一切菩薩衆言
汝大衆中誰能勇猛發起出世大丈夫心總

集百俱胝難能於幾時一一難中各以百千
俱胝法門而解釋者時此會中或有菩薩前
白佛言我於一日當能解釋或有菩薩言七
日夜當能解釋或言半月或言一月或言六
月或言一年當解釋者是時會中有一菩薩

卷八

十六之三

名曰念意前白吉祥守護佛言世尊我當不
起于座不易威儀對於如來及大衆前悉能
解釋如是諸難說此語已即於此時作師子
吼現自在力令三千大千世界六種震動放
大光明普照世界令其警覺時會大衆及四
天王天三十三天蘇夜摩天兜率陀天樂變
化天化自在天乃至淨居如是諸天蒙光
警覺悉來集會及諸龍神夜叉乾闥婆阿修
羅迦樓羅緊那羅摩睺羅伽人與非人在家
出家無量品類蒙光警覺悉來會坐如是經

於一刹那頃未及須臾令此道場縱廣正等
十千由旬爾時念意菩薩見此大衆悉已雲
集以福德力及智慧力念力法力陀羅尼力
妙辯才力大無畏力佛威德力以是力故於
彼總集百俱胝難聞已受持對彼如來及於

前八

十九

大衆於此難中一一各以百千俱胝法門解
釋圓滿無缺無能摧壞隨其流類應其根器
而演說之相續不斷字句義理微妙分析說
此法時其聲徧滿三千大千世界從四天王
天乃至淨居一切諸天悉聞其聲悉解其義
是諸天衆發如是言奇特希有念意菩薩說
此法時會中有六十千俱胝那由他衆生發
阿耨多羅三藐三菩提心四十千俱胝那由
他菩薩得無生法忍爾時吉祥守護如來稱
讚念意菩薩言善哉善哉真大丈夫釋迦牟

尼佛告無畏辯才菩薩言善男子於汝意云
何爾時念意菩薩豈異人乎今般若峯菩薩
是也善男子以是菩薩有於如是無量辯才
智慧高勝名般若峯因此菩薩辯才智慧今
此般若波羅蜜母般若事業莊嚴法門出現
世間佛說是已爾時十方無量無數不可數
不可稱不可量種種佛刹諸大威德菩薩摩
訶薩及大威德無量諸天龍神夜叉乾闥婆
阿脩羅迦樓羅緊那羅摩睺羅伽人非人比
丘比丘尼優婆塞優婆夷等一切大衆聞佛
說此般若波羅蜜母般若事業莊嚴法門踊
躍歡喜以種種華香塗香料香及諸瓔珞鬘
帶衣服幢幡傘蓋及種種樂音所謂箏篳篥
琵琶鼓笛歌吹美妙樂音以用供養佛及大衆
無量衆生發阿耨多羅三藐三菩提心三十

六俱胝那由佉菩薩皆得無生法忍

守護國界主陀羅尼經卷第八

第八

二十

音釋

析思積切內奴骨切筏房滑切憤憤鬧憤外憤切古
心分也亂言也寒也鬧女也聲也教切不靜也也

守護國界主陀羅尼經卷第九 蘭九

唐 闍賓國三藏般若等譯

陀羅尼功德軌儀品第九

爾時會中有一菩薩摩訶薩名祕密主金剛手即從座起偏袒右肩右膝著地頂禮佛足合掌恭敬而白佛言世尊如佛所說陀羅尼門如是一切陀羅尼門云何名為陀羅尼門何等陀羅尼能為一切陀羅尼母何等陀羅尼普能利樂一切衆生何等陀羅尼能令有情速得阿耨多羅三藐三菩提爾時世尊告祕密主金剛手言善哉善哉善男子能問如來如是深義我今為汝分別解說善男子有一陀羅尼即是一切陀羅尼母名守護國界主若有菩薩受持證得此陀羅尼則得其身同如意寶衆生見者所願滿足亦能速得無

上菩提爾時金剛手聞是語已而白佛言善哉世尊願為我說此陀羅尼少分功能軌儀法則我得聞已精勤修習便能證得此陀羅尼佛告祕密主言善男子毗盧遮那世尊色究竟天為天帝釋及諸天衆已廣宣說我今於此菩提樹下金剛道場為諸國王及與汝等略說於此陀羅尼門汝當諦聽善男子陀羅尼母所謂唵字所以者何三字和合為唵字故謂婀烏莽一婀字者是菩提心義是諸法門義亦無二義亦諸法果義亦是性義是自在義猶如國王黑白善惡隨心自在又法身義二烏字者即報身義三莽字者是化身義以合三字共為唵字攝義無邊故為一切陀羅尼首與諸字義而作先導即一切法所生之處三世諸佛皆觀此字而得菩提為一

切陀羅尼母一切菩薩從此而生一切諸佛從此而出現是一切佛一切菩薩諸陀羅尼集會之處猶如國王住於王城臣佐輔翼姝女圍遶或出遊巡狩還歸皇居必嚴四兵導從千萬但言王住王之往來雖不說餘而無

第九

不攝此陀羅尼亦復如是雖說一字無所不收爾時秘密主金剛手復白佛言世尊如佛所說諸佛常住平等三昧等視衆生猶如一子今者云何但言守護國界主邪諸有貧窮孤惻困苦無依無歸無救無護何不愍念而守護邪爾時如來無上調御告秘密主金剛手言善男子諦聽諦聽當爲汝說諸佛如來非不住於平等三昧由平等故守護國王善男子譬如良醫見小嬰孩身繫疾病不勝醫藥乃以良藥令母服之由母服藥力及於乳

其子飲乳疾病皆除諸佛如來亦復如是哀愍一切守護國王若護國王獲七勝益何等爲七所謂若能守護國王即是守護國王之太子若守護太子即守護大臣若守護大臣即守護百姓若守護百姓即守護庫藏若守

護庫藏即守護四兵若守護四兵即守護隣國若能如是一切皆安善男子是故國王與諸衆生爲日爲月爲燈爲眼爲父爲母若諸有情無眼無燈無日無月無父無母身命何存若無國王不可安立又善男子如大龍池

第九

三

龍若住時水常盈滿龜鼉魚鼈水族皆安龍若去時水便枯涸水性之屬皆滅無餘國王亦爾若諸國王受持於此陀羅尼門能令無量無數衆生現在安樂長守尊貴身壞命終得生善道是知國主善能關閉諸惡趣門開

示人天涅槃正路故我偏說守護國王爾時
世尊復告秘密主金剛手言善男子如汝所
問軌儀法則諦聽諦聽我今爲此陀羅尼故
說金剛城大曼荼羅軌儀法則善男子若欲
建立曼荼羅時金剛阿闍黎先擇其地若山
若野其地若有種種果木藥草名華平坦可
樂或有清淨池沼澄潭泉流盈滿諸佛稱讚
可以建立曼荼羅場或大河側或近龍池蓮
華莊嚴所謂優鉢羅華拘勿頭華波頭摩華
芬陀利華復有鳬鴈鴛鴦白鶴孔雀鸚鵡舍
利拘枳羅等諸妙鳥王翔集莊嚴或是諸佛
及諸菩薩獨覺聲聞曾所止住寂靜可讚諸
天龍等所守護處及餘城邑聚落僧房舍宅
堂閣塔廟天祠牛所住處閑靜園苑空舍之
中並可建立此曼荼羅若無如是稱法之處

不復簡擇隨所便宜以用安置但隨心地作
曼荼羅復次善男子若阿闍黎選擇地時其
地若有沙石瓦礫樹根株杙髮毛爪齒糠粃
灰炭骸骨塚墓蛇窟蟻穴如是等地不堪建
立曼荼羅場既擇地已闍黎當選好宿直日
於清旦時吉祥相時五體投地禮如來足隨
其力分隨心廣狹以建壇場量極大者一千
由旬或復九百七百五百三百一百一由旬
量或七肘量五肘三肘或一肘量或一手掌
乃至一爪甲量我今當說作金剛城勝曼荼
羅量之儀則當畋方作面開一門上安闕闕
以爲莊嚴一面各自有三十二搩手之量四
周欄楯盡成三重共十二角以種種寶用作
華鬘而爲莊嚴於壇中心畫毗盧遮那如來
之像并畫四波羅蜜菩薩四方四佛各四菩

薩或安種子一一菩薩各有一俱胝那四佉
菩薩以為眷屬次安十二供養菩薩最外一
院安置十天彼一一尊各有真言五佛真言
已如上說

唵一薩怛縛二合縛入日哩二合娑縛二合賀四引

賀四引

唵一囉怛曩二合縛入日哩二合娑縛二合賀四引

賀四引

唵一達摩二合縛入日哩二合娑縛二合賀四引

唵一羯摩二合縛入日哩二合娑縛二合賀四引

唵一縛入折囉二合薩怛縛二合娑縛二合賀四引

賀四引

唵一縛入折囉二合囉佐三合娑縛二合賀四引

唵一縛入折囉二合囉誡三合娑縛二合賀四引

唵一縛入折囉二合娑度三合娑縛二合賀四引

簡九

五

唵一縛入折囉二合囉怛曩三合娑縛二合賀四引

賀四引

唵一縛入折囉二合諦者三合娑縛二合賀四引

唵一縛入折囉二合計觀三合娑縛二合賀四引

唵一縛入折囉二合悉蜜三合娑縛二合賀四引

賀四引

唵一縛入折囉二合達摩三合娑縛二合賀四引

唵一縛入折囉二合底乞史那二合娑縛二合賀四引

賀四引

唵一縛入折囉二合系觀三合娑縛二合賀四引

唵一縛入折囉二合婆灑三合娑縛二合賀四引

唵一縛入折囉二合羯磨三合娑縛二合賀四引

唵一縛入折囉二合囉乞灑三合娑縛二合賀四引

賀四引

唵一縛入折囉二合藥乞灑三合娑縛二合賀四引

唵一縛入折囉二合娑度三合娑縛二合賀四引

賀四引

唵一縛入聲折羅二合珊三娑縛二合賀四引

唵一縛入聲折羅二合羅洗三娑縛二合賀四引

唵一縛入聲折羅二合摩隸三娑縛二合賀四引

唵一縛入聲折羅二合儼諦三娑縛二合賀四引

唵一縛入聲折羅二合你哩三娑縛二合賀四引

賀四引

唵一縛入聲折羅二合努閉三娑縛二合賀四引

唵一縛入聲折羅二合補迦閉三娑縛二合賀四引

賀四引

唵一縛入聲折羅二合阿嚕計三娑縛二合賀四引

唵四引

唵一縛入聲折羅二合嚩第三娑縛二合賀四引

唵一縛入聲折羅二合阿廩舍三娑縛二合賀四引

唵四引

蘭九

法

唵一縛入聲折羅二合波舍三娑縛二合賀四引

唵一縛入聲折羅二合娑普三娑縛二合賀四引

賀四引

唵一縛入聲折羅二合嚩吒三娑縛二合賀四引

唵一縛入聲折羅二合也三娑縛二合賀四引

唵一縛入聲折羅二合阿乞迺三娑縛二合賀四引

唵一縛入聲折羅二合麼也三娑縛二合賀四引

唵一縛入聲折羅二合以伍三娑縛二合賀四引

唵一縛入聲折羅二合嚕那也三娑縛二合賀四引

唵一縛入聲折羅二合麼那三娑縛二合賀四引

唵一縛入聲折羅二合拘米囉也三娑縛二合賀四引

唵一縛入聲折羅二合伊舍那三娑縛二合賀四引

唵一縛入聲折羅二合陀羅拏三娑縛二合賀四引

唵一縛入聲折羅二合末囉沒泥三娑縛二合賀四引

爾時佛告祕密主言依此軌儀次第安布皆

周畢已其阿闍黎爲入壇者先當授與三昧耶戒以爲先導然後灌頂既灌頂已然後教其念誦真言脣齒相合其舌微動勿使出聲量力記數及時多少以爲常限要當要期得勝境界若無剋獲不出道場如是精勤以求

悉地我今當說用珠差別而說偈言

第九

佛部紹佛種	當用菩提子	金剛部中珠
亦用金剛子	寶部之中用	金等寶爲珠
真珠爲念珠	諸佛所稱讚	蓮華部中用
蓮華子爲尊	羯磨部中珠	種種和合作
五部掐珠法	用大姆指同	佛部頭指承
金剛部中指	寶部無名指	蓮華部合三
羯磨四指承	皆用於初節	金珠兩倍福
真珠得俱胝	金剛蓮子珠	百千俱胝福
若持菩提子	及與和合珠	無數福莊嚴

諸佛之所說	珠有一百八	攝亂心不馳
毗盧遮那印	當鼻端繫想	爲除煩惱等
增長三摩提	當想於本尊	護摩勤念誦
先觀月輪淨	想自坐輪中	發燄光熾然
天光嚴自體	十方現在佛	五色青白殊
莊嚴極可尊	常觀現前住	三千塵數佛
悉來入我身	我身等虛空	扇底迦供養
想菩薩歡喜	是增長護摩	忿怒入我身
內外冤皆滅	善色菩薩入	相敬愛想身
瑜伽內護摩	過去諸佛說	

爾時世尊說此偈已告祕密主金剛手言善男子諦聽諦聽此一字陀羅尼門即是一切陀羅尼母無邊俱胝陀羅尼門以爲眷屬若有觀察此陀羅尼無邊俱胝三昧現前過去現在一切諸佛由觀察此陀羅尼故得阿耨

多羅三藐三菩提善男子我今爲諸國王略說一字今得受持若諸國王得一字觀一刹那頃便得五種三昧現前所有煩惱不復現起善男子此大金剛城曼荼羅所有功能不可思議若善男子及善女人有能入此曼荼羅者則爲已見一切諸佛一切菩薩何以故此曼荼羅即是一切諸佛賢聖集會議論甚深法處若能入者則爲諸佛一切菩薩證知護念爲諸如來法王真子能爲一切衆生之父紹三寶種斷三惡趣開人天門住不退地遠一切罪得三十七菩提分法十力無畏以爲瓔珞而自莊嚴善男子隨其城邑有此道場受持修行四天王帝釋諸天八部擁護於此國土常無飢饉亦無冤敵一切人畜無諸灾疫諸國小王欽德歸化於諸王中殊勝

第一遠離一切憂患苦惱隨其壽命安隱快樂乃至夢中常見一切諸佛菩薩轉身受生常得安樂有大名稱富有財寶好行惠施能修安忍具足智慧愛樂善法生生常得宿住智慧於百千世作轉輪王那由他劫作天帝釋百俱胝世常作人王祕密主若有善男子善女人以恒河沙世界滿中七寶持用布施若復有人爲欲利樂一切衆生發菩提心入此金剛曼荼羅者其福勝彼爾時世尊欲重宣此義而說偈言

諸佛曼荼羅 已說三身法 法身及報化
相續次第成 修佛菩薩中 最勝微妙法
不久當成佛 三身皆得圓 十方諸世尊
共證加護念 當成法王子 持佛種常全
已斷惡趣因 復遠諸苦果 隨順不退轉

修行趣菩提	常安住勤修	三十七道品
又住四梵住	無畏十力中	若見此道場
遠離一切罪	應受人天等	敬養尊重心
現世成如來	衆生癡闇滅	諸天恒見佛
常護道場門	金剛道場中	若得灌頂者
法王子灌頂	不久必當成	千世爲輪王
那由劫帝釋	億劫四王位	無數世人王
十度悉皆圓	安住於十地	成就十種智
十自在皆通	趣三解脫門	建立三乘法
隨順成佛地	相好以莊嚴	轉生所受身
得樂大名稱	能脫諸病惱	智慧決無疑
富貴施貧窮	安忍愛樂善	生生知宿住
世世盡莊嚴	世界如恒沙	滿中皆七寶
淨心將布施	緣覺及聲聞	若發菩提心
爲利諸含識	入此道場者	此福勝過前

從發菩提心 生佛及菩薩 從菩薩流出
緣覺與聲聞 及色究竟天 刹利諸族姓
并餘諸善業 凡夫之所行 菩提心出生
菩薩不退地 故修諸勝行 先發菩提心
爾時秘密主金剛手聞說此已白佛言世尊
我今聞此大金剛城曼荼羅一切陀羅尼母
一切如來成正覺法心得清淨歡喜踊躍隨
其所在國土城邑若有建立此曼荼羅我祕
密主以陀羅尼而爲供養即說陀羅尼曰
曩謨一囉怛曩^{南九}合二怛囉^{合二}也耶^二 曩謨嚩折
囉^{合二}播曩曳^三 摩賀^四藥乞叉^{合二}犀那鉢
戴曳^五 摩賀麼囉^六鉢囉訖囉^{合二}摩也^七
摩賀嚩折囉^八合誑囉嚩也^九 唵^十 阿沒嚩
^{合二}多^一軍吒唎^二吽^三發^四翳系^五翳奚^六
阿劫臘摩^七阿劫臘摩^八阿迦哩灑^{合二}也^九

阿迦哩灑合二也二縛入質哩合二曩上薩二
縛努瑟吒二那伽難上室囉斯上
二十頻那頻那五縛折囉合二曩六十二
七咩二咩九發發發三瞋陀瞋陀瞋陀
三十縛入折囉合二曩三薩縛努瑟吒三
三娜健難四毗灑邪毗灑邪五仡囉合二
娑六娑麼娑麼七彌勒多合二入縛合二
三十摩哩那九縛入折哩合二娜四切那
賴也那賴也四戶嚧戶嚧四咩四
三阿沒哩合二多四縛入哩灑合二你五縛
入哩殺合二親六祢縛上娑上滿低曩七
發發發發發發八法法法法法法四
九法上法下同切法法法法法法四
法五擺擺擺一娑縛二賀引賀五
世尊我今復當說於念誦軌儀法則金剛阿

第九

十一

聞黎凡欲所為要當先於一切衆生起慈悲
心若有國土亢陽無雨金剛阿闍黎往有蓮
華大龍池所或河流岸或復小池當結大界
或四方界或四隅界結護已身此處作壇壇
上圖畫七頭龍王散種種華燒種種香塗香
抹香華鬘資具種種供養壇場四面懸青色
幡建赤色幢當以穀麥油麻大麥臘杏子銀
金錢等投龍池中右邊四面合掌禮拜以為
供養次備飲食以為供養謂酪蜜酥乳麋白
粳米飯種種飲食轉讀大孔雀王經起大悲
心發大誓願為諸衆生祈降甘雨作是法已
若不降雨當以忿怒尊陀羅尼念誦加持我
當自來以金剛杵而擬龍頭令彼驚怖時龍
雲中恭敬合掌下微細雨普徧充洽龍亦歡
喜唯除衆生有決定業甘雨不降餘必應心

念誦之時食三白食所謂乳酪及白粳米誦
十萬徧便得成就若雨過時便誦止兩陀羅
尼曰

唵一阿蜜嚩低底二吽三底瑟咤二合娑嚩
引二合賀引五

誦此陀羅尼七徧或以鉢器或瓶缸等盛蜀
葵華以鉢瓶等覆在地上便即晴明若佗方
冤敵來相侵擾當誦此陀羅尼曰

南謨一囉怛曩二怛囉耶也二唵三阿蜜嚩
二多四縛入哩二合阿蜜嚩二低五吽六孽揅

孽揅七曳佗蘇佉八三昧也九摩奴三末囉
十娑嚩引二合賀引十

燒安息香以華置掌中作金剛合掌誦此真
言四向散華冤賊退散若國土內一切災難
諸惡鬼神流行疾毒惱於人畜及有佗方冤
十二

敵侵擾當作極大威德忿怒王金剛手甘露
軍荼利金剛啞啞而笑要勝祕密心法亦取
諸毒刺火焚念誦而作護摩如上災難皆悉
消滅若欲効驗先誦真言滿十萬徧即得悉
地若欲先知善惡吉凶定不定者應當誦此

陀羅尼曰

南謨一囉怛曩二怛囉耶也二南謨三始
戰拏縛折囉二合跋曩曳四摩賀五藥乞又

二犀那鉢戴曳六平聲翳髮七勿馳八鉢囉
乞又二茗九娑茗十勿馳十一切三沒哩馳

切也觀二唵三阿蜜哩二低發四怛你也二
佗五戰扼戰扼六印扼泯扼七僧羯喇摩八

泯扼九阿尾奢矯禰十鉢囉二尾奢矯禰
一阿悉泯二阿廩瑟咤三合二曷茶哩十
四鉢扇努五那囉迦六那哩迦七你

尾那_{八十}斫芻灑_{九二十}阿閉覩_{十三}摩努山斫

芻_{三十}拈熠眠斫芻_{三十}跋囉_{合二}嚩_{聲入多也}

三十觀系那紇哩_{合二單四三十}曳_{聲入}寫紇哩_{合二}

單_{三十}曳_{聲入}恒囉_{十六合三}悉他此單_{三十}恒

薩挽_{八十}捺哩灑_{合一也九三十}莎縛_{引二合}賀_{四引}

十

次說持念軌儀金剛阿闍梨先以瞿摩夷塗

成方壇以乳酪末你耶_{平聲}阿樂多_{樂闍各切二合}

各盛滿椀置壇四角四角置燈然後散華燒

安息香或於劔中或鏡或牆或指或掌或燈

或佛像或水精或壇或瑠璃中稱心所欲見

其善惡當以童男或有童女身無癰痕清淨

無過澡浴身體著鮮白衣誦此真言用加持

之我當至彼自現其身隨其所問三世之事

悉皆辯說隨心疑惑悉皆斷除若爲癰癩鬼

魅所著當以楊枝及石榴枝以上真言加持
七徧燒安息香於地畫彼鬼神形像今前童
子執楊枝等鞭彼圖書鬼神形像曾背等處
時彼病人如撻其身嗥叫啼泣叩頭求救從
今永去不敢更來時阿闍梨令鬼立誓若再
來者願我眷屬喪滅無餘鬼立誓後更不再
來病者平復非唯去病種種勝事此總持力
皆得稱心成就所作爾時世尊告祕密主金
剛手菩薩言善哉善哉善男子此陀羅尼能
與未來一切衆生作大利益一切如來悉皆
隨喜此陀羅尼能令衆生發菩提心又今一
切外道異見悉皆調伏與諸佛法以爲先導
隨諸國土有此總持國無饑饉人民安樂國
主無病無復冤敵佛法流通無諸障礙祕密
主菩薩以此陀羅尼爲主覆護自身能持種

種陀羅尼寶於夜闇中而爲明炬又以種種陀羅尼門而作瓔珞莊嚴其身以此陀羅尼而爲先導以此陀羅尼而爲器仗過現未來恒須執持以此陀羅尼而爲室宅安住其中而行布施守護淨戒修習安忍勤行精進深

第九

十四

入禪定照明般若祕密主菩薩云何安住於此陀羅尼中而行布施祕密主以此菩薩不捨平等而行施故謂陀羅尼平等故布施平等布施平等故我平等我平等故衆生平等衆生平等故法平等法平等故菩提平等菩提平等即陀羅尼平等故此菩薩住陀羅尼能行布施如是布施非隨煩惱而行布施與勝義法相應布施悉能捨離一切煩惱名最勝捨諸見不起內外眷屬一切皆捨祕密主此是安住陀羅尼住處修行布施祕密主云

何菩薩住陀羅尼修行淨戒此菩薩見身口意本性寂靜而護持戒於身口意心無所著不依此世不依他世不依於內不依於外不依蘊界處不依菩提亦不依於陀羅尼門不依涅槃及一切法護持淨戒亦不念言我能

持戒是爲菩薩安住總持護持淨戒祕密主云何菩薩住陀羅尼修習安忍此菩薩修忍辱時不見自身不見衆生不見補特伽羅不見壽者不見於我及以我所此菩薩內心清淨衆生清淨一切法清淨以無所依依清淨

第九

十五

心而行安忍此菩薩修安忍時無有少法而可修習亦無少法而可損減亦無少法而可增長亦不爲於少法生故亦不爲於少法滅故亦不爲於少法盡故亦不爲於少法寂靜故亦不爲於一切衆生無我性故亦不爲於

一切衆生寂靜性故亦不爲於無恐怖故亦不爲於身滅盡故亦不爲於語言盡故亦不爲於心意盡故並不爲於如是等法修習安忍此菩薩於身修安忍時爲作所害節節支解當自觀身與草木牆壁瓦礫等無有異此菩薩於語修安忍時爲作毀辱以妙言詞而酬答之自在觀察言語性空不可執持體性寂靜無有住處又此法體皆不相待刹那刹那不相續故如是觀察修行安忍此菩薩於心修安忍時無有濁亂亦無高下見身與心各不相知了見身心無有住處此是菩薩安住總持修習安忍秘密主云何菩薩住陀羅尼勤行精進此菩薩爲欲增長諸善法故勤行精進而觀法界不見增長不見損減無少真實可得成就無少顛倒可得壞滅無世界

成無世界壞依此清淨陀羅尼門觀察諸法亦復如是不見善法而可增長不見惡法而可滅減彼諸法性無大無小無有住處來無所從去無所至如是知見一切諸法依如是法莊嚴自身爲令衆生真實解了顛倒法故而爲說法如是說時觀察衆生實不見得以知衆生不可得故則一切法亦不可得何以故謂離衆生無有少法而可得者離法亦無衆生可得又此法性即是我性我性即是一切法性一切法性即是佛性此彼本性體平等故觀察尋求如是佛法無少可得法不可得故佛不可得又能觀心尚不可得況所求法而當可得內外能所二相俱忘如是說法此是菩薩安住總持勤行精進秘密主菩薩云何住陀羅尼修習靜慮此菩薩若入諸定

當入諸禪平等體性非有成就非無成就觀
察諸定無增無減不依諸境而有觀察悟諸
禪定及一切法平等體性不亂不滅不相障
礙於諸靜慮支類功德不依身求不依心求
如是入時依於實相真際法性而入於定觀
諸衆生體性平等諸法無生如是相應修習
於定如是入定心不住內亦不住外亦不住
心此菩薩不住於識超過一切有見衆生持
戒入禪亦悉超過一切外道五通神仙聲聞
緣覺一切三昧三摩鉢底此菩薩所有禪定
從陀羅尼而得出生遠離諸見及諸煩惱而
皆迴向無上菩提成就衆生常住純一真實
三昧乃至涅槃無有變異是爲菩薩住陀羅
尼修習靜慮祕密主云何菩薩住陀羅尼修
習於法毗鉢舍那謂此菩薩以智慧眼明見

薩九

十七

諸法非肉眼見非天眼見此菩薩如是見時
見法寂靜見近寂靜見無所行見無合會虛
閑寂靜無有成就此菩薩以如是見見一切
法若見少法不多爲見不見少法是名爲見
何以故若見法體智慧不生若無智慧亦無
無智亦無有見如是見法非有我見非衆生
見非壽者見非養育見非士夫見非補特伽
羅見如是見者是名見法如是見法即見衆
生虛妄顛倒是故菩薩於諸衆生起極堅固
大悲之心作是念言奇哉衆生如是妙法如
是清淨云何而爲煩惱所纏恒受大苦爲欲
令其解脫妄苦而起大悲是爲菩薩住陀羅
尼修習於法毗鉢舍那佛言祕密主我於無
量無數劫中修習如是波羅蜜多至最後身
六年苦行不得阿耨多羅三藐三菩提成毗

盧遮那坐道場時無量化佛猶如胡麻徧滿
虛空諸佛同聲而告我言善男子云何而求
成等正覺我白佛言我是凡夫未知求處惟
願慈悲爲我解說時諸佛同告我言善男
子諦聽諦聽當爲汝說汝今宜應當於鼻端
想淨月輪於月輪中作唵字觀作是觀已於
後夜分得成阿耨多羅三藐三菩提善男子
十方世界如恒河沙三世諸佛不於月輪作
唵字觀得成佛者無有是處何以故唵字即
是一切法門亦是八萬四千法門寶炬關鑰
唵字即是毗盧遮那佛之真身唵字即是一
切陀羅尼母從此能生一切如來從如來生
一切菩薩從菩薩生一切衆生乃至少分所
有善根善男子此陀羅尼具如是等不可思
議威德功用窮劫演說劫數可盡此陀羅尼

第九

十八

功用威德不可窮盡爾時世尊欲重顯示此	陀羅尼勝功德故而說偈言	若離煩惱塵	能斷一切垢	離垢心清淨
此寶炬總持	若身口意淨	平等起慈心	光明如淨月	此寶炬總持
解脫諸二見	遠離念與疑	得智慧想心	此寶炬總持	入於念智門
大智功德具	如空際無垢	此寶炬總持	不斷三寶種	遠離三種垢
滅盡貪瞋癡	此寶炬總持	不爲劫濁亂	此寶炬總持	陰翳諸煩惱
妙入無塵相	無邊諸字句	妙建立四行	此寶炬總持	具足甚深法
隨順得解脫	此寶炬總持	四攝梵佳圓	五通爲先導	得勝義法眼

此寶炬總持	建立妙念處	常隨順正斷
恒修四神足	此寶炬總持	具信等五根
安住於五力	速住七覺分	此寶炬總持
八正道引攝	住於止觀峯	俱解脫前道
此寶炬總持	自在行地滿	常隨解脫道
永斷一切過	此寶炬總持	光明普照世
如淨日月輪	能令眼清淨	此寶炬總持
天眼妙清淨	慧明無翳障	法眼亦清淨
此寶炬總持	能淨煩惱魔	及淨蘊魔道
死魔已降伏	諸魔軍退滅	總持自在住
那由佗刹中	見那由佗佛	聽聞無上法
聞斯廣大法	真明力念持	文義悉皆圓
廣爲衆生說	住此總持者	於法微細知
分別諸因緣	心智剎那滅	滿此總持者
無著無所依	三智眼已明	安住三解脫

得此最勝持	廣說真言要	獲多總持法
無量難可稱	諸定及解脫	無量無有邊
遊戲諸通明	無邊門悉具	如大海無量
能納諸細流	如是最勝明	無邊法歸處
欲悟無盡智	善入無盡聲	永滅結縛源
說此真明法	若欲諸色相	種族悉崇高
生生殊勝身	獲得如意寶	能入甚深教
忍不出生生	智地不動搖	說此總持法
無數諸菩薩	求無上菩提	得此陀羅尼
菩提不難得	十方一切佛	說法利衆生
得此最勝明	辯才常不斷	得此真明法
說法皆不空	知心根樂殊	無量衆生喜
住此真明法	轉於最勝輪	衆生脫苦源
最勝乘安住	那由佗億劫	讚嘆此功德
此功德無邊	佛說不能盡	

守護國界主陀羅尼經卷第十

蘭十

唐屬賓國三藏般若等譯

阿闍世王受記品第十

爾時會中摩伽陀國主阿闍世王即從座起偏袒右肩右膝著地合掌恭敬頂禮佛足而白佛言世尊如來今在菩提樹下我之國土說陀羅尼及曼荼羅既有如是無量功德何以摩伽陀國風雨不節旱澇不調饑饉相仍冤敵侵擾疾疫災難無量百千惟願世尊斷我疑網爾時世尊讚阿闍世作如是言大王善哉善哉快問斯義於未來世能多利益一切衆生大王諦聽諦聽善思念之吾當爲汝分別解說大王如王所言於我國中當有饑饉冤敵等者此守護國界主陀羅尼以十六俱胝那由他陀羅尼而爲眷屬此大金剛城

曼荼羅以爲眷屬然彼一切皆以信心而爲根本以深般若而爲先導大菩提心及大悲心以爲莊嚴大王一切善法皆悉從此陀羅尼生一切罪惡不信因果以爲根本大王汝今不信因果耽五欲樂如大猛風吹其信心及菩提心大悲總持悉皆遠逝大王今者雖有眼耳如聾盲人不能聞雷霆不見日月何以故汝王名字尚不自聞況於餘聲何謂王名夫言王者即囉惹義囉字聲者所謂苦惱聲啼哭愁歎無主無歸無救護聲王當慰喻作如是言汝莫苦惱我爲汝主當救護汝拭淚慈愍而撫育之言惹字聲者是最勝義是富貴義是自在義是殊勝義是勇猛義是端正義是智慧義是能摧滅一切衆生憍慢自高陵慢佗義大王汝於今者不信因果親近惡

友提婆達多殺所生父囚繫飢餓渴乏不死而刑其足復令調達出佛身血破和合僧復放護財狂醉惡象暴踐如來大王汝今復有極大重罪所謂挑壞一切衆生清淨法眼斷滅諸佛真正之法關閉人天涅槃之門開示三塗生死惡趣所以者何汝是國王出遊園苑嚴備象駕一萬二萬馬巾馭車二三十萬以爲翊從復以百姓所有膏血用塗象馬時阿闍世王聞此語已而白佛言世尊我今惟忖不省曾以百姓膏血用塗象馬世尊何以作如是說佛言大王王之象馬一一皆以鬱金龍腦栴檀沉麝和爲香泥用塗象馬如是等香皆出百姓徵科百姓如壓油麻貧匱困苦千戶資財不能充給一象之費是故當知百姓膏血甚爲易得如是香等求之甚難大

王若疑當自巡案一切囹圄萬姓受苦過大地獄大王逼奪百姓所有資財賞賜豪貴遂令富者日益奢侈貧乏之者轉益貧窮今諸貧人孤惻困苦投足無地皆求出家如是之人無有和尚及阿闍黎自披袈裟不受禁戒無法自居令諸有情心生輕賤不欲見聞因是大王挑其法眼斷滅佛法閉人天路開惡趣門是故我言大王不聞自己名字以是因緣如何更得此陀羅尼神力加護大王我今當說古昔因緣王當諦思解了其義大王乃往古世有佛出現名迦葉波如來應供正徧知明行足善逝世間解無上士調御丈夫天人師佛世尊彼佛說法初善中善後善開示梵行彼時有王名訖哩枳於彼如來深生淨信王於中夜得二種夢一者夢見有十獼猴

其九獼猴擾亂城中一切人民妻妾男女侵奪飲食破壞什物仍以不淨而穢污之唯一獼猴心懷知足安坐樹上不擾居人時九獼猴同心惱亂此知足者作諸留難驅逐出於獼猴衆會第二夢者見一白象猶如大山當

帝王門首尾有口皆食水草雖恒飲噉身常羸瘦時王寤已生大恐怖召占相者以原其夢占者白王九獼猴者即是九王其知足者即是大王是則九王同心篡奪大王寶位象二口者即是九王食自國邑兼食王國王聞此語驚怖毛豎而心未決思欲見佛以斷所疑即勅左右嚴備種種供養之具一心往詣迦葉佛所到已作禮持諸供具上獻如來曲躬合掌而白佛言世尊我於昨夜得不善夢惟願世尊爲我解說使斷疑網時王具陳所

夢白佛佛言大王王之所夢不在於王勿生憂懼王善諦聽當爲王說此是未來五濁惡世有佛出現號釋迦牟尼滅度之後遺法之相大王十獼猴者即是彼佛十種弟子王白佛言世尊何名彼佛十種弟子迦葉佛言一貧畏不活而作沙門二奴有怖畏而作沙門三怖畏債負而作沙門四求佛法過失而作沙門五爲勝他而作沙門六爲名稱而作沙門七爲生天而作沙門八爲利養而作沙門九爲欲求未來王位而作沙門十真實心而作沙門時彼大王白彼佛言世尊此十沙門其相云何彼佛答言大王貧畏不活作沙門者多有衆生不信因果貪求財寶互相侵奪遂感天地雨澤不時五穀不登不充官稅飢貧所逼鬻賣男女無所投寄披掛遺棄樹上

袈裟自剃鬚髮作沙門像無阿闍黎亦無和尚無戒無法相似沙門長時受行一切惡法入僧伽藍自稱我是律師禪師法師大德坐居衆首謂餘僧言汝等皆是我之弟子於清信士族姓長者婆羅門家出入遊從多造過失是名第一貧畏不活而作沙門大王云何名為奴有怖畏而作沙門爲下賤奴婢作是思惟云何一生受佗驅策逃竄出家是爲第二大王云何名為怖畏債負而作沙門謂有衆生公私債負息利既多酬還不遂旣被逼迫逃逝出家是爲第三大王云何名為求佛法過失而作沙門謂諸外道心生嫉妬遂共集議誰有聰明利根辯慧入佛法中學彼所有世出世法窺其是非還歸我衆對於國王大臣長者豎論議幢出其過失摧壞破滅彼

蘭十

五

佛正法是名第四大王云何名為求勝佗故而作沙門謂或有衆生聞有某甲披衣落髮多有伎能通達三藏心生熱惱便即出家學經律論所修善法皆欲勝彼是名第五大王云何名為爲名稱故而作沙門謂或有人竊自思惟我若在家無有名稱我應剃落披衣出家勤學多聞受持禁戒於大衆中坐禪入定使物知名是爲第六大王云何名為求生天故而作沙門謂或有人聞生諸天中長壽快樂我無方便而得上生遂即剃髮染衣出家修持善法皆願生天是爲第七大王云何名為爲利養故而作沙門謂或有人先有財寶更求勝處得好精舍房院華飾可以棲遲受用自佗所有財產是名第八大王云何名為欲求未來帝王位故而作沙門謂有衆生

見於國王自在尊崇富貴安樂便生愛樂遂
求出家所修善根惟願當生得居王位是名
第九大王云何名爲真實心故而作沙門謂
有衆生雖生刹利大臣族姓婆羅門家或生
長者居士商主富貴之家盛年美貌觀諸財
色富貴榮顯猶若浮雲泡幻電光生滅不住
遂起厭離發菩提心親友珍財一切皆捨出
家慕道秉持律儀學法修禪精勤匪懈凡有
所作皆爲衆生唯求無上菩提之果是名第
十真實心故而作沙門大王當知如王所夢
見一獼猴少欲知足獨處樹上不擾人者即
是釋迦如來遺法之中真實沙門其九獼猴
擾亂衆人同心驅擯一獼猴者即是釋迦如
來遺法之中前九沙門無沙門法故總名爲
相似沙門同行惡行共驅於一真實沙門出

第十

六

於衆外大王此惡沙門破戒行惡污穢一切
族姓之家向於國王大臣官長論說毀謗真
實沙門橫言是非云是惡人破戒惡行不合
與我持戒比丘同共止住布薩說戒亦不合
同居一寺舍同一國邑一切惡事皆推與彼
真實沙門蒙蔽國王大臣官長遂令驅逐真
實沙門盡出國界其破戒者自在遊行而與
國王大臣官長共爲親厚大王彼釋迦牟尼
如來所有教法一切天魔外道惡人五通神
仙皆不能破壞乃至少分而此名相諸惡沙
門皆悉毀滅令無有餘如須彌山假使盡於
三千界中草木爲薪長時焚燒一毫無損若
劫火起火從内生須臾燒滅無餘灰燼爾時
迦葉波佛爲訖哩枳王重說偈言

貧畏不活而剝落 言得敬養脫貧窮

周畢已其阿闍梨爲入壇者先當授與三昧耶戒以爲先導然後灌頂既灌頂已然後教其念誦真言脣齒相合其舌微動勿使出聲量力記數及時多少以爲常限要當要期得勝境界若無剋獲不出道場如是精勤以求

悉地我今當說用珠差別而說偈言

佛部紹佛種 當用菩提子 金剛部中珠

亦用金剛子 寶部之中用 金等寶爲珠

真珠爲念珠 諸佛所稱讚 蓮華部中用

蓮華子爲尊 羯磨部中珠 種種和合作

五部掐珠法 用大姆指同 佛部頭指承

金剛部中指 寶部無名指 蓮華部合三

羯磨四指承 皆用於初節 金珠兩倍福

真珠得俱胝 金剛蓮子珠 百千俱胝福

若持菩提子 及與和合珠 無數福莊嚴

諸佛之所說 珠有一百八 攝亂心不馳

毗盧遮那印 當鼻端繫想 爲除煩惱等

增長三摩提 當想於本尊 護摩勤念誦

先觀月輪淨 想自坐輪中 發焰光熾然

天光嚴自體 十方現在佛 五色青白殊

莊嚴極可尊 常觀現前住 三千塵數佛

悉來入我身 我身等虛空 扇底迦供養

想菩薩歡喜 是增長護摩 忿怒入我身

內外寬皆滅 善色菩薩入 相敬愛想身

瑜伽內護摩 過去諸佛說

寵榮祿下於百姓非理追求雖復貪求而多

匱乏賦稅無度萬人貧窮貿易子孫家業蕩

盡投寺剝落寺復荒蕪多惡比丘發心無地

遂投外道路伽邪等斷常諸見異學出家邪

見因緣師徒皆墮自入地獄復與多人開地

獄門相引奔馳趣三惡道閉人天路解脫無由大王當知故此二夢並是釋迦如來遺法之相非干王事訖哩枳王聞此說已永斷疑網歡喜踊躍復以種種上妙供具恭敬供養迦葉如來頂禮佛足右遶而退爾時釋迦如來說此語已第十摩揭陀國主阿闍世王復白佛言世尊如佛所言諸惡衆生入於地獄云何得知誰人曾見復云何知當墮餓鬼及與畜生當生人天並誰人見爾時世尊告阿闍世言大王應當一心諦聽我爲王說今王現前而得知見大王當知若人命終當墮地獄有十五相當生餓鬼有八相當生畜生有五種相當生人天各有十相大王何等名爲當生地獄十五種相一者與自夫妻男女眷屬惡眼瞻視二者舉其兩手捫摸虛空三者善

知識教不相隨順四者悲號啼泣嗚咽流淚五者大小便利不覺不知六者閉目不開七者常覆頭面八者側臥飲噉九者身口臭穢十者脚膝顫掉十一鼻梁欹側十二左眼瞶動十三兩目變赤十四仆面而臥十五躑身左脇著地而臥大王當知若有臨終具十五相如是衆生決定當生阿鼻地獄大王當知若復有人臨命終時有八種相當知必墮餓摩羅界餓鬼趣中云何爲八一者好舐其脣二者身熱如火三者常患飢渴好說飲食四者張口不合五者兩目乾枯如鵲孔雀六者無有小便大便遺漏七者右膝先冷八者右手常拳何以故心懷慳慳乃至於水不與人故大王若具八相命終決定生餓鬼中大王當知若復有人臨命終時有五相現是人決

定墮畜生趣云何爲五一者愛戀妻子貪視不捨二者蹠手足指三者偏體流汗四者出麤澀聲五者口中齟沫大王若具此五命終決定墮畜生趣大王當知若復有人臨命終時有十相現是人決定生人趣中云何爲十

無佛世歸五通仙大王若臨命終具此十相決定得於人趣中生大王當知若復有人臨命終時有十種相定得生天云何爲十一者起憐愍心二者發起善心三者起歡喜心四者正念現前五者無諸臭穢六者鼻無欬側七者心無恚怒八者於家財寶妻子眷屬心無愛戀九者眼色清淨十者仰面含笑想念天宮當來迎我若臨命終具此十相決定生天大王如是臨終善惡之相汝應當知時阿闍世王聞佛說已竊自思念如來此說爲是

第十

十

實事爲是虛邪世尊具足辯才權說此理爾時如來知阿闍世王心之所念即以神力令阿闍世見其惡相忽有地獄苦器充滿有諸獄卒執持苦具無量衆生顛墜地獄如駛雨點爾時獄卒瞋目振威指阿闍世而作是言

此是惡逆殺父之人速當擒來付於阿鼻大地獄中而苦治之時阿闍世聞是語已極大惶怖身毛皆豎偏體汗流遽從座起走欲逃竄悶絕躋地都不覺知譬如猛風伐無根樹久而不蘇乃以種種方宜救之漸得蘇息連聲唱言世尊世尊願賜壽命願賜壽命如我今日無依無怙從今決定歸佛法僧於是如來還攝神力諸相不現問阿闍世言大王向見入地獄者諸苦事邪時阿闍世含悲答言我今已見世尊所說舉其少分我向所見苦事甚多如來世尊是真語者是實語者世尊我於此身造諸惡業今對世尊諸大菩薩衆僧大會發露懺悔止息諸惡斷相續心我從今日乃至菩提誓持五戒爲優婆塞如佛所說一字陀羅尼一切功能以菩提心而爲先

十一

導從今向去一日三時精勤修習以此善根悉皆迴向一切衆生佛讚王言善哉善哉大王諦聽我今爲王說過去佛微妙伽陀即說偈言

若造五逆極重罪 發露懺悔罪輕微

永斷相續滅罪根 如壯夫拔連根樹

佛說偈已復告王言大王當知譬如團鐵投水沉沒若爲鉢器置水則浮大王有智慧人如彼鉢器不沉苦海汝造惡業合入阿鼻大地獄中一劫受苦由汝有智發露懺悔暫入便出如壯男女以手拍毬暫時著地即便騰起從此命終生兜率天見慈氏尊便得授記時阿闍世聞佛說已心得淨信以種種供具供養佛已還復本座當於如來說此法時無數俱胝那由佗衆生皆發阿耨多羅三藐三

菩提心三十二俱胝那由佗菩薩得隨順忍
如來囑累品第十一

爾時文殊師利菩薩摩訶薩白佛言希有世
尊希有善逝世尊說此陀羅尼門即是諸佛
決定最勝妙陀羅尼以無邊量名句字門宣
說趣入無邊義理其義深遠隨順覺悟因緣
性故難入懈怠懶惰無由入故難解斷常見
者不能了故難見依止六處不能見故難悟
樂下乘者不能覺故超權是諸菩薩甚深境
故無相是一切法真實印故無礙法界平等
無能所故無異體同虛空離二相故無阿賴
邪超過一切所依處故知衆生行善解一切
因緣法故得深般若光明照見諸法性故出
生諸度成就一切巧方便故善分別法具足
四種無礙智故身心普徧能得廣大諸神通

故平等覺法安住一乘教法中故是無異行
入如虛空平等性故亦無平等於一切處無
有對故是無等等一切無等唯與諸佛如來
等故遠離二相出生諸法寂滅體故諦觀文
字爲欲安立一切法故非言能說即是真實
勝義諦故不礙宣說普能隨順世俗諦故能
出生三寶能廣大三乘能開三脫門能超出
三界能善覺三智能生如來金剛三昧是一
切法之所住處是一切佛智慧之門普能養
育一切衆生世尊諸善男子善女人等應當
於此世尊無量三密一字陀羅尼門發阿耨
多羅三藐三菩提心若聞此法所有義理應
當信受應當書寫應當讀誦應當修習應當
爲人開示宣說世尊若能如是乃至一偈一
句一字如是之人得福無量是則名爲知佛

恩者是念佛恩是報佛恩爾時世尊讚文殊
師利言善哉善哉善男子如汝所說如是之
人所得福德不可稱量善男子佛眼所見一
切佛刹假使有人以一切寶充滿其中持用
奉施一切如來所得功德無量無邊若復有
人能聽此經一字一句或生信樂或能受持
或復書寫或當讀誦或正修習或廣爲人演
暢宣說行住坐臥常勤精進爲今妙法久住
世間爲令三寶不斷絕故此人福德勝前布
施諸佛福德爾時世尊欲重宣此義而說偈

言

佛眼所見諸佛刹 滿中珍寶施如來
我說此福尚輕微 以不聞此深經故
若得聞此妙經典 甚深勝義悉皆圓
是故讀誦受持經 斯福最勝過於彼

諸佛唯於法中住 不因布施得菩提
若有受持佛法門 即是能知佛恩者
是故供養佛福甚 不及供養此深經
最勝福聚悉皆圓 從此能生於善逝
若世無此勝經寶 佛種法施悉皆無
亦無聽法及修行 衆生苦海常淪溺
無恩衆生謗此典 彼破苦海法舟航
斷滅三寶罪根深 墮阿鼻獄無由出
照明六度如燈炬 吉祥寶聚等須彌
首楞嚴定等無邊 及一切法皆從出
若有愚癡翳心眼 此爲慧日破迷心
憂惱赫日所焦燃 此爲滿月清涼照
登最上乘不放逸 此菩薩住勤修行
能得寂靜大菩提 非下劣乘之所得
所有人天勝妙樂 聲聞緣覺得菩提

此經一切悉能生 如摩尼寶隨心願

爾時世尊說此偈已出大音聲普告一切菩薩摩訶薩及諸大眾言諸佛子我於無量無數劫中精勤不懈一心專求修習於此諸佛世尊成就菩提不可思議祕密一字陀羅尼

第十

十四

經此大眾中誰能發起大勇猛心爲大丈夫能於如來般涅槃後受持讀誦廣宣流布令此妙法久住於世爾時眾中七十俱胝菩薩摩訶薩皆從座起恭敬合掌異口同音而白佛言世尊我等能於如來滅後受持於此佛無數劫勤求修習成就菩提祕密一字陀羅尼經廣宣流布令五濁世一切眾生聞此法門心得淨信恭敬尊重種諸善根惟願如來神力加被爾時世尊一切種智告諸菩薩摩訶薩言善哉善哉汝等乃能發斯大願我今

當以威神之力護持此經而說偈言

如來真實語 常住真實法 諸佛神力故

擁護於此經 被大悲甲冑 常住大悲中

憐愍眾生故 擁護於此經 得福聚圓滿

從此生智聚 爲滿福智故 擁護於此經

能滅一切魔 摧破諸外道 能斷諸見故

擁護於此經 帝釋護世王 修羅尋香等

爲我加被故 當護持是經 地及虛空中

十方諸天眾 諸佛加被故 當受持此經

欲得梵住圓 次第莊嚴體 及守護眾會

第十

十五

當擁護此經 色可變爲空 空可變爲色

無能變於佛 擁護令動搖

爾時護世四天王俱從座起合掌同聲而白

佛言世尊我對如來發深重願於未來世擁

護是經及諸國王大臣長者一切人民受持

經者而說偈言

隨說此經處 及聽法衆會 我與諸眷屬

皆當守護之 若有勤受持 及發菩提意

當於四方面 擁護常不離

爾時釋提桓因為欲擁護如是經典及持經

者合掌向佛而說偈言

我聞佛說此 最勝微妙經 決定成菩提

知佛恩難報 爲報佛恩故 如諸佛護持

當守護是經 及護持經者

爾時大梵天王爲護此經及持經者合掌向

佛而說偈言

四禪四無量 諸乘及解脫 皆從此經出

由具義甚深 隨有說此經 我捨梵天樂

往彼而聽受 供養并護持

爾時兜率陀天子爲護此經及持經者合掌

向佛而說偈言

欲住兜率天 次生得解脫 當受持於此

諸佛所讚經 隨有說此經 我當捨天樂

住閻浮擁護 爲報諸佛恩

爾時魔王子商主天子爲護此經及持經者

合掌向佛而說偈言

欲竭魔業海 不隨魔所行 當受持此經

具足甚深義 我念佛恩故 發勤精進心

守護於是經 今廣宣流布

爾時魔王波旬爲護此經及持經者合掌向

佛而說偈言

若持此經者 煩惱滅不生 我不於其人

作障礙留難 有此勝經處 我當親護持

令魔不入心 爲念佛恩故

爾時蘇夜摩天王爲擁護經及持經者合掌

向佛而說偈言

佛所有菩提 於此經中說 若受持經者

已供諸如來 我持佛此經 爲俱胝天說

令殷重聽受 發大菩提心

爾時慈氏菩薩爲欲擁護於此深經及持經

者合掌向佛而說偈言

若捨諸眷屬 勤修菩提道 爲守護此經

不自惜身命 我承佛神力 親從兜率來

今如是深經 常廣宣流布

爾時具壽大迦葉波爲護此經及持經者合

掌向佛而說偈言

我昔從世尊 曾聞百千經 未曾得聞此

如是深妙法 我今親對佛 受持於此經

爲諸菩薩故 今廣宣流布

爾時世尊稱讚釋提桓因四大天王大梵天

爾十

十七

王兜率天子商主天子及魔波旬菩薩聲聞諸護經者作如是言善哉善哉汝等真是勇猛丈夫爲令妙法得久住故能作如是大獅子吼諸善男子當聽我說若諸衆生修行大乘未得法忍以佛神力受持此經精勤修習次後佛所即得授記如是或二或三不過七佛必定當得阿耨多羅三藐三菩提記若聲聞乘種性衆生得聞此經於慈氏佛龍華第一聲聞會中當爲最上第一聲聞若緣覺乘種性衆生得聞此經受持修習我涅槃後更不聞法必當得成獨覺菩提佛說此守護國界主陀羅尼經時無量無數種種衆生發阿耨多羅三藐三菩提心無數菩薩住不退地無數世界六種震動日月光明所不能照幽闇之處而皆大明雨衆天花繽紛亂墜十方

國土諸來菩薩在此會者爲供養佛及此經故於菩提樹道場四面各四由旬以種種寶衆妙雜華莊嚴其地異口同音而白佛言世尊我等今日得大利益不空而還得聞於此決定最勝微妙經典惟願世尊釋迦牟尼長延壽命願令此經久住不滅於閻浮提一切國土作大利益世尊若比丘比丘尼優婆塞優婆夷國王大臣一切人民受持此經無諸病苦壽命長遠普能利樂一切衆生爾時文殊師利菩薩白佛言希有世尊希有世尊如是決定最勝經典言詞微妙文字句義莊嚴圓滿能令一切菩薩大衆生歡喜心摧伏一切諸魔外道善能任持一切法門能令一切衆生歡喜是能出生一切乘道隨順趣入一切如來功德大海若有能於如是經典精勤

蘭十

十八

宣示一切不空復白佛言世尊當何名此經我等云何奉持佛告文殊師利菩薩摩訶薩言此經具有一千名字所謂名爲毗盧遮那廣大三密甚深一字經亦名三界最尊勝經亦名如來說大悲門亦名聞如來法不空得記亦名如來微妙法藏亦名如來妙究竟果亦名如來微妙法眼亦名普照諸法寶炬亦名能斷一切邪見亦名顯示諸法平等有如是等一千名字時文殊師利復白佛言世尊如是名中雖皆甚深惟願如來爲我決定說一名字令我奉持佛言善男子此經決定應名守護國界主陀羅尼以是名字汝當奉持所以者何以一千名依此生故爾時世尊說此經已一切世間天人阿修羅乾闥婆等無量大眾聞佛所說皆大歡喜信受奉行

守護國界主陀羅尼經卷第十

音釋

蘭十

十九

憊

憊列切也

憊

憊神夜

憊

憊具位切

憊

憊

憊

憊

憊

憊

憊

憊

憊

憊

憊

憊

憊

憊

憊

憊

憊

憊

憊

憊

憊

憊

憊

憊

憊

憊

憊

憊

憊

憊

憊

憊

憊

憊

憊

憊

憊

憊

憊

憊

憊

憊

憊

憊

憊

憊

憊

憊

憊

憊

憊

憊

憊

憊

憊

憊

憊

憊

憊

憊

憊

憊

憊

憊

憊

憊

憊

憊

憊

憊

憊

憊

憊

憊

憊

憊

憊

憊

憊

憊

憊

憊

憊

憊

憊

憊

憊

憊

憊

憊

憊

憊

憊

憊

憊

憊

憊

憊

憊

憊

憊

憊

憊

憊

憊

憊

憊

憊

憊

憊

憊

憊

憊

憊

憊

憊

憊

憊

憊

憊

憊

憊

憊

憊

憊

憊

憊

憊

憊

憊

憊

憊

憊

憊

憊

憊

憊

憊

憊

憊

憊

憊

憊

憊

憊

憊

憊

憊

憊

憊

憊

憊

憊

憊

憊

憊

憊